



JOH. NICOLAI PECHLINI,
Med. Doctoris & Professoris Ord.

De

HABITU & COLORE
ÆTHIOPUM,
qui vulgò
NIGRITÆ,
LIBER.

ad

Excellentissimum Virum

D. CAROLUM DRE-
LINCURTIUM,

Christianissimi Regis Consiliarium &
Medicum, Profesforem Lugduni in
Batavis Primarium.



KILONI,

Literis ac Impensis JOACH. REUMANNI,
Academiae Typogr. Anno 1677.

A D

VIRUM CLARISSIMUM,

JOHANNEM NICO-
LAUM PECHLINUM,

COLLEGAM AMICISSIMUM,

Post Anatomen Æthiopiæ

*De habitu & colore
Æthiopum*

commentantem.

O PECHLINE, tuis decus Bata-
vis;

Nunc nostris decus ô amorq; Cimbris:

Quem totum sibi Apollo, quem novena,

Quantus est, sibi vindicant Sorores:

A 2

Quem

*Quem Machaonia sacraque Vatum,
Omnesque ingenii sagacis artes
Ostendunt populis superstitemque
Transmittent memoris per ora secli.*

*O PECHLINE meis amate Musis;
Quem circumvolitant Foci, Salesque
Lepores, Veneresq; , Gratiaq;
Gallica, Batava, Attica, Latina,
Quis te nunc furor Ingeni calentis
Monstrorum in Patriam relegat? aut quid
Formarum Africa parturit novarum?
Provocare tuos ut ausit ignes,
Formarum, nisi fallor, elegantis
Spectatiq; satis, satisq; canti
Spectatoris. Inauspicata non est
Maura forma tibi nec ominosa?
An qua Nocte sata, umbra viva quon-
dam,*

Soda-

*Sodalis lemurum, ipsa nox diurna,
 Cum non pallida mors, sed atra nigram
 Vel luci eripuit sua, vel umbris
 Vindicat profugam, tuos Cadaver
 Non horrore quatit rapitque sensus?
 Hanc tractare manu, secare cultris
 Et rimari oculis nihil vereris.
 Ha nunc delicia, sed Africana.
 Barbaraeque placent: nec his venustas,
 Vel te iudice, gratiaeque desunt.*

*En ut se resupina tendit! en ut
 Albis dentibus illa ridet albos,
 Si pellēm videas, sed intus atros!
 Qua nunquam erubuisse viva visa est,
 Non jam mortua nudaque erubescit
 Intra pelliculam, sinusque cunctos,
 Intra pectora, viscerumq; gyros,*

Totam tradere se tibi videndam.

*Nunc ergo, indice te, docemur albis
 Quid distet niger, & quod ater, albus
 Nescit hætenus, album uterq; & atrum
 Se Te noscere nunc potest Magistro.
 Nam quæ summa cutem tegit propinquam
 Nobis pellicula, & rubore tinctus
 Translucet per eburna texta candor,
 Fuligo sedet his, cutisque fibris
 Exsudans oleosa cuncta latè
 Interfusa nigrolinit colore,
 Membranaque subuculam reponit;
 Quæ transire vetans opaca lucem,
 Hac Mauros facie exhibet videndos.*

*Hæc dum tu vegetæ calore mentis
 Scrutator penetras, colore noctis*

Nunc

*Nunc tinctam ingenii colore tingis,
 Ut, quam non habet ipsa Maura lucem,
 Quam non repperit ipsa viva lucem,
 Nunc te mortua phosphoro reportet,
 Gentilesque tibi exuat tenebras.*

*Hæc qui nunc memoras, notasque chartis
 Cultis, (Juppiter!) & laboriosis,
 Quanquã Afrã, tamen unicam, venustam,
 Quæ nullis imitanda penicillis,
 Pinxisti Venerem unus hanc Apelles.*

*O PECHLINE, meis amate Musis,
 Quæ nunc premia (nam mereris illa)
 Pulchros nobilis ingenI manebunt
 In monstro, sed amabili, labores?
 Si sententia nunc roganda Divum est.
 Phæbo iudice, candidisque Musis;
 Candidâ Venere, omnibusque Divis.*

(ÆSCULAPIUS & probet BATAVUS)

*Qui nosti intus & in cute, & retexis
 Mauras candidus arbiter puellas
 Dulcem (Dî faciatis!) & venustam
 Dulcis, Candidus ipse, Candidamque
 Solus Phyllida, solus Ipse habeto.*

**DANIEL GEORGIUS
 MORHOFIUS. D. Pr.
 Acad. h. t. Pro-Rector.**

PROOEMIUM.

EXCELLENTISSIME DOMINE.

EX quo Bataviam meam reli-
qui, & quidquid est hominum
elegantiorum, non destiti soli-
tudinem, quam mihi vivendi conditio
imposuit, jucundâ & frequenti acto-
rum memoriâ delinire. Habui mul-
tos & observavi, quos mihi morum &
eruditionis commendatio reddiderat
familiares, sed, quem magis respice-
rem coleremque, quàm Te, alium
habui neminem. Operam itaque da-
re cœpi ab illo tempore, quo me di-
vina voluntas huc evocavit, quemad-
modum Tuirationem habere possem,
As, & quam

& quam mihi toties probasti benevolentiam, pio officio rependere. Sed cogitanti sæpe & sæpe volenti, quam in manibus habebam, occasionem armorum circumstrepentium fatalis turbo excusit, meque mihi & tam gratæ amicorum recordationi eripuit. Jamque inceserat animum non præteritorum tantum sed & præsentium memoria, & quam ex officiorum cultu capere voluptatem solemus, fortuna in tædium verterat, cum religiosâ tandem cogitatione mihi met redditus, ordinandis amicorum desideriis incumbere diligentius cœpi. Nimirum, ut quisque à Naturâ infirmiores sumus, & alii aliis facilius ad turbida deficimus, ita ego hoc imprimis in me sentio animi vitium, quòd ad rumores, asperos illos & tranquillitatis hostes, meliorem sensum atque libertatem, quam Studioforum sibi mentes poscere solent, facile amittam. Sed neque levis illa est aut inanis perturbatio, sed pertinax, & postquam animum semel insedit, quietem

tem etiam curiosè quæsitam diutius enervans. Existimabam, cum in possessionem hujus officii fortunâ mitterer ex hostico & vicino tumultu, assertum jam me iri in tranquillum, &, quantum res humanæ ferunt, meliorem vitæ statum: sed ecce! vix unius anni requies, cum me eisdem & propè fatalibus redditum calamitatibus video; atque ex illo animus, mirificè mobilis, & ad gravioris momenti studia lentè obtorpescens, adigi vix potuit, ut, quod vehementer cupiebam, effectum redderem. Haud facilè scias, Virorum optime, quàm pectus hoc, nullius adeo quàm tranquillitatis avidum, ad imminetia, imo & longiùs remota, sui obliviscatur, & sanè, si quæ est, constantiam evertant, ἐσωθεν φόβοι, ἐξωθεν μάχαι, ut Apostoli ista mea faciam. Ubi autem accuratiùs imbecillitatem hanc cogitare cœpi, non sine vi quadam & mecum ipse & cum studiis in gratiam redire, horasque, si non omnes, at saltem aliquot, tumultibus istis eximere necessaria-

necessarium duxi, imo etiam audere,
 quod aliàs non temerè, nec nisi plenâ
 in libertate ausus fuisset. Aspice ergo
 qualemcunque hanc operam, Excellen-
 tissime Vir, tanquam animi mei debi-
 tum pignus veterisque consuetudinis
 memoriâ extortum, & si quid in hisce
 vel crisi tuâ aut nomine meo est indi-
 gnum, dissimili vel studio aut nexu elab-
 oratum, crede, temporum istam cul-
 pam esse, exulceratam mentem ex fa-
 cili revocantium. Pulcra nimis erat
 occasio, quàm ut eam rejicerem, plu-
 rima sponte properabant, ut in argu-
 mentum cederent libelli, ex quibus ea
 tantùm deligere volui, quæ placitura
 esse sperabam, pauca & inusitata. An-
 nus est, & quod excurrit, cum femi-
 næ ex Æthiopiâ, aut Morulæ, si Plau-
 tino vocabulo exprimere communem
 gentium nomenclaturam licet, incidit
 cadaver, raritate se suâ ultro commen-
 dans, semel tantùm aut fortè iterum
 in his terris visum, cujus nigredo, non
 conjecturis modò, sed & experimentis
 doctis-

doctissimorum Virorum vexata, suadere jam initio visa est, ut incerta opinionum præsentī, &, quantum poteram, solidā demonstratione tollerem. Verūm, etsi aliqua attigerim haud vulgata, non tamen ea certitudo à me deprehensa, ut ultra superficiem aliquid audeam promittere; pluribus enim experimentis & hoc ipso edoctus sum, inane plerunque esse, quod nobis ipsi de materialibus minimorum causis & adæquatā rerum cognitione fingimus, quandoquidem illud, quod innotescit, sub certā quantitate sensibus objiciatur, superficiale sit & valde paucum, quod latet, & in quo vera Naturæ vis collocatur, longè plurimum, nec sensuum tantūm, sed severioris quoque judicii fugiens censuram. Non inficior sapere nos aliquid; verum ita, ut maximam partem admiratio, hoc est, religiosa ignorantia sibi vendicet, paucissima ambitio; quā etiā causā impulsos nuper fuisse ingenuos viros video, ut ejurato naturalium rerum studio, se sola
Dei

Dei abstractorumque contemplatione
 exercerent, hoc uno piam felicitatem
 metientes; quod institutum etsi vitu-
 perare in præsens nolim, tamen etiam
 cur magnopere probem, non reperio.
 Concessit nobis divina bonitas corpo-
 rum *θεωρητων*, ex quibus postquam su-
 perficiem delibavimus, jam inde plu-
 rima superesse certum est, quæ Numi-
 nis potentioris excitent reverentiam,
 nostram verò ipsorum prodant imbe-
 cillitatem; nam religionem quidem
 non ante subnasci putem, quàm ani-
 mus, ille vastissimarum rerum adeo
 appetens, seque ipso major, etiam ad
 exilissima quæque deficere sese intelle-
 xerit; ut non exiguus jam sit contem-
 plationis illius fructus, aliquid in usus
 civiles, plurima in Dei nostrique co-
 gnitionem transferre. Sanè id quoque
 in nigredinis *Æthiopicæ* examine acci-
 disse mihi haud possum tacitum ferre;
 postquam enim diu, & ultro citroque
 eam inspexeram, vix aliud deprehen-
 dere licuit, quàm quod superficiei pro-
 ximum.

ximum, sensibile, crassum, & vulgari-
 bus quoque oculis notandum : at quæ
 sit fuliginosi unguinis ad textum reti-
 culare proportio, quæ origo, illud tam
 ignotum est quàm quod maximè; &
 quamvis exquisitior acies novaque Na-
 turam tentandi *ἐγχειρήσεις* aliquantò plu-
 ra polliceatur, erit tamen semper, quod
 exquisitissimæ curæ etiam in hac parte
 adjici possit. Colorem Physici pro in-
 cidentia, refractionis reflexionisque
 naturâ commodè explicant, sed, quan-
 do ad particularia ventum est & super-
 ficierum corporalium modificationes,
 ambigûâ minimorum hypothesi facilè
 ostendunt, quàm oculi nostri sint jam
 inde à primâ peccati labe lippientes.
 Ignosces ergo, V. E. si non aliam hic
 certitudinem sum affecutus, quàm quæ
 est à sensu eoque minùs exercitato:
 quos autem inspersimus lusus ingenii,
 eo animo velim accipias, quo accipi
 sua volunt, qui sine ambitione placere
 quàm plurimis student, & minimè mul-
 tos lædere. Sed neque ita fidem ser-
 vare

vare incepto meo concedebatur, ut non eidem oculi, qui in nigredinem erant intenti, ad alia & externum corporis habitum abriperentur; quæque ibi ego vel secundum aut contra proportionem invenirem, simul hoc libello indicarem. Erant verò etiam causæ, cur de Polypo in cadavere hoc reperto, & de materiâ in Pulmonibus nonnullisque rarioribus copiosius differerem, sed quia in habitu manere mecum antè constitui, de hisce, præterquam verbo, quidquam amplius addere religio est. Polypus autem erat Cordis, non falsus & quotidianus, ex coágulo sanguinis, ut Kerckringii ille, sed Malpighii & jam olim Tulpii, planè singularis; vastus, per ventriculi utriusque auricularum venarumque spatia exporrectus; albus vel cineri concolor, certè omni tincturâ cruoris dispoliatus; viscosus, tenax, pelleus, ex membranularum fibrillarumque irregulari infinitoque contextu oriundus, lateribus passim cavitatum & tendinibus Cordis, velut per glutinum

num superficiale, quali attexere lævis-
simo plano fila sua cylindrica araneæ
solent, suspensus; verbo, omnibus nume-
ristam Malpighianæ descriptioni, tam
Tulpianæ isti similis, ut nihil esse si-
milis potuerit. In Pulmones abdide-
rat sese materia, jus hesternum esculen-
taque frustra redolens, amurcæ instar,
& copiâ semissem libræ longè excedens,
illa scilicet, quam loborum compres-
sione ex arteriæ vulnere extorsimus: in
nudatis quidem bronchiorum ramulis
nihil observatum est noxæ, præter den-
tis molaris grandiore partem, in isto-
rum unum infixam; unde conjicere po-
teram, cum materiam adeo jejunam,
tum dentis hocce frustillum vi & jam-
jam morientis negligentia in pulmones
descendisse, nam, quòd sine teste obie-
rat, aliud temere suspicari non licuit.
His itaque missis ad propositum venio,
& quam mihi ipse olim exercitationem
præscripsi, atque hortatu Amplissimi &
Excellentissimi Viri, D. D. JOELIS
LANGELOTTI, Archiatri famigeratis-
simi,

simi, Fautoris mei venerandi, perfeci, eam tecum communicare, CAROLE DRELINCURTI, omnino necessarium duxi.

Caput Primum.

DE Habitu Corporis Æthiopici observata.

Proportio examinatur ostenditurque in plurimis bonam esse, in nonnullis tamen etiam vitiosam. In Capitis figurâ quid laudari, quid damnari debeat; pectoris truncique proportionem optimam visam, certè meliorem, quàm esse nostrarum solet, quæ stricturâ pectus ventremque corrumpunt; tumorem gulæ & colli brevitatem cateram quoque proportionem fedare. Difficulter admodum de verâ proportionem membrorum judicari posse.

IN staturâ ergo corporis feminini, quo aliorum etiam Æthiopum æstimare proportionem decrevi, miram primò notare visus sum membrorum congruentiam; nam urbana planè erat atque elegans articulorum musculosorumque ventrium proportio; superfi-

cies

cies ipsa mollis atque expolita, macularum nævorumque immunis; longitudo profeminâ decora, in viris minùs iusta; nam, quod de Æthiopibus jam olim Cambylis tempore narrat Herodotus, eos omnium mortalium longissimos fuisse atque fortissimos, id neque hodie in Africano tractu, nec apud nos deprehenditur: utrum, quando ex calido orbe aëris nostri subeunt inclementiam, in angustiores paulò orbem contrahantur, definire non audeo; est autem haud improbabile, natalium diætæque mutatione, tum, quod maximum est, athmosphæræ gravioris incubitu reprimi illam spiritus vegetativi potentiam atque adolescendi impetum abrumpi. Ut jam quoque appareat, hoc hominum genus non tam propter figuram, quæ aliàs coprias, nanos & quidquid est inficetiarum commendare Magnatum ludibriis solet, quàm formæ colorisque raritatem in Europæorum adscisci delicias. Caput ipsum, ut ad partium accedam ex-

men rotundè conglobatum, durum & refertum tinniens, pilis ornabatur laneis, angulosis, rigidioribus & penè fetosis; verùm ita capitis respondebant circumferentiæ, ut rotunditatem ejus minùs offenderent, cum in aliis nationibus capitis illam figuram crines plerunque vel fædant aut occulant. Nihil certè in proportionem ibi insolens, quippe, cum calvities probrosa sit, comarum promissarum & huc illuc volitantium longitudo indecens, in hisce miram rotunditatem & harmoniam cum calvariâ Natura affectavit, &, cum rigidior atque in rectum porrecta cæsaries minus habeat gratiæ, crispavit eam in gradus, nec descendentes nimis, neque nimis etiam breves. Equidem opus non habuerunt Æthiopes promissis & longis capillis, ut collapsas fulcirent genas; subjectâ enim densâ pinguedine, quam toto alunt corpore, mirificè rotundatur ossium eminentium asperitas; hoc enim est, quod longis & cum basi vultus hori-

horizontalibus capillis sibi quærunt
 Barbatuli, & quibus majestatis specio-
 sæ cura est. Respice picturas, quibus
 Veneres Cupidinesque exprimere vul-
 gò solent; mollem ibi invenias vultus
 rotunditatem, cingentibus eum paralle-
 lo orbe capillis; in Furiarum contrà
 pictâ immanitate, tristem angulosam-
 que faciem, certante cum tali vultus
 horrore crinium vagâ & serpentinâ
 longitudine. Pectus erat modicum,
 & mammæ, nam pridem pepererat,
 lacte uberi repletæ, non adeo vastæ,
 ut feminarum istæ, quas in Mosambi-
 câ Africæ Linschotanus observavit. La-
 titudo aut circumferentia, quâ in hy-
 pochondria aut ventrem Thorax desi-
 nit, neque laxa nimis nec nimis adstri-
 cta, ut virguncularum esse solet, quas
 matres curant junceæ ut sint, quæque,
 ut medium ventrem velut in filum con-
 traxerunt, mox deinde inferiùs in in-
 tempestivam abeunt uteri ampullam,
 id tantum virginali curâ consequentes,
 ut difficiliùs matres fiant. Luxantur

profectò per fasciarum linteorumque
 stricturas pectoris articulationes, &
 spirandi illa facilitas, quâ robur con-
 stat parturientium, cum tempore atte-
 ritur; diaphragma, præcipua respira-
 tionis pars, non complanari satis, nec
 propellere subjecta intestina uterum-
 que præ rigore illo, jam à juventute,
 imò teneris, contracto, potest, unde
 labor ille enitentium vi vexatus matura-
 rè fatiscit, & nisi infantis robur natu-
 raliumq; in hisce plagis humiditas diffi-
 cultatem compenset, etiam in totum de-
 stituitur. Quare laudare habeo feminæ
 nostræ & Barbararum institutum, quæ,
 ne quid in fraudem Naturæ, aut pro-
 priam valetudinem committant, ana-
 logiam illam membrorum liberali cura-
 tâ tuentur, & ad matris nomen de-
 cusque honestè sustinendum tutio-
 rem eligunt viam. Venter erat pas-
 sim mollis & idoneo tumore insignis,
 totius etiam dorsalis tractus, natium
 blandè assurgentium, cum femorum
 &, quæ his subjiuntur, tibiæ egre-
 gia

gia proportio, teneritudinem musculorum (neque enim tam vasti videntur, ut in nostri orbis feminis) replente pinguedine mirificè densâ, quippe quam glutinæis musculis instratam vidimus ultra manus latitudinem. Suræ non adeo ventriosæ, & ipsi gastrocnemii exiliores, plurimum quoque debebant pinguedini superinjectæ; certè toto passim corpore relicta à musculorum commissuris tendinumque finibus angulosa interstitia omnis pinguedo sic temperabat, ut æqualis passim extaret superficies. Ex quibus habitus istius proportionem elucescere satis superque existimem; nam, cum nihil tam blandum atque amicum contrectanti, quàm quod molliculum & rotundulum, nihil contrà vel oculorum aut tactus experimentis infestius, quàm quod acutum, asperum, sensum adeoque omnem, propter inæqualitatem, horridiùs afficiens, haud ineptam censeas superficiem, tam omni ex parte sibi similem. Miraberis autem, Exc. Vir, in tristi ha-

etenus damnatoque corpore laudum
 titulorumque me quærere materiam,
 sed cogita, quæ nos adeo in istis tum
 in aliis adspernamur, plurimum à co-
 lore & præjudicio morali trahere. La-
 tent tamen hic quoque vitia jamjam
 dicenda, nam, ut nihil in nostris un-
 dique beatum, ita neque hic inviolata
 est corporis proportio: imò in ipso
 capite, à rotunditate, firmitate & pi-
 lorum figurâ modò laudato, manifesta
 est sæditatis nota, narium nimia depres-
 sio & latissimus circa basin hiatus: nem-
 pe, nares sunt veluti limbus extra pla-
 num vultus projectus, cujus uti iusta
 proportio ad decus & ornamentum,
 sic acutior & gibbosa vel arcuata cavi-
 tas ad dehonestamentum plani mode-
 stè tumescentis est comparata; ipsa de-
 indē narium basis retusa, illepidum præ-
 bet cavitatum adspectum; quæ ipsa ta-
 men hiatus latitudo, si Physiognomis
 impunè creditur, signum est roboris
 & patientiæ in labores sufficientis, uti
 id quoque improbo, & plus quàm pi-
 strinensi

strinens laborē in Sacchari confecturâ ostendunt. Videtur utique aer undique collectus, & liberaliùs in hiatum illum receptus, latera per respirationem tensionemque diaphragmatis validiùs firmare, & artuum simul musculorumque motum in majus augere. Atque hinc sine dubio est, quod Æthiopes feminae πρὸς τὴν ἀνακλινοπάλην, ad sacra sustinendum pygiaca, qui ipse etiam est musculorum labor, sint durissimæ & quasi inextaturatæ, & quod amant, impensius multò quàm nostræ deprecant. Accedunt deinde in deformitatis argumentum repanda labra, dentium illas series, quas tegi satius erat, nimis apertè ostendentia. Colli autem brevitās & gulosus tumor cæteram proportionem haud dubiè vitiabat, quod cum à crescente ibi pinguedine, aut cartilagineum asperæ arteriæ configuratione esse conjicerem, offendi in ipsâ sectione membraneum glandulosumque corpus, scuto cartilagineo, quâ patet, obnatum, sphaericum & duarum uncia-

rum æquans diametrum, justam gulæ prominentiam corrumpens. Equidem, nisi me omnia fallunt, is ipse tumor est, qui montanis gentibus à nivatis, ut ferunt, aquis in immensum excrescit, Bronchocele nominatus, magnâ pulcritudinis fiduciâ: quod an omnibus perinde Nigritis eveniat, an vero casu & ad cœli mutationem huic uni feminæ obtigerit, dicere nec audeo nec possum; saltem consimile ego tuber olim in canis vetuli gulâ deprehendi, & si quid rectè oculis meis usus sum, videor talem colli eminentiam in aliis quoque Nigritis adnotasse. Ut adeoque sine labe non sit hæc proportio, & præter vultus perversa lineamenta, etiam gulæ iste tumor figuram corporis depravet, nisi fortè Nigritarum quoque sit fatum, quod est montanorum, & uterque pari invidiâ in tumore illo exultent: quò constet agrè admodum judicium de pulcritudine aut deformitate gentium ferri posse, & suam, cuique formam, utut incon-

cinnam,

cinnam, maximè placere. Est hoc proprium plerisque nihil rectum putare, nisi quod sibi Natura indulsit, etiam mancum & inutile, quasi alterius minus studiosa; nonnullis contrà grave & molestum, quam acceperunt sic satis justam aptamque membrorum seriem, intemeratam servare; hinc suis ipsi manibus & ferro proportionis illum decorem fadant, lacerant, &, quantum possunt, distorquent, quod Barbarorum esse, imo & aliarum gentium, institutum jam vulgò innotuit. Dubitare autem amplius non possum, ut est naturalis quidam & modestus sui amor, quin in illa narium figurâ, in bilibribus & repandis labris, in illo capillorum sese crispantium rigore Nigritæ valde gaudeant, & prærogativam sibi deberi existiment. Verùm, ut semel aliquid de Corporis figuratâ proportionē decernatur, seponenda sunt partium studia, & cum ipsâ ratione calculus ineundus.

Caput

Caput Secundum.

Tentatur habitus externi seu figura corporeæ proportio. In quo consistat pulcritudo; eamque vel veram esse & in naturali harmoniâ fundatam, aut imaginariam, id est, virtutis aliquâ aut utilitatis specie commendatam, experimentis variis, etiam Macrocephalorum isto, decernitur. De Nigritarum habitu exemplo priorum fertur iudicium.

Primùm autem, quod pace Tuâ liceat fecisse, haud ineptè pulcritudinem omnem in veram atque imaginariam distinxerim; quarum illa numeris & ratione constat mathematicâ, atque in solâ figurarum *Quantitativa* atque ad usum habitudine, hæc præter opinionem nihil habet, proportioni veræ persæpe adversa, & tamen utilitatis aliquâ vel fortitudinis specie adumbrata; quod adeo verum est, ut Barbarorum nonnulli figuram haud inconcinnam nacti, non herbarum tantum succis & glutine, sed & vulneribus deturpare pul-

pulcritudinem duxerint, herōicam scilicet & patientiæ militaris testem: quare plurima, si secundum veram proportionem æstimentur naturâ & proportionem fæda, opinione pulcra fiunt; quod ut melius constet, expende mecum, quàm singulis nationibus peculiare sit membra quædam artificiosius fingere, aut si Dīs placet, in speciosam pulcritudinem corrumpere; nam, cum aliam & pejorem figuram arte inducimus, Naturæ hoc ludibrio fieri existimandum est. In Auribus nobis quoque familiare, eas capitis plano profundius adstringere, quas Natura laxius semoverat, magis certè imaginariæ quàm veræ pulcritudinis studio. Nimirum, non de nihilo est à Naturâ consultum, ut aures prominerent, atque ex latiore basi in angustius foramen cochleato ductu volverentur, quò sic sonorum species auribus molli-ter acciderent, & undulans usque aër, tam diversis prominentiis tabulatisque allisus, in se rediret fortior; sive etiam,
ut

ut iter illud specierum à proximis & peregrinis aëris tincturis servaretur immune. Quid quod hunc defectum nonnullæ gentes manifestè prodant, dum factis in subsidium instrumentis, Hispani *Sarbatana* vocant, latissimum illum & exstantem auris limbum, olim præposterâ curâ collapsum, restitunt. Sanè Galenus etiam in hoc prætextos esse lobos existimavit, ut specierum multiplicarent distinguerentq; , sonos, ὅτι ἔ μόνον, inquit, ἀποκωλύσειν ἔμελλε τὰ πρὸς τεταγμένα τὴν τῆς Φωνῆς ἐμπλήσιν, ἀλλὰ καὶ πρὸς σπληνὸς π. Ut ambigere debeam, an Physiognomi jure arbitrentur, quando prominulas extra caput aures cujus, nescio, animi prædicent argumentum; cùm id Naturæ fiat instituto, & vis quædam sit efferentes se se lobos arctius compescere, ac molles specierum avertere illapsus: sed tamen hæc fieri nunc videntur vel in physiognomorum gratiam, ne productiores atque auritæ partes suspectam redderent, meliorem nostrî substantiam; sed verò jam antè Poëta,

Auriculas Asini quis non habet?

Est in hoc Russorum & ipsorum Æthiopum mos magis integer, quam nostrorum, quippe quibus pars ista liberaliùs propender, nullâ olim vi adstricta; ut nesciam, an veræ sit pulcritudinis indicium, aures gerere ad caput acclinatæ & veluti planas, quod tamen consequuntur nutriculæ galeris atque ligaturis, quibus jam à primâ ætate caput & ipsas aures adstringunt. Certè nec Majorum olim nostrorum, nec aliarum hodie gentium ea est insania, ut, quod Natura in propatulo esse voluit, tanquam probrosum abscondant, aut invertant. Verùm non in levibus tantùm hæsit vitiandi illud studium, sed ad majora quoque, & ipsam corporis nostri ἀκρόπολιν, caput, transiit; nam, quasi puderet naturalis proportionis, in longum & acutum illud fastigiare laboriosè conati sunt, qui apud Hippocratem memorantur, Macrocephali, turritæ Cybeles imitatores, τὰς μακροτάτην ἔχοντας κεφαλὴν γυναικείας ἢ γέμνοι; ubi

ubi apparet generositatem raptam fuisse in materiam pulcritudinis, & pulcrum id visum, quod fortitudinem haberet conjunctam; paulò aliter atque hodie præposterâ opinione apud Americanos, carnes proprias cutisque fibras acie diffindere, mox asperrimis crudelibusque succis distinguere, pulcrum habetur & oppidò elegans, dummodo fortis sit & virilis animi argumentum, dixerim, etiam carnificis: hi verò quid agunt aliud, quàm ut affectatâ animositatis laude sibi Naturæque barbaro exemplo imponant. Recensentur apud Arrianum in Periplo maris Erythræi, nationes mirè ex vultu deformatæ, ἵππιον ὤσσωπι, μακρον ὤσσωπι, πλατυ ὤσσωπι, quas primùm arte hanc sibi fictam pulcritudinem adscivisse est verisimile, quemadmodum illos etiam, qui eodem loco vocantur ἐκτεθλιμμένοι τὴν ῥίνα; videtur enim vis quædam verbo isto designari. Plurimi, qui in veterum excutiendis scriniis operam navant, omnes gentium, quæ in
ultima

ultima terrarum rejectæ sunt, descriptiones superstitiosæ vanitatis damnare sustinent, &, quæ navigantibus non patent loca, ea continuo monstris, spectris, & quibus non *μορμωλυκείοις* obnoxia credere, miserum arbitrantur atq; inconsultæ mentis argumentum; verum ut liberali & plusquàm poeticâ indulgentiâ ab Historicis vetustis in hac parte sit peccatum, tamen negandum non est, multa in ultimis & novis terris reperiri, quæ aliis peregrina videantur & in monstris habenda: nam, ne quid de Æthiopum variis quæsitisque labrorum, narium, genarum, auriumque corruptelis dicam, in Americâ singulis ferè gentibus peculiaris est & patria corpus lacerandi consuetudo, & apud ipsos Brasilianos vulgatissimum, infantum, ut primum lucem adspiciunt, nares propriis manibus *ἐκθλίβεσθαι*, retundere, fingere, & ad imaginariam pulcritudinem (adeo venustatem in similitate quærunt) violentiâ disponere. Nigritæ autem nostri sunt illâ etiam parte

velut ἐκπεθλιμῶροι, sed cui nullum subesse artis mangonium videtur, solâ naturâ rem conficiente, nisi fortè olim adhibita vis in consuetudinem migravit. Apud Hippocratem verò ista Macrocephalorum generatio, partim artificio, partim Naturæ adscribitur; nimirum, caput, in quod descendere nascentes solent, molle adhuc & tenerum, manibus primum formare, deinde fasciis constringere sic solebant, ut alimento in longitudinem potius quàm latitudinem stricturâ expresso, ordinaria proportio viticaretur, fastigiant se sensim ossium frontaliū compage: hæc deinde consuetudo sæpius frequentata, vel viribus imaginationis aut ideali seminum impressione, in naturam transiit, & Macrocephali sine labore facti sunt. Nec est, cur quis vereatur, ne osseum galeatumque caput illam vel manuum aut fasciarum stricturam admittat, cum plurimis hætenus exemplis sit compertum, nascentium ossa motus omnis impressionisque esse satis

tis 'superque capacia; nam caput' quidem, cujus ingeniturâ præcipuæ sunt partes, si non disjunctum in commissuris, at saltem leviori cõalitu sibi insertum, & in ipso, quo coaluit, limbo, cartilagineum vel membranosum; nequaquam refugere manus violentiam potest; quod adeo etiam bonæ fidei obstetricibus in difficiliore partu observatum, ut sæpe contorta capita & stringentes sese commissuras manibus refingere necesse habeant; imo ego perpetuum hoc esse arbitrer, neque aliter partium ægrè cedentium rigori occurriri; quomodo enim orificii uteri interni pusilla cavitas tam vasto corpori æquetur, nisi mobilis & obnoxia membrorum articulatio, maximè ipsius capitis, complicari se patiatur, mox naturali spirituum nisu pristinæ redonanda formæ, aut, si nimia siccitate ægrè cedentis osculi aut vaginæ sit penitus intorta, artificii manu corrigenda: verùm hac ipsâ etiam manuum vi contingere potest, ut ossa durius tractata,

& in obliquum versa, quam tum ab initio acceperunt impressionem, semper retineant, rotunditasque illa gibbis, fastigiis, tuberibusque insolentibus defæderetur, & hinc miræ capitum membrorumque formæ, olim ludibrio Physiognomorum servituræ, oriantur: non enim existimem, figuras tantum seminales, sed & istas, quæ inconsideratâ tractatione & violentiâ jam natis superveniunt, facultatem mores animumque mutandi satis efficacem habere, uti ossium gibbus obliquitasque à casu oborta liquidò ostendunt. Sed non capitis solum fuit hoc fatum, artificio corrumpi, verùm etiam pectoris & ventris, nam istud quidem fasciis & ligamentis, quibus mulierculæ etiam in serâ ætate utuntur, jam maturè & in infantiâ veram proportionem amittit. Poterant autem gentes, quibus semper fluxæ laxæque vestes placuerunt, arguimento esse, Naturam sibi relictam proportionis studiosiorem esse, quàm artificio subactam. Novum non est apud nostros,

nostros, ossa vixdum solidata per lin-
 teorum stricturas peregrinam nancisci
 formam, & incurvari pedes, & planos
 reddi atque acuminatos, aut quo, ne-
 scio, modo affectos; nam hic quoque
 Chinenſibus, subtiliſſimæ aliàs genti &
 proportionum ſtudioſæ, aliquid præter
 naturam quæſitum. Imò, ſi fas eſt
 dicere, puto autem fas eſſe, vereor
 ne plerique Europæi, ſaltem, quos com-
 tiores habemus & formæ ſervientes,
 pedum juſtum tenorem ſtructurâ iſtâ
 calceorum perdiderint, quippe quos
 adeo urunt, ſollicitant, ut intercepto
 alimenti libero comineatu unguium
 monſtroſas dolentesque figuras & cal-
 loſos perioſtii tumores, tanquam in pœ-
 nam alere, & uſum membrorum amit-
 tere ſint coãcti, imò velint, potius
 quàm ut ab imaginariâ & miſerabili pul-
 critudine deſiſtant: quæ pedum in-
 tempeſtiva cura, ut ab opinione eſt,
 ſic non omnibus perinde nationibus
 probata. Poſſe autem optimo cuique
 & proportionis gnariſſimo pulchra vi-
 deri,

deri, quæ per se frivola sunt atque inepta, Italorum facile ostenderint exempla, quibus irrelectos & ferinos ungues in venustatis rapere argumentum consuetum est. Hoc Virginibus alibi, hoc Nobilibus, velut insigne conditionis deberi obstupui; & tamen, cum monstrem vulgò, cum Harpyam aut Canidiam designamus, in feritatis signum, unguium longius projectorum hamosam curvitatem, &, quæ sunt tristiora, opponere solemus. Putaverim autem longè melius esse & Naturæ convenientius, ludibria originis intortasque formas in speciem pulcritudinis extollere, quàm, quæ ipsi in fraudem tam benignæ Matris admisimus, laudare & congenitâ proportionem potiora habere. Hinc Alpini, & qui sunt in Septentrionis ultimo angulo Samogithæ & Tingoësi (nam etiam his gulam ita intumescere observatum) gentilicio errore ex ipso tumoris, hoc est, deformitatis incremento, pulcritudinis æstimant prærogativam, &, quamvis se præ aliis Europæis

Europæis beatos prædicent, beatiore
 tamen inter se mutuò istos, qui longis-
 simum illum alunt maximèque proten-
 tum, velut lautius pinguiusque Naturæ
 donum, in hoc tamen istis tolerabilio-
 res, qui nativam proportionem arti-
 ficio corrumpunt. Verùm enimverò,
 quoniam Natura omnia ad usum dispo-
 suit, & catenata membrorum series
 non nisi ad actionem est comparata,
 admodum probabile judico, veræ ju-
 stæque proportionis formam eam esse,
 quæ, etsi destinatum opus non assequa-
 tur, tamen illud non offendat. Sunt
 nonnulla in speciem pulcra, quæ, si
 ad usum referas, haud parum ei offici-
 unt; & talis est profectò aurium ad
 caput complanatio, hypochondriorum
 exilitas virginibus affectata; in quibus,
 si accuratè rationem ineas, neque ve-
 ram pulcritudinem neque illam ad
 usum, quippe quem vitari alibi osten-
 dimus,prehendas; in harpacibus au-
 tem ungulis, in tenuitate illâ pedum
 fastigioque capitis, deformitatem me-

ram, omnia præter proportionem & ad usum malè comparata. Unde apparet Æthiopissæ nostræ corpus figuram habuisse non indecentem, &, si quæ fuit in lineamentis subtilioribusque absurda proportio, eam non debuisse continuò reliquam pulcritudinem infamare, quando nec Europæis omnia sic respondeant, ut non hac vel illâ parte vitium reperiatur, si non origine, at saltem studio violentiâque contractum.

Caput Tertium.

Attingitur nigredo: eam variam esse, nec solis Nigritis reservatam, exemplo Afrorum, Ægyptiorum & in septentrione Tartarorum, definitur. Chusæus non pro Æthiope, sed Saraceno, plurimarum linguarum consentiente nomenclaturâ. Æthiopum nigredo singularis, non habitu tantum Corporis, sed & formæ varietate commendata.

Sed

SEd jam properare me jubes, Vir Exc.
 ad Nigredinem, eamque, si quid in
 se habet dignum examine, curiosius de-
 cernere. Ut verò Nigredinis natura me-
 lius intelligatur, notandum venit, non
 unum esse ejus significatum, & modò
 ad hunc, modò istum colorem, non
 omnibus numeris nigrum, extendi:
 scio, aliter hodie ex verioribus princi-
 piis refingi colorum scalas, hìc tamen
 certa me ratio urget, cur malim veteri
 & pervulgato axiomati insistere, esse
 nimirum duos colores primitivos, Al-
 bum & Nigrum, ex quorum misturâ
 cæteri omnes proveniant; nempe, vul-
 gò receptum est, & à multâ retro an-
 tiquitate, corporum superficiès, prout
 plùs minùsve illustrantur, vel ad albe-
 dinem aut nigredinem referre; ut adeo
 ex hac hypothesis non albi tantùm, sed
 & nigri positiva seu essentialis ratio esse
 videatur. Quemadmodum autem al-
 ba in genere vocantur, non quæ ab-
 solutè talia, sed quæ plurimum ex albo
 trahunt, sic nigra etiam nominari so-
 lent.

lent, quæ parum candori, plurimum nigredini debent; estque hæc κατέχρησις tam familiaris, ut nullis non nationibus & in omni colorum genere frequentetur. Notum tibi est, τὸ ὠχρὸν, χλωρὸν, cum apud Hippocratem, Theophrastum, tum maximè Poëtas latisimum habere significatum, & μέλαν esse, quod obscurum tantum, quodq; ἰοειδὲς, violaceum, hanc etiam Græcorum licentiam imitante Poëtâ in illo,

*Sunt viola nigra, sunt & vaccinia
nigra,*

Plebis quoque judicio invaluit, ut, quando medius color exactè determinari non potest, ad primitivum aliquem, velut sequestrum, recurratur; quin imo Geographi in gentium designandâ naturâ licenter admodum omnem colorem vel album aut nigrum nominant, ne ipsi quidem septentrioni parcentes; ubi tamen memorata nigredo longè ab Æthiopum illâ distat, imo Europæorum candori propior est, quam Æthiopum atritati; adeo leviculum ab albo vernu-

vernuloque colore discrimen nigredinis nomine venire solet. Russos Tartarosque in albos & nigros distingui cognitum est, & tamen, qui nigerrimi omnium sunt, Olivæ non excedunt fuscitatem, ut fideli navigantium observatione constat. Africæ & Europæ habitatores quantum à se colore differant in confesso est, & tamen istis nigredinis character, hisce albedinis tribuitur; verum tot hic sunt colorum lusus, ut, qui in Europâ degunt, nonnullis sæpe Afris magis nigrescant, contrà, qui in Africâ, Europæis quibusdam sint candidiores: certè in Septentrione Americæ reperit Forbifferus nigriores multò homines, quàm circa meridiem; & in Hispaniæ procurrentis angulo Siciliæque recessibus obscurior habet color, quàm sub eodem Asiæ aut alterius plagæ parallelo. Mauri deinde, & qui Lybiæ incolunt arenas, licet cum Europæis comparati nigri videantur, tamen sibi relictî candidiores sunt, ad extremum fusci; desinit enim Maurorum illa obscuritas,

securitas, subinde iterum illustrata, in
 damnatam Æthiopum nigredinem, rur-
 sum ad plagæ mutationem defecturam;
 nam qui ultra eum tractum habitant,
 in promontorio Bonæ spei aut S. Lau-
 rentii insulâ, paulum de Æthiopum
 isto colore remittunt, magis deinde fu-
 sci & Mauris similiores, non tam ullâ So-
 lis quàm originis injuriâ: omnes tamen
 hi nigri appellati, cùm qui interno ma-
 ri & mediterraneis impositi sunt, tum
 qui ultra Lybiæ arenosa, externo &
 Æthiopico oceano admoventur, Ara-
 bes, Ægyptii, Mauri, Æthiopes. Equi-
 dem Arabes nigros vocari testis est ma-
 gnus Bochartus in præfatione ad geo-
 graphiam sacram, idque sacrorum indi-
 cio; nam ad Jeremiæ ista *nunquid mu-
 tabit Chuseus cutim suam?* hæc oportu-
 nè addit; *Saracenis color est inter fulvum
 & nigrum, ut Vartomannus autor est, qui
 diu Mecha habitavit, quò etiam faciunt
 hæc Chaldæi paraphrastæ Cantic. 1. 5. Ni-
 gra fuerunt facies eorum, ut filiorum
 Chus, qui habitant in tentoriis Kedar:*
 hoc

hoc verò est, in Arabiâ, ut alibi demonstrat gravissimus scriptor. Nimirum omnes, qui fusciores aut ustulatum ex parte referunt vultum, nigri sunt habiti, & inter ipsos maxime Chusæi seu Arabes, sive quod pertinacius tenerent hunc colorem, ut ex illis Prophetæ apparere videtur, seu, quòd paulò obscurior fuscitas eos reliquis eximeret, non Æthiopibus, cum istis enim nullam hætenus habuerant consuetudinem beati & pro tempore illo humaniores Israëlita, sed Asianis & Ægyptiis; nam his quoque nigredinis inhæsisse notam, argumento est proverbialis Ægyptiæ nigredinis memoria. Ægyptios certè pariter & Æthiopes, in immensum tamen dispares, Herodotus appellare ausus est μελάγχρους καὶ εὐλότεις, imò Hecsychio τὸ αἰγυπτιῶσαι μελᾶναι significat, & minaci olim senario jactatum,

χεῖραν δὲ τὴν σὴν ἥλιος λάμπων φλογὶ
αἰγυπτιώσει.

Sed & eò spectat illud festivissimi Plauti in Pænulo,

Jam

*Jam pol ego pugnis totam faciam,
ut sit Morula,*

*Ita replebo atritate, atrior multo
ut fiet*

*Quàm Ægyptii, aut qui cortinam lu-
dis per circum ferunt.*

Non est autem, cur hic ad terram Ægypti nigram, vel ad aquam, quæ propter terram nigra est, respiciamus, cum illius plagæ incolæ spontè ad nigredinem propendeant, illam nempe, quam vulgò sub lato significato comprehendimus: & deinde, ne quis ex Plutarchi illa synonymiâ, quâ Ægyptum Hermochymiam aut Chemiam appellat, suspicionem colligat diversam, eâdem passim invidiâ interpretes, modò ad Chammi personam, modò ad appellativum Hebræorum nomen, *Chum* i. e. nigredinem, vocis illius ἔνυμος referre sustinuerunt; quo etiam argumento permotus utrique nostrum cognitissimus Abrahamus Berkelius, doctissimus ille græcæ literaturæ & nuper Stephani Byzantini explicator, in Plutarcho non

χημία

χημίααν sed χυμίααν legendum esse censet
quàm probabili conjecturâ. Sunt er-
go nigri Ægyptii, est

Nigris Meröe facunda colonis,

Sed aliâ paulò ratione; isti enim mo-
dicam obscuritatem, fuscam nigredi-
nem, hi absolutam, & quanta in homi-
nem cadere potest, Æthiopicam con-
secuti sunt, verbo, colorem noctis; ita
enim Petronii fragmentum de Meröi-
ticâ sobole, quæ olim Alexandrinarum
mercium pars non ingloria:

Tinctus colore noctis

Mann puer loquaci.

Nolim autem quenquam hîc opinari,
quando Æthiopem aut Nigritam no-
mino, ad colorem me tantum respi-
cere, sed ad illa quoque vultus linea-
menta, tumorem labrorum densissi-
mum, illud retusius narium planum,
illos capillorum laneorum crispato-
flexus, denique formam illam corpo-
ris gentiliciam, tamque peculiarem, ut
vix alibi consimilem reperias: atque ita
Λακοαιθιοπες Ptolemæi, ita *Dandos Pur-*
chasi

chafii (sic vocantur, qui inter Nigritas albi nascuntur) etiam in candidâ pelle Æthiopes censendi sunt, cum character ille corporis & vultus omnium sit unus.

Caput quartum.

Qualis propriè sit externa nigredinis Æthiopica facies, disquiritur; videri nec letum, nec tristem nimis colorem; profundam nigredinem, si splendore illustratur, minùs esse lugubrem; quæ deinde sit nigrorum differentia, quis superficiei & villorum contextus, exemplis declaratur;

AT nunc necesse est colorem accuratius inspicere, non imaginatione aut præjudicio, sed vero sui elogio tristem atque inamænum; nigra certè omnium fere gentium consensu invisa, atque ipsæ infernales poenæ solo nigredinis horröre damnatæ. Si tamen hic Æthiopum iudicio standum est, perinde omnia-

ominalem isti censent albedinem, ac nostri nigredinem, & in suo colore triumphant & mirè gaudent, imo & turpia quæque candidissimo, ceu inauspicato colore, designant: fateor quidem non deesse suam nigredini laudem, &, quod aliis negatum est coloribus, haud temere fuci indigere; sed tamen nec ipse probare possum, quod triste est naturâ, & lucis orbitate caliginosum: sed, ne quid hic etiam ab anticipatione mentis oriri videatur, agè, demonstre-
mus illam nigri proprietatem. Com-
pertissimum vulgò est, & ex opticâ
ratione, nigra lucis radios absorbere,
paucos admodum reflectere, adeoque
superficieï gratiam vel nullam ibi esse,
aut, si quæ est, occultari, ubi contrà
in albedine nudæ superficies pro radio-
rum variâ modificatione vividè se em-
phaticèque ostendunt. Concipere li-
cet nigrorum superficies infinitis & pro-
fundis scrobiculis seu acetabulis exca-
vatas, in quæ radii undique collecti de-
tonent, absumantur & vim reflectendi

D

amittant;

amittant; alba autem sic comparata, ut lucem semel admissam multò etiam reddant validius, & à convexis fornicatisque superficieculis repellant; quâ certè radiorum actione necesse est in spiritibus opticis, affini lucis substantiâ, consimilem tremulumque vibrationis motum excitari; qui deinde in animo sensum pariat cùm vividiorum tum lætiores; illam enim spirituum apud nos invicem analogiam esse quotidie discimus: id verò nunc in Nigritarum gratiam adferre debeo, non omnem nigredinem perinde esse tristem, atque, ut Poëticâ utar phrasi, ἐρεβεννὸν, sed esse etiam, quæ splendore vivificetur, & in tantum reflectendi vim habeat, albedinis æmula; nam, uti candidissimorum corporum politæ lævigatæque superficies nigredinem referunt, sic contrà nigræ ex profundioribus scrobiculis in sphærulas aut colliculos elatæ alborum imitantur splendorem, fiuntque adeo levi ex causâ eodem in subjecto diversæ luminis determinationes. Et verò
nec

nec alba omnia ita pura, ut non etiam vehementiore, quàm ferre oculorum cognata lux potest, reflexione spiritum perturbent visumque corrumpant. Nives sanè, albisimum corpus, quæ crystallinis micationibus, & speculari, hoc est, potentissimâ superficierum convexarum reflexione, spiritus istos, admodicæ albedinis sensum constantes, velut in *ἐκστασι* rapiunt, regularem eorum & opticum motum tumultuariè evertunt, &, quod à nullo adeo colore evenit, visum depravant. Propterea etiam Amantibus informarum delectu non nuda placet albedo, non pallida aut cadaverosa, virginibus in chlorôsi familiaris, & tamen, pudet dicere, in commendationem vultus sæpe quæsitâ, sed splendida illa, quæ crystallinâ niveâque reflexione spiritum opticum, & ex eo animum confundit atque mancipat: equidem tam insidiosa res est virginâlis albedo, ut vel in statuis picturisque expressa nonnullorum provocare amores possit, & in sanctissimo quon-

dam loco provocarit. Per ejusmodi quoque splendorem, mutato superficiei habitu, nigris aliquid gratiæ accedere morosamque excuti tristitiam dubitandum non est, & esse splendorem cutis in Æthiopibus, quasi argenteum, qui nigredinis elevet ignominiam. Holoserica in profundissimâ nigredine propter splendorem, qui à superficie & scrobiculorum limbis resultat, aliquid promittunt læti, &, prout est radiorum incidentia, aut villorum sphærica protuberantia, candorem utcunque repræsentant; quare à funeribus etiam abesse solent, suffectis in eorum locum asperis, striatis & rigidioribus pannis, quique omne lumen, ceu lætitiæ materiam, scrobiculis suis & hauriant & suffocent. Itaque, si hisce exemplis æstimare Æthiopum nigredinem æquum est, satis est causæ, cur eam lætiores appellemus; nam & refulget splendidè, & molliciem holosericorum vel superat, aut certè assequitur; ne jam dicam, ut alibi apparebit
subject.

subjectæ cutis rubore sic temperari nigrum istud & fuliginosum reticulum, ut aliquid etiam ex illo non obscure trahat. Nec tamen opinor præferendum esse hunc colorem aliis, nisi quis in nigris, tristibus, ipsa denique nocte deliciis quærat partes; imo, nec ipsi Nigritæ, licet aliquibus indiciis constet eos vernaculo colore valde teneri, adeo eum cæteris proponunt, ut non variis adscitisque ex herbarum genere pigmentis habitum illum studiosè & quasi in pœnitentiæ signum obducant, Faunorum instar

*Sanguineis ebuli baccis, minioque
rubentes,*

ut de Nigritis in Zoffalæ & Melindæ oris memoratum.

Caput Quintum,

Mollicies cutis Æthiopica inusitata & holoserica notatur; ejus causæ illustrantur, exemplo florum & canum ex insulâ D. Thoma. Singularis observa-

tio de calore & transpiratione istorum animalium.

R Arissima verò est, quæ cum nigredine istâ conjungitur, cutis mollicies, & initio quidem horrorem contrectanti incutiens, mox tamen assuetæ manui speciem exhibens mollissimi panni, in vivis majore paulò calore, in mortuis frigore comitata; ita ut ingratum toties algorem sentirem, quoties improvisa manus superficiem cadaveris feminei vel attingeret aut percurreret; non dissimili ratione, atque Bombycum ista pellis in lævi & albâ superficie horridiusculum frigus alere videtur, mox iterum ad asperiores striatasque cutis eminentias defecturum; exuviarum enim longè major esse calor solet, quàm renatæ subtus pelliculæ. Non te moretur hic, Vir Excell. quòd, cum nigredinem in concavâ striatâque superficie eposuerim, idem tamen in Nigritis habitus incredibilis lævoris præbeat sensum, quando ad lumen suffocandum,

secundum, quod est nigrorum, figura illa satis esse possit; ad duram asperitatem præter acumen etiam rigor concurrere debeat: pergamus in hanc rem panni lanei & holoserici exemplo uti, in quorum isto, extra subtegmen elati faciles atque obnoxii villi contrectanti statim cedunt, & ex striatis rectisque fiunt convexi, in tantum etiam nigredine ad candidum splendorem declinante; in illo, rigidiores & propter brevitatem magis renitentes, si non asperè, at saltem minus molliter sentienti accidunt & $\Phi\acute{\alpha}\sigma\iota\nu$ difficiliùs mutant. Talis quoque est florum nonnullorum in vegetabili regno textura, neque per unum tantum, sed varios colores diffusa: equidem, si tactus adhibeas experimentum, in aliorum superficie rigidam & setosam penè duritiem, in aliis mollem & holosericam planè lævitatem deprehendas, & in eodem quoque flore vario lusu alternantem. Est Leucōii lutei species, cū propter coloris illam vicissitudinem, tum strias

maculasque holosericas Botanicis celebrata; est in Violâ sæpe bicolore arvensi, & manifestè in Iride Persica mollis, holosericus, & colore tenuis, Æthiopicus contextus, propter exstantium villorum molliculorum & plus quàm capillarium flexilem convexitatem. Imo, ne manifestiore similitudine causa nostra destituatur, transeas velim ad ejusdem ferè plagæ hospites & populares Canes, quos Guinea mittit aut insula S. Thomæ, depiles istos atque omni ex parte calvos, ab eodem colore Æthiopico & mollicie bombycinâ commendatos; in hisce, si microscopiorum & sagacis conjecturæ ulla fides, cuticulam à subjectâ reticulari & fuliginosâ membranâ, de quâ suo loco dicemus, in infinitos simul villulos, sed molles & tactui cedere idoneos, extolli animadvertes. Unde similem esse cutis texturam in Æthiopibus reor atque in istis canibus, & ab expansione reticuli subcuticularis, in molles subinde nodos aut villos excrescentis,

tempe-

temperari cuticulæ rigorem, & quasi holosericâ superficiei obduci: accedit, copiosam humiditatem, quâ madet cutis Æthiopica, asperum lævorem plurimum adjuvare: sanè, quibus minus succi in habitum colligitur, cute sunt multò & rigidiorè & duriorè, uti Mauris &, qui Mediterraneum accolunt mare, Europæis contingere solet. Id unum nunc patere addam, Vir Exc. ad nostrum etiam propositum ex parte spectans, tantam nempe Canibus istis, sive Afris seu insularis, adesse transpirationis effluviorumque calidorum materiam, quantam in nullo animalium notasse memini, etsi omni aliàs pilorum copiâ calorisque fomento destituantur, & ad nostrum hunc frigidiorè aërem contremiscant. Unde conjeci animalis hoc genus, ad transplantationis commoda (in calidiorè enim temperiem faciliùs abire morborum semina compertum est) & ad naturam Senum frigidorumque refovendam utilissimum esse. Observa-

D s

verat

verat jam olim, & illustri Germanorum Societati indicaverat Celeberrimus meritò D.D. Langelottus, historiam Canis depilis, Epilepsiam in se corporis propinquitate derivantis, ægro in totum liberato. Ut Septentrio nunc quoque Iudicra in remedium admittere possit, & perinde voluptaria sit frigoris morborumque medela, sicut esse caloris & affectuum per frigida animalia in ferventioribus plagis solet. Est nempe Draconum seu Serpentum ibi singularis ulus, qui, dum lævi & frigidâ superficie nitroforumq; effluviorum emissionem cutim percellunt, calorem vehementiorem sanguinisque orgasmum speciosè coërcent, virginalium magna pars deliciarum. Nondum tamen observare potui, num in Nigritis vivis eadem sit transpirationis conditio quæ est in canibus illis, quamvis in eam sententiam ut propendeam, plura suadere videantur, & quod suo loco adducturus sum experimentum.

Caput

Caput Sextum.

Nitor argentei splendoris æmulus unde oriatur in cute Nigritarum. Exigitur corporum nostrorum superficies & peculiaris splendor; deberi eum partim sanguinis effervescentiæ cutim expandentis, parum tensioni spirituum in nerveas tubulosasque cutis vesicellas influentium, tandem etiam rori alicui aut succo superficiem obtinenti, variis experimentis asseritur.

DE Nitore autem, qui in Æthiopum elucescit habitu, mirabile est, eum nostro illo esse vehementiorem, & ut est radiorum incidentia, argentei quoque splendoris æmulum. Alimus singuli peculiarem in hoc corpore lucem, quæ per vultus undulans lineamenta, si accuratè expenditur, vigorem & deliquia valitudinis haud dubiè indicat. At longè est Æthiopum ille splendor

dor nostro potentior, & quasi lævōre
olei conciliatus, qui unde originem su-
mat, nemo facilè dixerit, nisi qui secum
& cum experimentis rationem bene
putârit, quæ ego ex hac parte, quam-
vis exili, & plura desidero & accuratio-
ta. In universum haud ineptum, judico,
deberi illum nitorem, partim spirituum
sanguinisque raritati, partim unguini
cuidam volatili & lentè per cuticulam
diffuso. Est cutis passim nostra infinitis
& plùs quàm capillaribus vasculis fi-
brillisque nerveis pertexta, quorum tu-
mor & subsidentia pronaturâ & rarita-
te fluidorum non colorem tantùm sed
& nitorem ejus mirificè variant. Efferve-
scentiæ autem præcipuæ hîc sunt partes,
quæ, prout sanguinem in capillaribus
modificat, & spiritum in sphærulis aut
vesiculis cutis papillaribus expandit, ita
vel tristiores aut vividiores nobis ful-
gorem adspirat. Longè alia certè est lux
nostra vivo & bene habito corpore,
quàm deficiente eo, in moribundis au-
tem planè collapsa, & Hippocratici vul-
tus

rus potissima nota ; refugiente enim ex
 utriculis nerveis spiritu, superficies ve-
 lut subsidit & complanatur lucem recu-
 sans. Putem autem, ut hoc adjiciam,
 quæ convexam nacta sunt superficiem,
 potentius lumen repercutere, quàm
 quæ plana sunt, & omnibus punctis il-
 lud æqualiter hauriunt; atque inde al-
 bedinem quidem in morbis ipsâque
 morte intendi, sed vitalem & expan-
 sivam lucem interire. Quòd si mini-
 ma quæque circa hoc argumentum in-
 telligeremus, non dubitarem, quin ma-
 gna prognosticis accessio, magna Medi-
 cis autoritas per hoc fieret, & inopinæ sæ-
 pe mortes prædici ex vultu possent. An-
 non aliquando cadaverosus pallor in vi-
 vis deprehensus indicium fuit fati immi-
 nentis, repulsis subitò præter naturam
 ad interiora spiritibus desertâque super-
 ficie? Talis ergò nitor à sanguinis spi-
 rituumque vi elasticâ ortus, omnibus
 est gentibus ipsisque Æthiopibus pro-
 prius; licet alia quoque accedat causa,
 quæ splendorem hunc in plurimis & in
 Æthiopi-

Æthiopibus maximè foveat, eaque externa & positiva, unguinosus nempe, crySTALLINUS & mercurialis halitus, texturâ illâ porulorum insensiliter exsudans; nam ne crassum illud esse aut copiosum existimem, tactus jubent experimenta: mercurialem voco halitum, qui Mercurii instar micet, habitumque leviter occupet. In dealbandis metallis notum est, quàm exiguum sæpe Mercurii momentum ingentem superficiem perambulet tincturâque suâ imbuat. Nitor autem in nigredine Æthiopicâ lituræ mercuriali haud est ab-
 similis, nam obscuritatem aliàs tristem efficacius animat; ut adeò, si colore non possunt, possint certè fulgore suo fastum nobis facere fumosa Nigritarum corpora. Scio pluribus esse animalibus superficiale quoddam & splendidum unguen, imprimis piscibus, ad natandi usus comparatum, non albis tantùm, sed & nigris *μαλακῶδέρμοις* (nam ne solis hominibus colorum ista æmulatio concessa videatur, etiam in pisces va-
 rietas

rietas descendit) & omnium immanissimis Cete liberaliter superfusum, ut ne ad aëris diuturniorem usum sicca aut aspera cutis aquarum morari illapsus possit, mergendique & nandi necessitatem intervertere. In pilis autem & plumis animalium amphibiorum emicans splendor, quemadmodum subinde succi inguinalis glandulosi, quem in Meditatione de vitâ sub aquis attingi, debetur linimento, sic etiam maximè à naturali humoris nutriticii aëreique fluidi, quod in pilis copiosum esse ostendemus, oritur expansione; quippe per hanc ipsam est, quod rigescant viventium pili mediis in aquis, etiam post mortem, sed violentam; nam tabificâ, ut in homine quoq; accidit, fulgorem istum intercidere, pellium delectus satis superque docuerit. Ne quid autem temere agere videar, putem præter illam spirituum in extremis tensionem, omnes propemodum animantes, & ipsum imprimis hominem, perfundi secretiore quodam & unguinoso succo, qui in superficie

perficiem non tantum erepat, sed cutis
 ipsiusque cuticulæ texturam penetret,
 emolliat, ne ipsarum siccitas & natura-
 lis rigor subjectarum partium usum, si-
 ve sensum seu motum, impadire possit.
 Notissimum est, duriores passim corpo-
 ris habitus ad tactum minus bene esse
 compositos, quemadmodum illos et-
 iam, qui nimio diffluunt humore, mol-
 les, *Deliaci manu recisi*; unde tempe-
 riem congruam, quâ opus esse ad sen-
 sum tactus existimabant, nulli adeo par-
 titribuere ausi sunt Anatomici, præter-
 quam cuti. Siccitate verò nimia papil-
 las nerveas validius constringi, & si
 quis est in spiritibus sese expandendi
 conatus, soliditate texturæ contractio-
 ris retineri probabile est, cui emendan-
 do ut omnis humiditas inservire possit,
 tamen nullum esse in hanc rem effica-
 cius remedium, quàm oleum, membra-
 narum, chordarum, nervearumque fi-
 dium præparatio quotidie docet; nam
 non superficiem tantum sed minima
 etiam contextus penetrat, lævoremque
 se

se suo & particularum viscosâ hamositate aëris insultibus sic satis opponit, quod in nullâ adeo humiditate reperias. Ex quibus judicaverim unguinis istius superficialis non in nobis modò, sed in Nigritis quoque, propter immensam aëris siccitatem, usum esse maximum. Imò hæc fortè ipsa sit ratio, cur Æthiopes, quod in itinerum commentariis legisse memini, aridam nimis cutim oleo pinguedineq; animalium studiosè emolliant, ut ne scilicet nimio squalore & infensâ siccitate membrorum usus intereat: quamvis non hanc tantùm, sed potiore quoque causam subesse intelligam, caloris temperamentum, nisi prodigio simile videatur, calorem oleo temperari. At verò experimentis cognitum est, nihil tam obstinatè admissum semel calorem custodire, quàm nigra, quia nihil à superficie reflectunt, omne intro convertunt, ferente huc minimorum texturâ; nigrorum autem superficies, ut jam ante diximus, in acetabulorum speciem effor-

E matae

matae recipiunt tantum & absorbent luminosos calidosque radios, quos convexae validius à se repellunt: hinc Nigritarum corpora, postquam exsiccata sunt, aestus multò impatientiora, quàm humida unguineque delibuta; hujus enim praesentiâ eductus calore cuticularis succus nonnihil compensatur aestusque depellitur: quippe olei istae sive sphaerulae seu viscosi hami asperae & siccae nigredinis cuniculos facile explent, superficiemq; vel laevem reddunt aut planam, certè talem, à quâ resilire utcunque immissi radii possint & calorem imminuere. Ex illâ quoque nigrorum ratione ad vestium colorem habitumque in itineribus attendant oportet, quibus aliqua corporis sui cura est, nec promiscuè alba in hyemem, obscura aut nigra in aestatem rejicienda; hisce enim calor maximè conservatur semel impressus, illis excipitur tantum. Pileorum itaque alborum, & ex albâ promissâque lanâ penularum apparatus, militaris usus opportuna inventa,

venta, non nisi æstatem sibi poscunt, cæteris anni partibus damnanda, ubi nigrorum iterum fructuosius compendium; quod equidem notare velim curiosos & molliculos juvenes, qui, ut minima quæque vestiariæ pompæ in usum transferant, tuorum hîc, Vir Exc. popularium intempestivâ æmulatione & in militarem usum repertis figuris coloribusque in vitâ hâc civili quietisque studiosâ vanissimè superbunt, ludibria potius Gallorum quàm imitatores. Delectum autem esse habendum colorum vel maximè suaserit vitrorum causticorum experimentum, quibus longè promptiùs nigra quæque calefiunt & accenduntur, quàm alba, intacta ferè, aut serò & non nisi operosè inflammanda.

Caput . Septimum.

Nigredo Æthiopica, ejusque causa materialis & proxima deducitur: hætenus conjecturâ tantùm definita experimento

mento Æthiopissa in lucem prodit. Consistere eam in membranulâ quadam, reticulatâ, pingui, unguinosâ, & fuligine delibutâ, cutim inter cuticulamque repositâ, per cuticulam, quippe quæ lucida est, transparente, cutisque colorem, album & nostro etiam candore non inferiore, obducente, demonstratur. In hujus rei argumentum plura accedunt & uveæ oculi tunicæ & aliorum exempla.

UT ne ergo in externis & superficialibus hæream, atque tuum, Vir Exc. morer desiderium, perspicienda nunc est nigredinis illius, quam hætenus obiter modò attigi, vera & materialis causa, & non conjecturâ solum, sed vivo atque oculato experimento demonstranda, quando fortunæ quodam munere nuper in manus nostras incidit Æthiopissæ cadaver, cujus occasione hanc lucubrationem aggressi sumus. Fuerunt quidem antè nonnulli, qui suspicione in causam nigredinis sunt adducti, sed sive oculorum fide minùs rectè

rectè sint usi, seu improvida manus inceptum defecerit, nihil exactè aut naturæ convenienter definiverunt. Est aliquid, quod testatur vestras ille magnus Riolanus Cap. iv. operis sui de cuticulâ; *Nigredo, inquit, Æthiopum solam cuticulam inficit, ut nuper in Æthiope ad Anatomiam dissecto vidimus*: sed plura expectantem nimis facile suspendit; nam cuticulæ quidem ad nigredinem istam non alius est respectus, quàm cutis, neutra enim propriè inficitur, cum hæc opaca sit & candida, illa etiam, quàm Europæorum, ulla, magis pelluceat; quamvis hanc quoque opacam esse naturaliter, magni nominis Scriptor nuper admodum voluerit, infelici, nisi fallor, & ex Æthiopum illo habitu redarguendo experimento; est enim membranula, &, ut cæteræ, quæ superficiem viscerum proximè ambiunt, pellucidissima. Ab altero Pisone, & ipso viro rarissimæ in talibus diligentia, cum plures habuerit secandi occasiones, id tantum adfertur paulò cu-

riosius, nempe reperisse se, nigredinem
 illam non ultra cutim penetrasse, quod
 cuticulâ sive epidermide ablata inferior
 cutis omnimodam corporum Europæorum
 referret albedinem; id quod à Medico
 etiam Anglo didicisse se illustris narrat
 Boylæus. Tandem verò divinâ con-
 jecturâ rem ipsam sine experimento,
 ut mihi quidem videtur, assecutus est
 ingeniosissimus & plus quàm lynceus
 Anatomicus M. Malpighius, cujus in
 res Physicas, tum maximè Anatomiam,
 meritis quidquid est hominum venusti-
 orum jure assurrexerit; is autem Exerci-
 tat. de Tactus organo ad illustrissimum
 Comitem Jacobum Ruffum; postquam
cribrosi & reticularis corporis, cuticulam
inter & cutim per varias animalium par-
tes, & ipsam imprimis linguam dispersi
 fecit mentionem, tandem in hæc erum-
 pit verba: ex quo transeunter deduco,
non incongruam fortè nigredinis Æthio-
pum causam; certum enim est ipsis cu-
tim albam esse, sicuti est cuticula, unde
tota nigredo à subiecto mucoso & reticu-
lari

lari corpore ortum trahit. Est ergo pingue quid & mucosum, quod utramque membranam molliter distinguat, quod, ut ante Malpighium nemo detexit, ita in Æthiopissâ nudis illud oculis manifestè contemplati sumus, in araneatâ tenuitate nigrum, opacum, &, si conglobetur, cuticulæ nitorem specularem obfusans. Fateor, cum separaremus primùm cuticulam, factum esse, ut corporis mucosi & reticularis, si enim appellare nunc constitui cum Malpighio, partes subjectæ cuti adhærescerent, adeoque suspicionem injicerent nigredinis cuti intextæ, sed, postquam diligentius versare superficiem cœpimus, apparuit lusum eum fuisse meticulosæ manus & nimis temere pendentis; vidimus enim, etsi distincta sit membranula, tamen affinem magis esse & obstrictam cuticulæ quàm cuti; quippe sæpius experiundo, calore cerei, aquæ, ipsâ denique novaculâ, à cute facilius quàm cuticulâ secedere reticulare illud textum deprehendebatur; atque inde,

nisi prudenti tractu manus regantur oculique, apparet nigredo ista cuticulæ agglutinata & velut ejus propria, quam tamen separari etiam istinc posse vel digiti in mucum illum satis firmi ostenderint. Itaque ex hac paulo negligentiore curâ accidisse arbitror, quòd nonnullis visa sit hæc nigredo cuticulam tantum inficere, cum revera neutram imbuat, neque cutim nec cuticulam, ab utrâque perinde separabilis; nam cuticulam exhibuimus modò pellucidam, tenuem, &, ut cum Satyrico loquar, *venti instar textilis*, modò reticulati & fuliginosi plexus coâlitu nigriorem, tandem quoque expansione ejus cancellatâ remissiolem, & nonnihil pelluentem, ut solet fieri, quando explanatis telis filisque lineis lucem plenius per poros admittimus. Verum etiam ostendimus liquidò in Æthiopissâ nostrâ cutim candidiorem, & suis illis notis insignem, quibus aliàs gaudere Europæorum cutis solet. Quare, si mucosâ & reticulari fuligine cuticulam orbarem

orbarem naturâ diaphanam, & mox
 imponerem cuti, emerſit continuo al-
 bedo, illa in Europæis ſic ſatis ſpecta-
 ta; quin haud illepada erat rei facies,
 quando hinc inde abraſâ membranulâ
 nigrâ variegatus refulſit & bicolor ha-
 bitus, ſicut eſſe ovium ſolet aut canum,
 ubi ad cutim tondentur. Illa autem
 membranula, Vir Exc. microſcopio lu-
 ſtrata, quod Malpighius conjecerat,
 planè exhibuit plexum reticularem ve-
 lut denſâ fuligine obſitum, expaſi-
 one ſuâ nonnihil lucidiorem, contractio-
 ne opaciorẽ; ad manuum verò expe-
 rimentum mollicula videbatur, & te-
 nacioris muci, ſeu tunicæ retiformis,
 quæ interiora oculi obvelat, æmula,
 quam etſi Galenus *χιτῶνα ῥδαμῶς εἶναι,*
ἔτε τὴν χροιάν ἔτε τὴν ῥσίαν aſſerat, tamen
 non membranæ dumtaxat, ſed & tunicæ
 mereri nomen, quod hætenus etiam
 obtinuit, mea eſt ſententia. Quod ad
 colorem attinet, videtur enim propius
 cauſam noſtram reſpicere, eſt is mem-
 braneus aut pellucidus, niſi enim eſſet,

nequaquam transpareret subjecta Uvea, colore reticulari huic & fuliginosæ Æthiopum membranæ persimilis: ut adeo in comparatione colorum cuticula, retiformi seu mucosæ oculi tunicæ respondeat, textum illud reticulare nigrum, Uvæ. Quod vero substantiam spectat membranæ oculi, est illa tenuis, araneata, si ulla, & in hoc singularis; non, qualem Galenus sibi finxit, mucosa & in pingues strias convoluta, non est enim extentæ aut investientis illa figura, sed collapsæ jam & plicatæ. Sed cum hæc retiformis tenuitatis tantum respectu nostrum hunc referat subcuticularem plexum, Uvæ colorem in partes vocare necessum fuit, ut inde aliquid lucis negotio nostro commodaremus. Equidem Uvea manibus tractata oleosam nigredinem facile refundit, quò intelligatur unguinosum quid reticulatis fibrillarum nervearum plexibus superinduci, & transituram alias lucem præpedire: quid, quòd illa Uvæ fuligo haud sollicitè quærenti in duræ etiam

etiam tunicæ superficie offendatur, solet enim in vivis quoque sectionibus semper aliquid ejus adhærescere. Imo eadem planè conditio est Uveæ in infectis, ubi propter vastissimam oculorum convexitatem & infinitos cancellos, quibus succingitur, omnes ejus affectiones luculentius apparent. Non possum autem hic præterire, quod de tunica hac Celeberr. Willisius lib. de animâ Brutorum ait: *tunica hæc in plerisque animalibus nigricans in superficie concavâ vel convexâ nigro quasi pigmento obducitur, quod etiam tunica alteri contigua affigitur.* Accedit Honorati Fabri, gravissimi Philosophi, testimonium; *processus, inquit, ciliares nigri sunt, quia ex huiusmodi corpusculis striatis constant; hinc facile manui adhærescunt, ad instar tenuissimi & tenacissimi pulveris: sunt autem processus isti protensa uveæ filamenta, eodem succo oleagineo perfusa.* Huic ergo Uveæ membrana nostra Æthiopica perquam similis, quippe quæ & nigredinem fundat, & adsitis parti-

bus

bus manifestè adfricet, ita tamen, ut elui possit, redeunte antiquo illo & à nostris nihil diverso cutis nitore; imo expertus sum in recenti membranulâ, totam ferè reticulis suis excuti fuliginem posse. Quid verò reticulum illud mucosum, membraneum, tam arctè Jungeret medium, cutim inter & cuticulam, nisi nodosa interveniret & glutinosa plexuum reticularium intersectio; unde adeoque dependet, quòd non nisi cum labore & adhibita curâ separari possit. Illa autem sive filamenta seu fibræ texti reticularis non æquè passim copiosæ aut eâdem densitate còactæ reperiiebantur, sed alibi sparsæ erant atque diductæ, ut remissior nigredo & transparens subjectæ cutis rubor significabant, in vultu imprimis genis & brachiis; alibi contrà, densæ & opacæ plenamque noctem admittentes, ut hodieque exsiccatae cutis testimonio probari potest, ubi, etsi passim propter siccitatem fibræ membranæ sint compressæ magis atque in se revolutæ,

lutæ, tamen in nonnullis quoque partibus latissimè à se distare deprehenduntur, cute transparente. In manuum autem pedumq; callis omnia invenimus duriora atque candidiora, ita ut vix differre à nostro habitu viderentur; nempe in examine illarum partium non potuimus membranam illam mucosam offendere, tum quòd arctior pororum in callo textura eam recusset; tum quòd siccitas pinguedinem omnem, quâ adeo constat hæc membrana, excludat. Animadverti autem in hoc ipso cadavere, callum nihil aliud esse quàm lamellata cuticulæ strata, densa & sicca admodum, tandem etiam cornea, expresso omni subcuticulari succo, nisi per quem olim sibi invicem jungebantur. Ex quibus aliquando suspicatus sum, annon per membranam illam adeo pinguem & mucosam sensus tactus in illis gentibus esset obscurior, quàm in nostri orbis hominibus, nerveis quoque cutis papillis longiùs à cuticulâ remotis. Sanè ut hoc crederem, persuasus sum

sum exemplis à Petro Servio & Gabriele Fonsécâ, Medico utroque Romano, memoratis: narrant illi, unus proprio, alter Fratris Roderici experimento, fuisse Romæ Pisisque Æthiopissas, quæ ignem manibus innoxie tractarent, saltem diutisimè sustinerent: quod ipsum vel manuum callo, aut, si alibi quoque corporis ea fuit sensus patientia, reticuli nostri mucoso contextui imputari debuit. Circumspicienti deinde amplius, quibus nigredo hæc conferri possit, incidit primùm Canum Guineensium color à simili membranulâ ortus, plurimorum etiam animalium callosæ pulpæ, quas in subjectis pedum plantis alunt nigras omnino atque opacas, illa linguæ hinc inde & labrorum, in Equis & Vaccis inprimis, & quam in pudendorum alunt margine, nigredo; nam, hisce si comparavero labrorum & vulvæ Æthiopice circumferentiam, nihil me agere posse convenientius existimem. Deprehendi autem in istis quoque cuticulam pellucidam non tam fragili

gili, quàm mucoso, tenaci, duro & nigro reticulo, videtur enim siccioris temperici, maximè in pudendorum labris, insterni. Sed non contineo me, quin hic etiam Tibi, Vir Excell. inimitabilis dextræ occurram exemplo; is ergo in docto libello Malpighius, *in pede Suis*, inquit, *quem coctum ilicò habere licuit, detractâ duriore ungulâ, dum subnigrum quoddam involucrum reticulare ejusdemque naturæ ac in linguâ observâram, evello, en, papillas oblongas & ferè pyramidales offendo, quæ velut eductus è vagina ensis emergunt.* Hoc ipsum ergo reticulum est illud filamentosum & membraneum subtegmen, quod in Nigritis cutis cuticulæque infringit candorem, atque in nigredinem obscuram convertit: ego autem, si quid de reticulo judicare debeo, non putem illud ipsam esse nigredinis materiales causam, sed subjectum tantum, & in fuliginosâ visciditate, quæ sese nodis aut filis membranæ cancellatis insperfit, unde unde originem nacta, repositam esse.

esse veram atque indubitatam nigredinis formam. Est itaque coloris Æthiopici membraneum subjectum, leve, araneatum, toto corpore contiguum: certè, ut non repugnat aurum in tenuissimum sive folium seu planum redactum laminam esse, ita neque hoc, utut tenue & exile textum, à membranarum nomenclaturâ excludendum esse arbitror; neque refert, quòd nullæ hic arteriæ intercurrent, cum nec in cuticulâ neque in illo viscerum tenui involucro ullo appareant vasorum vestigia. Ex quibus manifestum est, quænam sit corporis illius nigri & fuliginosi natura, quàm pertinaciter cuti infixæ, quàmque nullâ adeo arte aut loturâ mutabilis, nec frustra hæcenus jactatum sit *αἰθίοπα λευκαίνειν*, pro eo, qui oleum & operam perdit. Sola violentia hic aliquid potest, nec præceps illa, sed sollicita & curiosa, & in mortuis molli rasurâ pelliculæque detractio tentanda. Usus sum variis & durissimis experimentis ad explorandam nigredinis

gredinis illius conditionem, nihil tamen inde profeci; nam, quod minimè credas, ad omnia illa quantumvis acria pertinax mansit & invicta; lixivium adhibui, aquas fortes, spiritus acidos fumantes & calidos, color mansit usque idem ex corrugatione cutis tantum ad fuscitatem nonnihil inclinans murinā: jam verò in exsiccatō corio tam arctè coāluerant cum cuticulâ & cutē nodi illi membranei & pingues, ut nullā amplius arte neque cocturā secedere possent, connectente utrasque superficies fuliginoso visco. An autem hoc ipsum cadaveris culpā, in quod non facile corrosiva penetrare solent, contigerit, an pinguedinis occasione salina acumina infragentis, non audeo definire. Equidem mandata dedi, ut in vivis consimile experimentum fieret, sed partim herorum superstitio nescio quid mali metuentium, partim Nigritarum diffidentia inceptum destituit; quare ut alii, quibus melior fortuna, hoc ipsum repetant, auctor sim atque suator. Diu

deinde mecum deliberavi, utrùm alia quoque esset nigredinem experiundi via, & incidit oportunè Variolarum conditio, nam ex hisce quoque Æthiopes laborare jam antè audiveram: sed pauca admodum suppetebant, & imprimis unum Illustris Boylæi testimonium; *Juvenem, inquit, vidi Nigritam, quo leviter ex morbillis variolisve laborante* (dubium enim erat, uter hic morbus esset) *deprehendi, virum de ipso sollicitum sciscitatus, in istis locis, ubi tubercula cutim perfruperant, postquam essent persanata, albescentes post se maculas reliquisse.* Hoc post plenam accidisse curationem ægrè persuadeor ut credam; nam, ut in candidis corporibus cum tempore vincere stigmata illa Natura solet, ita in nigris quoque suffici novum sive succum seu membranam, mihi quidem videtur necessarium: id facilè largiar, non fore tam plenam macularum nigredinem, & relinqui notas, quibus à reliquâ cute distinguantur, sed in totum albescere, id paulò est insolentius, nec alio, quam

quàm vivo experimento demonstrandum. Observavi autem sectas aut inustas cuti cicatrices, quas, ceu servitutis olim Turcicæ indicium, in temporibus pedibusque Lunæ falcatae figurâ alebat, temporum illâ morâ planè nigras fuisse redditas, & cæteræ superficiei similes. Tum verò haud frustra est, quod in præclaris Hafnien-sium Actis, ubi in altero historiarum volumine Æthiopis ex Variolis affecti deducitur morbus, nihil tale narretur, vix sine negligentiae culpâ prætereundum. Ut jam in eam veniam sententiam, non semper à variolis mucosum illum aut reticularem plexum penitus perforari, sed tum demum, quando acrior sanies solitò diutius intra cuticulam cōercita, non illum tantum plexum, sed cutis quoque ipsius erodit superficiem; quò fortè etiam spectat, quòd in Æthiopibus, ut Hafnien-ses referunt, miliares duntaxat & exilissimi macularum orbes reperiantur: sin verò grandiores variolæ cutim quo-

que lacerant, quod Boylæi ægro accidisse crediderim, potuit tardius nigredo instaurari, neque ita in totum, ut non post acris materiæ cauterium textura relinqueretur distorta, minùs adeoque idonea ad succum illum atramentosum secernendum, ut sic fusci magis apparerent nævi quàm nigri: quippe propter eam quoque causam Variolarum scrobiculis innasci pili haud quaquam solent, quòd arctior & siccior contextus effluvia compescat. Quibus tandem experimentis evinci posse puto, nigredinem illam Æthiopum materialem, esse corpus quoddam organicum, figuratum, certâque præditum proportionem, tenue, mucosum, membraneum, reticulare, pingui & fuliginoso succo perfusum, cuticulam inter & cutim repositum, candoremque cutis, per cuticulam aliàs relucentem, opacâ nigredine infuscans atque obtenebrans.

Caput Octavum.

Materia nigredinis, utrum ex tubulis

aut glandulis sudatoriis, an verò ex insensilibus poris seu transpirationis cribro emergat, disputatur. Videri illam potentiam tantum in sanguine latere, ex succo deinde aut halitu limpido ad texti reticularis organicam dispositionem, aut certi succi fermentum, actu sub cuticulâ emergere, adductis in eam rem experimentis.

Unde autem materia illa nigredinis proveniat, & quemadmodum sese pigmentum illud fuliginosum in reticula plexusvè membraneos inferat, id cum primis difficile dictu arbitror. Per tentavimus universam cuticulam & cutim, nihil tamen expectationi occurrat quod satisfaceret; quin etiam elatâ membranâ illâ nigrâ, modo visu, modò microscopio & tractu molli digitorum, aditus porosque omnes &, qui inde exstillat, succum lustravimus, verum sine ullo successu. Equidem hinc inde pororum sese extra superficiem exili tractu projicientium osculis inhæresce-

re nigredinem vidimus, sed quæ contagio & nexu proximæ membranæ transferat. Ex multis etiam poris iisq; grandioribus, præsertim circa collum, extudimus succum albū & crassum, cujus antè apparuerant tumores, ut vulgò pustulæ, vermiculorum sæpe incunabula, in nostro habitu efflorescere solent. Sunt deinde alii etiam tubuli, qui cuti intextuntur pusillis osculis cuticulam perforantes, sudorum vehicula, ex hisce quoq; etsi coactis nihil omnino prodiit. Negaverat quidem vir Clarissimus cuticulam perviam esse, sed aliundè vix melius demonstrares ista foraminula, quam Æthiopico vultu, ibi enim, cum pororum oscilla libera sint à membraneo & fuliginoso strato, crySTALLINâ luce & innumerabili agmine tubulos istos nigredinem signare animadvertas. Et verò nullos alios poros reperire toto habitu licuit, nisi quos infinitos cùm oculis nostris tum microscopio Natura invadit, nimiùm quàm exiles. Nempe, tres tantùm viæ sunt, per quas aliquid
in

in superficiem corporis exponitur: una notabilis & oculos vix effugiens, pori seu tubuli cutanei, singulis glandulis enascentes, sudatorii meritò vocandi, quòd collecti densius vapores & angustiis laterum reperiuntur in sudorem ibi concrecant, aliàs lentè & insensiliter dissipandi; ex hisce quidem alibi corporis lympham expressimus fluidam, nullâ tamen nigri tincturâ imbutam, quò ne ex hisce aliquid in subjectum reticulare corpus confluere credas. Alteræ quidem viæ minùs conspicuæ, sed ad cutis pressionem cuticulæque reduvias lympham copiosè stillantes, quæ ipsa etiam sunt oscula sive arteriolarum seu nervorum capillarium, unde ad aëris medicamenti sive erosionem seu laxationem humor in rivum aut vesiculam colligi solet; ex hisce etiam, etsi plurimum elicere humoris potuimus, nihil manavit tincturæ. Tertiæ viæ sunt minima & indivisibilia corporis perspirabilis & rarefcentis puncta, per quæ sicut succus adigi nequit quantum-

vis subtilis, ita minis pingui huic literæ crediderim relictum esse locum; effluvia tantum sunt, quæ hæc propunt, minutim divisa, nec solido coerenda. Quæ ergo, inquis, sunt viæ, Vir Excell. per quas pigmentum illud nigrum emanet? ab ultimis quidem nihil expectari posse videtur, in primis autem nec vestigium observatur nigredinis, cutis enim Æthiopica in quamcunque partem versetur, est tota candida: & tamen emergere seu exæstuarè materiam ex interioribus manifestum est. Prodiit aliquando, non diffiteor, extubulis istis & cuticularibus osculis succus niger & melancholicus, sed qui præter naturam ex acidi fortè Vitriolati mistione in atramentosam nigredinem jam antè in glandulis cutaneis præcipitatus sit, ut solent corporis nostri succi pro fermenti præcipitantis ingenio aliter aliterque modificari, & graduale mutatione in varias abire colorum species. Ut acido hoc tribuam, persuadent atramenti confectura,

ctura, & ipsa bilis cum spiritu Vitrioli digestio, tum etiam sudor acidus, quem summo excubiarum Præfecto evenisse Excell. Langelottus, ut est in amicitiiis fovendis planè singularis, Clarissimo Actorum Germanicorū procuratori Volgnadio significavit. Sed verò in hisce casibus, & cutis est & sanguinis eadem & morbosa affectio, ibi nulla planè, nam & rubore suo sanguis & albedine cutis perfunditur. Ut adeò res sit perplexa, candidam esse cutim, & tamen fundere eam nigredinē, cujus nusquam appareant semina. Itaq;, si in sanguine aut succo cuticulari latet nigredo, non actualiter, sed potentialiter, sed dispositivè, ut pace tuâ his terminis utar, ibi lateat necesse est: nempè nihil post varios conatus ex tubulis sudatoriis, nihil ex transpirationis cribris, neque ex medio pororum genere excerni potuit: quare non antè nigredo constare videtur, quàm in superficiem cutis effusa est, in cute, sanguine & tandem quoque semine occulta & potentialiter latens. Ul-

trum ergo textura sola cutis mutationem inferat, & nigrum hoc pigmentum è potentiâ materiæ educat; an verò aliud & Vitriolatum fermentum clariorem lympham obtenebret inque atramentum figat & denset, judicio tuo Vir Excell. committi malim quàm meo. Equidem humores pingues & aliter coloratos in sanguinis illâ purpurâ occultari posse, solidi tamen contextu aut succi fermento educendos, Bilis argumento est, quippe quæ ad glandulosam hepatis texturam aut fermentum, è potentiâ materiæ, sanguine sc. emergit, peculiari qualitate & sanguini antè negatâ insignis. In tantùm autem succinostri fuliginosi alia est ratio, quòd non proximè è sanguine, uti Bilis, sed medio liquore, qui irrigare cutim solet, pronasci videatur, sive organicus reticuli subcuticularis contextus, seu peculiare fermentum intercedat: num verò illa sit conditio effluviolorum corporis, ut, dum poris emanant, mox reticulo membraneo affigantur, & affixa in fuligi-

liginosam transeant nigredinem, incertus sum; non negaverim tamen halituosum quid & αἰθαλῶδες corpore nostro exspirare, cum, qui in pædore confenescunt sui negligentes, fusci evadant & in nonnullis partibus sordes concipiunt planè nigras, densas & nonnisi strigilibus cedentes: possit ergo ejusmodi materia magis agglomerari in reticulari illo Nigritarum plexu, & quemadmodum ex fuligine vulgò oleum concrescit, ita hæc quoque succedentibus atomis in pingue linimentum densari. Quidquid demum sit, in plurimis herbarum notavi, eas ex diversissimis succis, quibus aluntur, in unum virorem conspirare; nam sive albus sit seu luteus, sive ruber, seu deniq; ut plerunque est, pellucidus succi color, tamen vesiculari, aut, si mavis, glanduloso foliorum florumque contextu in alium atque alium mutatur. Tulipa, cui rara & fuliginosa obscuritas nomen Caminiverri apud Batavos imposuit, succum habet & ipsa limpidum, qui in
 floris

floris texturâ nigredinem subeat. Chemicorum trivio non ignotum est, quomodo pellucidi humores in atramentum cœant, & striatæ densæq; Vitrioli particulae, ad fermenti accessionem poris suis exturbatæ, solutionem aliàs crystallinam opacent: sed abstrusius paulò & minùs cognitum arcanum, quomodo liquor sulfureus & ipse limpidus, per magnam stratorum chartaceorum molem penetrans, signa literarum candida atramentosa & conspicuâ imbuat nigredine, id quod in atramenti sympathetici specie Lutetiæ Parisiorum à me visum. Itaque censeo sub cuticulâ ad occursum certi sive liquoris aut fermenti nigredinem tandem emergere antè occultam, planè uti limpidus lixivii color objectu sulfureæ aciditatis in nigrum facescit; nam, si succus ille aut effluvia actu nigra essent in sanguine, alibi fortè vestigium coloris istius reperias; de Æthiopum autem sanguine quod nonnulli jactarunt, nigriorem illum esse nostro, non potui

potui deprehendere. Sed quantum ob-
 jecti natura ad coloris mutationem
 conducat, docent Lunæ calces, Vitrio-
 lati herbarum succi, in quibus licet ni-
 hil coloris oculus advertat, nigredinem
 tamen manibus liberaliter adfricant.
 De chartâ Hispaniensi, fūco mulierum
 rarissimo, notum est, ipsam viridem
 læto rubore genas inficere, nitroso &
 volatili fale, qui legere superficiem
 corporis solet, pigmenti, ut credo,
 acidioris mutante texturam. Ut jam
 alienum non sit credere, cū corpo-
 ris nostri lymp̃ha ex variis constet par-
 ticulis, pro quarum diversâ affectione,
 fixatione aut volatilisatione, jacturâ
 vel unitione, colores facilè mutantur,
 residere in contextu illo reticulari fer-
 mentum aliquod gentile atque Æthio-
 pum proprium, limpidiorem sive lati-
 cem seu habitum in nigredinem jam
 notam transformans.

Caput

Caput Nonum.

*AD remotiores nigredinis causas pro-
peratur aliorumque exemplo de diris
& voto Noächi decernitur; nullâ ratione
potuisse ad Ludaos, ne dicam, ad colorem
eorum, referri indictam servitutem; ni-
gredinem non magis esse servitutis indici-
am, quàm alium quemq; colorem; defor-
mitatem in figurâ potius corporum, quàm
colore consistere.*

Quam sibi alii sumserunt libertatem
de causis coloris antecedentibus &
remotis disceptandi, eam mihi quoque
à te concessam esse, Vir Excell. omni-
nò persuadeor, ut tandem severiores
ingenii lusus per promiscuas lætioresq;
quæstiones temperentur. Posse alia et-
iam adduci, quàm quæ acutissimo An-
glorum Th. Brounio, & ab illustri im-
mensæque cognitionis viro, Rob. Boy-
læo, jam verò antè etiam, ab illo orbis
literati

literati ocello Herm. Conringio sunt prolata, nisi fallor, ex sequentibus erit manifestum. Incipiam autem *ὁμηρικῶς, ὕστερον πρῶτερον*, à primævis remotisque causis. Fuerunt ergo, qui colorem hunc indicium esse iræ & maledictionis divinæ opinati sunt, & ab ipso Noâcho, illo omnium post diuvium parente, profectas diras in totam Chami recidisse posteritatem, unius obnoxam & furias Canaanis; quod etsi in Historicis Philosophisque pro illo supercilio tolerari nequaquam possit, in Poëtis tamen haud morosè excutiendum esse reor. Viderunt jam alii non potuisse tum esse Chusi vel aliorum Fratrum hanc infelicitatem, quippe qui pudendo facinore mores non contaminaverant, neque etiam ultimæ Africæ, quam nunquam ingressi sunt Cananitæ, sed primis illis & conterminis Asiæ atque Ægypti finibus asserendam fuisse piaculari & orcinam devotionem; ibi enim habitabant, qui à Canaane orti sunt, & in quos redundasse hæsurum usque
 convi-

convitium sacrorum etiam documentis manifestè constat: nulli autem posterorum Chami tot cædibus atque servitutibus vexati sunt, quàm Cananitæ; naturâ & in supplicium feroces: atque hoc est, quod justissimo Spiritus S. dictato imputari iis jure possit, imputantque hodie cordati omnes; quorum enim frequentata illa ἐμφαισις & dirarum in Sacris ingeminatio? *Canaan sit servus servorum.* Quod sanè de Æthiopibus, tanquam longè diversa progenie, nemo facilè ostenderit; hæc enim gens in ultimos Africæ recessus velut ocia relegata, sacris illis & internecinis Israëlitarum bellis, quibus tot tamen nationes & ipsi Cananitæ in servitutem sunt redacti, intacta, cælo suo & solo fruens, tranquillè semper egit. Cambyfes fortè primus, famâ & commendatione gentis excitus, satis habuit ab incepto desistere, oppresso per arenarum moles exercitu. Nupero demum seculo sepultæ diu gentes, nostræ etiam plagæ ostendi cœperunt, &
ad

ad vilissimos & penè inhumanos labores Hispanorum libidine damnari; non tam ullo Barbarorum quàm victoris truculenti probro; nam & ipsi servitutem, quàm facile modicam admiserant, tam ægrè tulerunt hodieque ferunt, ut plurimi tædio rerum violentas sibi manus inferre non dubitent, multos etiam dolor ipsâ morte sævior consumat. Fuerunt olim mercium Alexandrinarum numero Ephebi comprehensi, ad pocula luxumque Romanorum adscripti; at hodie Africanarum mercium pars maxima, sexus utriusque Æthiopes, titulis & venaliciis picti, per Europam, velut ostenta quædam, in Nobilium Regumque delicias dispergendi: quam si quis pœnam nominare velit Cananitis jam tum Spiritus S. ministerio indictam, & minimè fallaci experimento post indictionem probatam, næ is ineptus sit atque infectus. Ergo, quas Semi & Japheti progenies exigere pœnas debebat, ultimis hisce temporibus & Celtiberorum vin-

dictæ reservatæ sunt? ergo in hoc soli Hispani, tanquam divinæ Fratrum reliquiæ, à Spiritu S. delecti & velut *ωρεσμένοι*? Sed deinde, ut vitium sit illa nigredo & maledictionis effectum, atque in Chusum transierit ista macula, quis tam in migratione gentium, in historiâ omni & illâ veterum est versatus; ut Æthiopes andeat Chusi istius contendere progeniem? magnum, opinor, facinus, nec temerè probandum! pauca equidem pro illis partibus stant, multa in contrarium eunt; nam ipsa quoque Sacra Canaanis imperium Babyloniam versus extendunt, ubi nec Æthiopum nec tam atrii coloris vestigia. Quod si inde tandem in Æthiopiam migrarunt premente viciniam Nepotum numero, ferò irrepsit color iste, &, qui æquè debebatur posteris Nimrodicis, injuriâ quadam in certam & unam partem videtur translatus. Ostendit autem Bochartus, Vir in talibus consummatissimæ doctrinæ, & ipsis decem argumentis ostendit, (quem hic, ut Vossios ta-

ceam

ceam & Merulas, compilare velle ineptum duxerim & intempestivum) non tam esse Chusi aut Canaanis sobolem Æthiopes, quàm Ludi, filii Mizraim, qui & Ægypto & conterminæ Æthiopiæ posteros suos impendit; quamvis ne hoc usque certum esse putem, utrùm illi, qui hodie vocantur Nigritæ, ab istâ Ludi antiquissimâ progenie sint enati, quia illæ gentes tam diu à communi sensu & annalium memoriâ fuerunt remotæ, ut vix certam iis sedem aut habitum vultusque characterem, saltem qui primitivo sit similis, adsignare liceat. Nostrarum hodie gentium in Europâ tam obscuræ sunt migrationes, ut pauci per commentarios aut originum indices, plurimi conjecturâ tantum in earum causas sint adducti: quid ergo mirum, si in Africâ inexplorato terræ tractu, & minus perspectis gentium historiis, magis hallucinemur. Fortè vastius fuit olim Nigritarum imperium, aut suâ ipsorum abundantia vel externorum populorum mutatione se-

des mutare coâcti in alias & secretiores
 Africæ plagas secesserunt, ubi ad aëris
 deinde terræque & alimentorum novas
 species habitum corporis pristinum
 nonnihil variaverint. Equidem non
 vana videtur conjectura, quemadmo-
 dum omnibus gentibus, sic istis quoque
 necessitatem fuisse impositam vel mi-
 grandī aut aliorum admittendi com-
 mercia, quibus deinde in variæ gentis
 misturam transiverint; nec contagio
 tantum, aut aëris alimentorumq; cau-
 sis, etsi his sæpe, sed ipsis quoque terra-
 rum tractibus, iisque exiguis, gentium
 illas mutationes adscribendas esse. In
 plurimis certè apparet, leviculo terræ
 intervallo, solisque montium jugis aut
 fluviorum discrimine, insignem consta-
 re habitus colorisque mutationem, ut
 in ipsis Africæ, regni Congo, Angolæ
 & Guineæ indigenis apparet; incredibi-
 le enim, quantum à se & vicinis quibus-
 que discrepent; nam & Senegæ fluvii
 illam esse proprietatem vulgò asserunt,
 ut, qui ab unâ habitant parte Nigritæ,
 sint

sint omnibus numeris absoluti, qui ab alterâ, longè abeant, Maurorum colore infecti. Qui ad mare Æthiopicum degunt Nigritæ, alios esse & primævis similiores, quam qui Oceanum accollunt, mihi persuasissimum est: illis enim, quod Ludæis olim imputatum, & *comedere filios hominum*, & debellatorum membris pasci luxuriosèque victitare hodieque solenne est, etsi ex parte sævitiam hanc Majorum consuetudo aliarum gentium mitigaverit; nam illos quidem, qui in Zoffalæ & Melindæ habitant oris, atque peculiari nomine *Cassres* nominantur, cùm Abysfinorum tum Saracenorum Indorumq; commerciis temeratos esse, illata negotiorum religionumque vicissitudo facile indicaverit. Nimirum fieri aliter non potuit, quin, quòd Arabum Indorumque commerciis viciniâ & oportunitate locorum essent objecti, ab illis etiam maculam quandam & vitæ traherent mutationem: qui verò propè Oceanum externum fixi erant Nigritæ, montium,

quos Lunæ vocant, fluviorumque im-
 mensis spatiis ab insultu & consortio
 peregrinarum gentium tutæ, non po-
 tuerunt aliunde quàm à se ipsis, terræ
 aquarumque genio, varietatem habere,
 quam hodieque habent, & Itinerario-
 rum auctores in Senegæ accolis nota-
 runt. Singulis autem istis propriam
 manere & incorruptam vivendi ratio-
 nem credibile est, tum quòd naturale
 odium misturam gentis prohibeat,
 tum quòd suam quisque pulcritudinem
 nimis æstimet. Non immeritò etiam
 arbitrari liceat, qui olim in istas Ocea-
 ni oras effusi sunt Nigritæ, perpetuam
 dormisse noctem, partim intactos, par-
 tim incognitos: in Hammônis certè
 vetustissimâ periplô, qui errasse versus
 istam plagam videtur, præter monstra
 & vanissimas conjécturas nihil offen-
 das. Si quid tamen de origine Nigrita-
 rum hariolari possumus, à Noâchi filiis
 uti omne humanum genus, sic hos
 quoque descendere probabile est, ne-
 que tam à Canâane vel Chuso, quippe
 qui

qui in Arabiâ refedit , quàm à Milnâimo, cui Ægyptus in divifione illâ obtigeret, ejusq; filio Ludo , qui Æthiopum illas terras invaferat, ut rem optimè deducit Bochartus , numerari Nigritarum progeniem. Hæferint primùm in mediterraneis & Ægypti viciniâ, at potuerunt deinde feculorum lapfu ad maritima feſe proripere, tandem etiam multiplicatis gentibus ad promontorium B. ſpei effundi, hinc iterum abrupto per mare objectum impetu ad ſuperiora , ad Congo & Angolæ fines reflecti, mutatis paſſim in illâ aëris terrarumque varietate animi corporisque naturis; nam iſtud quidem jam antè notavimus, non eſſe in illo tractu eandem omnium gentium rationem. At ſint tandem omnia illa ſpecioſè vera; repetant à Canâane genus ſuum Æthiopes , quis tamen ſecuros nos præſtet, eſſe nigredinem maledictionis notam, quod antè attigimus, & ſervitutem, cujus tot ſeculis immunes vixerunt, nuper demum & mercantium avaritiâ protra-

cti, colore significari. Ego quidem ignoscendum facile puto Guilhelmo Postello, mirifico in cæteris homini, quod rem ausus fuerit aliunde quàm à Noâchi diris immisilâque servitute nigredinem hanc deducere; aliis autem, qui hoc seriò agere videntur, haud ita occurrendū existimem. Sit nigredo inauspicata & minùs læta; habeat candor hanc prærogativam, quod sensum ad lætiora animet viresque reficiat; sed quid aliud inde concludas, quàm habere eos naturam paulò difficiliorem, & hætenus esse, quo infeliciores censendi sint nobis ipsis: verùm in maledictionis paternæ & morum trahere argumentum, colorem, qualitatem superficiale & in levi texturâ hærentem, nemini, ut puto, sine culpâ impune est, præterquam Oratori vel Poëtæ, inque his ipsis Emanueli Thesauro, doctissimo cæteroquin Viro, qui in elogiis Patriarcharum de Chamo.

*Et fædo eodem semine progeniti
 Æthiopes,
 Impurissimi ardoris tui adfricti fumo,
 Mores suos de colore tuo testabuntur.*

Fuisse in Cananitis animi quandam & morum servitutem, fuisse *σκληροκαρδία* potius, quàm notam aliquam corporis gentiliciam, quâ captivitatem & corporalem servitutem erant merituri, omnino mihi imaginor: quippe ut ipsi semper Fratrum obsistebant destinationibus, ita Prophetico oraculo in servitutem, miseram eam atque inopem, & cum nominis everfione conjunctam erant redigendi, idque per divinas Semi Japhetique reliquias; quod in Nigritarum gentem recidisse hodie quoque copiosam & superstitem, ne quidem suspicari licet. Jam verò nec infelicitatem propter nigredinem imputare æquum est, cùm ipsi unum hunc colorem maximè depereant, & damnatissima quæque & ipsum Diabolum, ut refert Linschotanus, albo colore designent; imo ipse splendor & habitus

corporis redimere facile vitium possit, si quod est. Et verò, si adeo pulcritudo & analogia partium nigredine fædatur, cur accuratissimus aliàs epithetorum repertor Homerus, ubi totam corporis emensus est proportionem, *Thersitæ, αἰχλὺς ἀνδρός*, cur, quæso, coloris obliviscitur, in figuras tantùm distorsionesque membrorum intentus? Sed nunc etiam communi Barbarorum suffragio in figurarum & ambitus decore præcipua reponitur pulcritudo, ita ut, quem horrore religioso timeri volunt malum genium, fædisimâ & malè catenatâ membrorum serie describant; quasi dedeceat hostem infensissimum humani generis omnisque ordinis eâdem exprimi formâ, quâ vulgò homines gaudemus.

Caput Decimum.

Cause propiores delibantur. Negatur Solis in formandâ Nigredine Æthiopicâ ullas esse vires; infuscarî quidem corpora nimis

nimis solibus, at longè ab illo coloris gradu abesse exustionem aëream; Nigritarum clima, etiam in tanto aestu, humidâ fluviorum, quos ibi habent vastissimos, & nitrosâ cœli aurâ temperari non vanis argumentis probatur.

Quando ergo tam singularis est illa nigredo, neq; à maledictione profecta, meritò quæras, Vir Excell. unde originem habuerit habeatq; hodie; nam hic in diversa abeunt. Frequentissima est & inveterata opinio, nuper demum reficta, à Solis ardore cum omnem fuscitatē tum nigredinem hanc procedere; sed detexit hoc argutè eruditissimus Anglus Thomas Brounius & oportunè improbavit; quæcum in vernaculâ tibi sint cognitissima, non repetam, quæ ibi deducta sunt plurima eaque invicta argumenta. Sed tamen alia adhuc supersunt, quæ rem declarare ulteriùs possint, non ita vulgò considerata; nam primò quidem ex ipsâ illâ nigredinis qualitate apparet, non deberi eam aestui,
neque

neque enim vel mille solibus exusta cutis talem induat colorem, qui nempe non superficialis sit, sed sub pelliculâ latens, non scaber aut strigosus, sed in nitido habitu pinguis & lævis; cum, qui à sole infuscantur, præter æruginosam obscuritatem etiam siccum contrahant & orbitate succi nutritii, quippe quem æstus educit, rugosiores habitum, ut hoc ipsum manifestum est in maris Mediterranei utrinque accolis. Mauri certè & Fessæ regniq; Maroccani habitatores longè sunt strigosiores & sicciore cute, quàm Nigritæ, etsi à perpendiculari Solis longius sint remoti, quàm vel Angolæ aut Senegæ incolæ. Imo, ne quid ardor aut Solis rectilinea immissio obsistere alituræ videatur, insula D. Thomæ directè sub æquinoctiali sita & Guineæ plana, pinguißima refundunt & succulentissima animalia, frigido nimirum rore, qui ibi singulari Naturæ munificentia copiosissimus est, resecta; hoc enim est, quod tolerabilem reddit plagam nimia antiquorum levitate

levitate damnatam. Miretur forte quispiam, nontantum, quod habitiores multò sint homines in isto climate, verum etiam numerosiores & multâ fœcunditate inexhausti; nam vel unum Angolæ regnum in singulos annos supra quindecim millia Nigritarum in pistrinenses Hispanorum operas dimittere fama est, ne quid ad patientiæ laudem genti isti deesse videatur. Si quis autem roget, quænam illa sint, quæ habitationem reddant sub perpendiculari sole tam commodam & fœcunditatem inferant; sunt, meo iudicio, fluviorum latè vagantium nitrosæ, hoc est, frigidæ & fœcundæ auræ; est ros ille æreus mirificè excoctus, pinguis & nocturno illapsu gratus. Ros equidem non fata tantum ingenti & subitâ ubertate perfundit, sed hominum quoque & animalium fluxam in illo æstu corporaturam tuetur, densat & speciosâ pinguedine rotundat. Sunt in vastissimo illo Æthiopiæ tractu Zanzibar post Lunæ montes fluviorum longè maxim,

mi, *Suama* & *spirito sancto*, unde illi in insulam S. Laurentii deportati, & hodiernum in Indiam Orientalem & alias regiones mittuntur bene habiti & pingues Nigritæ. In altero Africæ angulo, qui Oceano objicitur, sunt *Zaire*, *Niger*, & ipsi fluviorum immanissimi, perinde inundationibus celebres, ut Nilus, unde in Occidentalem Indiam atque in Europam deducuntur, quos hic habemus, Æthiopes. Illam verò Æthiopix humiditatem primus attigisse videtur Francisc. Baco Verulamius insigni honorum juxta & solidæ eruditionis famâ clarissimus Philosophus; qui in Sylvâ Sylvarum, *omnes*, inquit, *Æthiopes carnosæ quidem sed inconcinne sunt habitu corporis crassisque labiis. Nasci quoque eos videmus in regionibus aquæ, propter fluvios aliasque causas, abundantibus; Merœe enim metropolis Ægypti amplum lacum accepit; Longo quoque, ubi Æthiopes vivunt, aquis scatet, & regio circa Capoverde est humida, unde & pesti obnoxia, certè putredini.* Verissimè,
nam

nam perpendicularis solis injurias corrigunt vapores, terræ horizonti totis noctibus magnamq; diei partē incumbentes: ne dicam, quòd magis tolerare solem Æquinoctialem possint, quàm obliquū & ad Tropicos deflectentem, quòd hic urat tantum, minus extrahat vaporum, ille urat quidem vehementius, sed plus simul evocet humiditatis, quam deinde densatam copiosè versus terram reflectat, diurnoque squalori opponat, ut adeo indigenæ isti nebulâ fluviorum nitrosâ circumfusi mirabilem sentiant & acceptissimam temperiem. Illud ergo *ἡρόδοτος*, hyemem esse, hoc est, frigus intensius, cum Sol est perpendicularis, æstatem, cum obliquior, jam antè aliis visum & probatum, tam immensæ doctrinæ Cardano in Ptolomæum, quam illustri viro, Isaaco Vossio, libro de origine Nili. Quare non ineptè plagæ isti imputare felicitatem liceat, quam uni tribuum Israëliticarum Spiritus S. promiserat, esse nimirum *beatam regionem propter cæli & roris fructum*

etum; tantum abest, ut in dirarum partem trahere tam insignem Naturæ beneficentiam possimus. Sed non Nigritarum modò, Vir optime, sed aliarum etiam gentium, quæ difficilem experiuntur Solem, esse hoc munus velim tibi persuadeas. Est Nilus, ille fluviorum famosissimus, qui non segetes tantum, sed animalia quoque maxima, Crocodilos, Hippopotamos, & ipsos homines instaurat atque in pinguem aqualiculum extendit. Quis crederet Alkairi tam ventriosos & curatâ bene cute pingues in illo solis æstu reperiri, nisi ariditatem corporis aura fluvialis, & quam in potum deligunt, Nili aqua oportuno frigore temperaret, fluentesque aliàs olei particulas in blandam densaret pinguedinem. Sanè hinc est illa diligentissimi Ægyptiarum rerum contemplatoris, Prosperi Alpini, observatio, libro de Medicinâ Ægyptiorum, Cap. ix. *Nusquam gentium, ait, memini me vidisse in tanto numero tam præpingues homines, quales Cairi obser-*
vantur

vantur ex Viris, plurimos usque adeò pingues infexi, ut mammas haberent longè mulierum mammis maximis majores, crassiores & pinguiiores. Hoc etsi non commodè attigit unde proficisceretur, tamen nitosis Nili rorisque aërei particulis deberi, etiam atque etiam adducor ut credam; quòd verò Feminae ibi proportionem non æquent virorum crassitudinem, naturâ aliàs obesulæ, id certo vitæ generi, id molestiis partuum & operis clitellariis manuariisque, quas hic feminis reliquit virorum mollicies, tum etiam parciori diætæ, adscribendum esse reor. Fuere tamen olim nutricum Meroiticarum ubera valde celebrata, ut ex illo Juvenalis apparet;

*Quis tumidum guttur miratur in
Alpibus, & quis*

In Merœe crasso majorem infante papillam?

Estque hodie Æthiopissarum in Mosambicâ eadem mammarum vastitas, ut alibi ex Linschotano adnotavimus, haud

dubiè à nitrosâ auræ fluviorumque fœcunditate producta; Merôe enim, etsi sub Æquinoctiali posita immanissimos videatur æstus pati, opportunè tamen à lacu Zaire vaporibusque ejus reficitur, & nitrositate Athmosphæræ impendentis solis vincit siccitatem. Et ne aliunde hoc repetam, quàm à nitroso, aëreo & fluviali sale, popularis tui, præcipuæ dignationis Viri, Domini de la Chambre auctoritate permoveor; ille in libro, cui titulus, *Causes du débordement du Nil*, Nitri immensam vim, cum aëri tum aquis Ægyptis conjungi, solidis experimentis ostendit: estque hoc probabilior ratio, quòd in omni rerum naturâ nihil æquè deprehendatur & refrigerare & fœcundare, quam Nitrum. Habet nimirum in se Nitri sal spiritum acidum volatilem, aëris rorulenti sine dubio fœtum, quo sanguinem facilè penetret, & à Solium nimio æstu liquatum molliter cõagulet; habet deinde in illâ acidi præsentia sulfur quoddam & ipsum volatile subtilis-

subtilisque elementi misturâ refertissimum, quo se principiis activis promissimè associet, eorum vires in immensum adaugeat, vi, qua pollet, elasticâ. Isto ergo modo credibile est rarescere animalium & vegetabilium texturam, & ad commodam adiposamque nutritionem disponi, præparatis ante blando acidi coagulo olei pinguedinisque particulis. Sed quid multa? ostendit nuper ingeniosissimus Anglus, Joannes Mayovv, regnare passim in aëre nostro spiritum, ut ipse vocat, nitro-aëreum; ceu fermentum quoddam catholicum & vegetativi motus primum auctorem; qui etsi in hoc nostro aëre rarior sit atque obscurior, in Ægyptio tamen & Nilotico tractu longè est manifestior & efficacior. Unde causam apparere arbitror, cur sub perpendiculari Sole plurima non vivant tantum, sed lautè etiam & delicatè nutriantur; contrà sub obliquiore, ut in ipsâ Guinæ viciniâ, Lybiæ & Mauritanix mediterraneis, propter aquarum rorisque

nitrosi defectum, & validam arenarum reflexionem, inaccessa sint pleraque, inhospita, omnisque culturæ expertia. Nec tamen, qui ibi aut in vicinis degunt rari habitatores, ad nigredinem Æthiopum accedunt, quod vel maximè fieri debebat, si unius Solis ista vis esset, & non alio quàm ardore constaret ille habitus. Nigri ergo sunt Æthiopes, non quòd exusti, sed certo & gentilicio præditi temperamento, pingues, obesuli, æstu illo atmosphæræ, quâ vitalem trahunt auram, per rorem nocturnum frigidumque infracto, accedente sulfuris nitrosi & blandi impressione, quod non habitum modò, sed & numerum augeat gentis, suprâ quàm credi potest, populosæ.

Caput Undecimum.

Colorem, qui à Sole videtur proficisci, non simpliciter esse nigrum, sed pro superficie & objecti naturâ multiplicem, sæpe

sape etiam album, & quæ nonnullorum summa tingit nigredo, eam ex ipso potius corporum centro emergere, quàm in superficiem positivè à Sole inferri plurimis observatis innotescit.

Videndum nunc porrò est, utrùm continuò Sol, postquam corporum exsiccat superficies, nigredinem trahat comitem, non etiam alium quemque colorem. Experimentis docemur, adæquatum esse Solis effectum, humidæ corporum particulas, quippe quæ fluori maximæ sunt obnoxia, intestino motu dividere, & quantum licet, extra corporum sphaeram propellere, exsiccare adeoque & defectu humoris, si illa est superficiei conditio, indurare, colore è potentiâ magis materiæ, quàm ullo Solis positivo influxu emergente. Equidem, ut Solis calor modò colliquat, modò indurat, sic idem ille non unum semper colorem adfricat objectis, sed pro eorum naturâ nunc nigredinem, eamque vel aridam aut succulentam &

pinguem, modò albedinem, eamque
 fulcam aut niveam. Ex antecedentibus
 quidem videtur manifestum, non esse
 Æthiopum illam nigredinem ab exsic-
 catione; constat enim habitu corpo-
 ris glabro & succi sanguinisque pleno:
 illam verò sive Maurorum seu Hispano-
 rum, & quæ illis ἐκ τοῦ ὁραμαλῆς respondent,
 gentium squalidam & rugosam superfi-
 ciē, eā imprimis parte, quā nudiambu-
 lant, Solis exsiccationi deberi, inde et-
 iam patet, quòd qui in Septentrione fre-
 quentiori utuntur Sole, eandem con-
 sequantur fuscitatem, succo subcuticu-
 lari, cujus antè blandā expansione su-
 perficie mollicula & candida rotundi-
 tas constabat, evocato: atque hinc est,
 quod quæ vestibus teguntur partes, &
 directum illum radiorum impetum,
 non sentiunt, tamdiu intemeratum
 servant candorem, donec fuscitas sæpe
 continuata in gentilem corporis habi-
 bitum, ut in Mauris Hispanisque fa-
 ctum esse puto, transeat, non amplius
 sub involucrio tuta. Unde non tantum
 est

est à fuscitate periculum, ubi aquæ & nitrosæ auræ ariditatem corrigunt cœli, quàm ubi nulla earum est copia, Sole infesto. Ægyptii, si cum vicinis & ejusdem paralleli incolis conferantur, nitidior multò sunt cute, quàm isti, ut qui ex rore Nilotico miram accipiant temperiem. Hispani rursum vicinis suis aut qui in eâdem sunt latitudine, magis obscurantur, aquarum infrequentia Solis injurias augente. In totis deinde terrarum tractibus miram reperiâs colorum varietatem, modò remissiores nunc intensiores, prout perpendicularis aut obliquior Sol imminet, & imminentis ardorem humida nitrosaque effluvia temperant. Animadvertere visus sum, qui ad oras Padis rejecti sunt Galliæ Cisalpinæ incolæ, minùs esse fuscos, quàm qui in siccioribus habitant planis, etsi hic quoque inimicum solem sparsa artificio fluentia, commodè mitigent. Mævania, Catulli patria, non habitiores modò homines, sed Boves quoque producit pinguis-

mos, &, quod mirum, in illo æstu candidissimos; quod equidem non fieret, nisi reperiussent à collibus undique coeuntibus Soles à Clitumni, nitrosissimi fluvii, aurâ corrigerentur. Sed plurima quoque Sol, obscura aliàs & fusca, in albedinem excoquit, dum rorulentis nitrosisque particulis per poros squaloris tenaces distributis obscuritatem purgat, moxque continuato insultu unâ extrahit. Saxa in terræ penetralibus tenebris & fulcitate cooperta, tunc, cum in moles assurgunt & luci exponuntur, nitorem albedinemque mirificam consequuntur non aliam ob causam, quàm quod humiditas desuper incumbens, quæ æquare corporum superficiem solet, radiorum solarium impulsibus extracta, particulas relinquat sphaericas, è quarum deinde mutuâ reflexione candor proficiscatur. Atque hinc est illa urbium ex saxo quadrato aut marmore assurgentium nivea pulcritudo: hinc Genuæ longè latèque superbientis, Neapolis & Terra-

Terracinæ tanta commendatio, ut &
Poëtæ in itinere Brundusino exciderit,
Impositum saxi latè candentibus An-

xur.

Quantum ad ceram dealbandam conferant soles, artifices jam satis edocti sunt; de lineis telis, fuscis & obscuris, nemini non domesticâ observatione notum, eas alternatis dierum noctiumque vicibus in albisimum exsplendere colorem, etiam nivibus certantem. Flores, qui infiniti sunt albi, inter quos facilè primus Liliorum candor, Soli sese debent æstivo multùm validèque superficiem expolienti. Putem autem, ut hoc addam, non aliunde nasci hunc candorem, quàm ab humoris bullati & intra rotundas lævesque pelliculas adacti mutuâ refractione; so- lam enim partium texturam in colorandis corporibus plurimum posse, & in albedine quidem ad convexitatem quandam superficiei disponi, evidentibus experimentis notari potest. In dealbandis autem lineis telis sine

H s

Sole

Sole frustra laboratur; is enim est, qui rorem nitrosum, noctu in poros receptum, per omnes angulos particulasque adigit, lixiviique aut glutini, quod à texturâ imbibent, saporis seu fimi equini (nam hunc quoque utpote nitrosum ad eluendas telarum sordes, & in odoris veluti moschati compendium adhiberi compertum est) aut si quæ sunt aliæ sordium fuscæque partium reliquæ, attenuat, dividit, multoque rariorem reddit & quasi crystallinam pororum texturam, quæ deinde mutuâ repercussione, ut in spumâ evenire solet, albedinem repræsentet. Certum adeoque est nullam sine roris humorisque diluvio conciliari telæ albedinem posse, hic enim propriè est, qui nitrositate penetrabili pinguedinem amylatam solvit, & sic satis attritam radiis solaribus lineum illud planum ultrò citròque perambulantibus extrahendam committit. Pendet itaque totum hoc negotium ab objecti naturâ radios ipsos modificantis, pendet ab aliis circumstan-

cumstantiis; namque, ut alia à colore suo facile deferuntur, sic alia eum fortius intendunt, vel cum illustriore permutant. Video autem plura esse, quæ nitorem aut albedinem à Solibus contrahunt, quàm quæ nigredinem, nec dubito, quin, si curam admitterent viva & intestinorum humorum influxibus obnoxia hominum corpora; etiam hæc ad candorem disponi possent; verum texturæ illa conditio & fluidorum mobilitas cutim diversimodè afficientium non sinunt, ut Solis imperium in hoc purum sit atque inviolatum. Quare animalium ossa non antè albescent, quàm ille succorum exæstuantium motus defecerit; in terræ autem cryptis, ubi à Sole remota humiditatem imbibunt, magis etiam nigrescent, potius quàm ut albedinem induant. Nempe utrumque necesse est concurrat ad superficierum candorem, modò humida & velut per deliquium solutio, modò lenta & digestiva per Soles extractio. Vapores nocturni decidui, rore nitroso
admo-

admodum pleni, cum omnia dealbanda, tum maximè ossium per agros sparsorum sulfuream gravem & fœdam medullam salino acumine solvunt, secumque unà solaribus radiis inferunt, donec superficie post succorum corruptibilium exitum particularumque attritionem æquatâ vel rariore redditâ albedinis passim color respondeat. Certè non crediderim alio quam vivo & obvio ossium in campis candicantium experimento admonitum Medicum clarissimum, in novam sceleti humani effingendi & dealbandi rationem incidisse; quamvis esse etiam extemporales quosdam & fastidium hoc levantes modos observatione edoctus sim. Unde constare puto, non nisi subjecti vitio oriri nigredinem, nullamque in Sole esse causam positivè aut absolutè denigrandi. In igne, fateor, culinario, crasso & fuliginoso alia res est, in illo enim omnium colorum residere species liquidò apparet: quippe illo conficiente, non ex albis tantum, sed quibusvis coloribus,

Ioribus, modò flammam admittant, evadunt nigra, mox etiam dealbanda. Nigredinis autem corporum ustulatorum non aliam esse causam existimo, quàm quòd duplici constent sulfure; quorum unum volatile, superficiale & flammæ rutilantis materia, alterum crassius, viscosius, denique αἰθαλῶδες, procurrente longiùs igne depascendum, sed maturè extinctum, post flammarum aliquot impetus, superficiem lentâ nigredine obducens. Enimverò nunquam fixam illam & ultimam nigredinem corpora dimittunt, nisi aperto igne vastata; nam Chemicorum observatis jam satis notum, carbonem in cinerem, hoc est, nigrum in album non mutari, nisi liberior aër fuliginosi sulfuris expansionem admittat. Vocatur autem nigrum istud, quod ignis nondum penitus pervasit, *adustum* aut carbo, qui nihil aliud, quam cinerum superficies crassis mollibusque & striatis sulfuris particulis colligatæ & obductæ; quas ubi ignis diuturnior & severior

rior exhaustit, in discretum minutissimumque corpus, *perustum*, cinerem aut calcem nominatum, concedunt, modo ne fusio aut vitrificatio, ut vulgò loquimur, continuitatem reducat. Mira profectò res, albissima quæque, sed oleosa, per tot rutilantium flammarum colores, cœrulum, flavum, viride, rubrum, fumosum, transire in carbonem, ex carbone denique in cineres. Est tamen etiam alia species nigredinis emanativè, si licet dicere, producta, & ex mediis flammis in objectum ustulandum perrumpens, uti imminens lucernæ conus & caminorum cava satis ostendunt; sed verò talia, quæ crassi & miscellanei ignis sunt effecta, Soli, purissimo floris fonti, adscribere velle haud est consultum; cum ne quidem ignis culinaris aut sublunaris omnem carbonariam nigredinem inducat; cum carbones fossiles, nigri & flammarum commoda incentiva, cespites, *Turfas* Belgæ vocamus, sub ipsis aquis nati, ne quid apricissimis Ericetorum campis tribuere

tribuere videamur, sine ullo igne, nisi fortè olim subterraneus fuit, promptam ardendi facultatem conceperint. Quare tum demum à Sole nigredinem Æthiopibus nostris inustam esse censebo, quando halitus illos superficiales, pingues & viscosas, nobis ostendent argutuli. At verò non est, ut jam antè vidimus, Æthiopum illa nigredo superficialis, non liturâ inducta, qualis est fossorum in carbonariis, sed interna, subcuticularis, nec ullo saponatorum lixiviorum acrimoniâ eluenda. Ergo, quod pridem attigi, lineamentorum ista proprietas, pilorum nigerrimorum crispa & setosa asperitas, alibi etiam absentia, naris retusæ & labrorum repandorum peculiaris forma, illa oculorum micantium mobilis petulantia, & dentium in medio noctis hiatu incredibilis candor, & alia bene multa hisce gentibus propria, persuadere haud dubiè videntur, quod omnia uni eidemque principio sese debeant, &, quemadmodum nec lineamentorum tractus à Sole

le

le dependent, sic neque colorem dependere. Accedit, quod in vultu, qui tamen præ cæteris partibus, hîc saltem terrarum, Soli est expositus, pellucens quendam ruborem notaverim; ita ut color, prout radii lucis incidunt, non tam niger videatur, quam *brunus*, ut vulgò vocant, aut talis, qualem fuliginosa nigredo Minio leviter imbuta exprimere apud Pictores solet; quòd utrum eveniat tenuitate cuticulæ, quæ rubicundum cutis colorem transmittat, an verò fuliginosi reticuli rariore texturâ, non facîle liquet. Non autem est absurdum, mollem cœli nostri humiditatem partem illam magis dissolvere, & ad transmittendum cutis ruborem disponere, cùm manifestum sit Nigritas, quando in hunc orbem emittuntur, pallefcere cum tempore, & nigredinis profundioris partem amittere. Immo, nisi in cæterâ corporis mole pertinaciùs hæssisset nigredo, credideram gentis ipsius peculiarem quandam notam esse, quoniam ipsi quoque inter se

Æthio-

Æthiopes pro plagæ diversitate in colore & staturâ mirificè varient: ita ut exercitatissimus Piso in Brasiliæ descriptione affirmet se Nigritam vidisse rubris planè capillis & vultu rubro, hoc est, ut ego interpretor, cutis subjectæ rubedine per cuticulam mediamque fuliginem sese luculentius ostendente. Denique, si illa quoque argumenta delibare licet, quibus Brounius Boylæusque toti incumbunt, nihil magis evicerit colorem illum non esse à Sole, quàm quòd in aliàs deducti peregrini orbis colonias, etiam in illâ vitæ & aëris mutatione, eundem colorem non tantum servant, verum etiam in sobolem propagent, non antè lineamentis aut colore mutatis, quàm mīsturam gentis fecerint, & ne tum quidem facilè obliteratis notis, quando hæcenus simæ nares & deturpata labra Hispaniensium Indorum characterem & vultum jam inde à centum annis vitient; Lusitani contrà, notante Edôardo Lopesio, in illis Nigritarum Provinciis integrum &

quod excurrit seculum viventes, necdum tamen formam istam nigredinemque Æthiopum imbiberint; ut adeo nihil Sol ad colorem istum tam peculiarem conferre videatur. Sed, cum totæ quoque gentes, iisdem expositæ caloribus & Sole vexatæ magis perpendiculari, & illo vultus caractere & nigredine careant, quid aliud judicare æquum est, quam aliam esse eorum originem. Percurre Vir Excell. vastos Americæ tractus & Æthiopiæ parallelos, Indiæ utriusque spatia, omnes ibi fuscis aut candidos reperias, neminem nigrum, nisi origine Afrum aut vernam.

Caput Duodecimum.

FRigori perinde ut Soli denigrandi relietam esse facultatem, & in ultimo Septentrione etiam obscurum & fuscum haberi corporum colorem ex Hippocratis notabili loco variisque exemplis constare videtur; aliam tamen esse Septentrionalium, aliam eorum,

eorum, qui in Meridie degunt, fuscitatem; illam lividam & à coägulo oriundam sanguinis, hanc rubicundulam, & nimie cùm siccitati tum raritati & effervescentiæ tincturaque Bilis deberi.

VErùm ut paulò altiùs rem arcessam, & nihil adeo Soli imputandum esse constet, eadem fuscitas, cujus aliàs nutriculam esse Solem existimant, in ultimo quoque septentrione major & propemodum tenebrosa, ubi omnia tamen albisimis nivibus perfusa externo frigore horrescunt. Sed quis candorem ibi expectet, ubi noctium frequentissimæ vices, dierum rarissimæ, ubi aër, & ipse crassus, corporum texturam superficialem non tam fundit aut laxat, quàm in obscuram, fuscam obscuramque nigredinem contrahit, ubi tandem maximam anni partem damnata omnia & *in nubem spissæ caliginis versa*, ut Solini istis utar. Est tamen in his locis Solis indigentia, frigoris vis immensa, cujus si in contrarium tanta vis est, cur

livescunt ibi corpora inter medias candidasque nives? scilicet, qui à sanguinis spirituumque raritate oritur nitor candidus, facîle in isto frigore comprimitur. Hinc illæ Norvagorum, Lapporum & Samogitharum obscuræ facies, ut quæ Solis alibi est facultas, eam hic frigoris esse intelligamus. De Lappo-
nibus P. Jovius, *Exigua illis corporis statura, luridi contusique vultus*. Ita verò, citante eruditissimo Scheffero in Laponiâ suâ Petrus Claudius, illarum aliquando gentium vivus hospes, de Norvagis, *Nigri admodum sunt ac fusi coloris in corporibus suis*. De Samogithis ad unum omnes, qui vel Russorum viderunt provincias, aut ad fretum N. Zemblæ navigarunt, fusco esse colore & olivam referente; ne quid dicam de Americæ septentrionalis incolis paulò etiam obscurioribus, ut Forbissenus notavit, aut quod de Gronlandorum colore aliis jam compertum. Licet autem hoc à vivendi genere deduci posse videatur deduxeritque olim Schefferus

ab ignium illis fumis piceis subterraneisque, quibuscum inde à primâ nativitate colluctantur, à squalore illo perpetuò & rarissimo Solis usu, tamen nihil prohibet, quò minùs ab ipso etiam frigore, ab aëre cum nebuloso tum crasso rugosam illam & nigram cutis superficiem deducamus, quæ deinde ex ingenio loci nata obscuritas in posteros transeat eodem usque aëre fovenda.

Sanè eam ferè fuisse Hippocratis sententiam ex illis, quæ libro de aëre locis & aquis habet, manifestum est;

πυρρόν δὲ τὸ γῆρας ἐστὶν, ἰνquit, τὸ σκυθικὸν διὰ τὸ ψυχρὸν, ὅθεν ἐπιγινώσκουσιν ὅτι οὐκ ἔστιν ἡλίου, ὑπὸ δὲ τῆς ψυχρῆς ἢ λευκότητος ἐπιμαίεται καὶ γίνεσθαι πυρρὴν. Sed Cornarii hic versionem,

cùm quòd memorabilis est locus, tum quòd à nemine antè in eam rem adductus, pace tuâ, adferre liceat; *Schytharum gens fulvi valde coloris existit propter frigus ingens, non enim vehemens ad illos accedit Sol, à frigore verò exurit albedo & fit fulva.* Ne jam Solibus amplius suis Afrî denigrandi

tribuant vires, suppeditante etiam hanc facultatem frigore. Egregium hic esse significatum τῆς ὀνείδης & ipse mecum agnoscis Virorum optime, planè in Virgili illo expressum,

penetrabile frigus adurit.

Sed quæ illa frigoris adustio, quam adeo ignibus tantum suis reservasse vulgus videtur? Si Chemicorum insistere vestigiis licet, utrique, cum calori igneo tum frigoris acrimoniæ, urendi esse potentiam deprehendimus. Caustica sanè, quæ sunt ignes Chirurgorum potentiales, modo lixivis, i. e. calidis, modò acidis, hoc est, frigidis salibus animantur. In igne quidem mobiles sunt & miscellaneæ urendi vires, in cauteriis lentæ & non nisi morâ penetrabiles, sed tamen in his ipsis distinctæ & multum à se diversæ. Plerunque, quæ acida exedit acrimonia, flavam consequuntur superficiem, quæ salsa, rubram, obscuram & tandem nigram. Mercurius indomitus aliàs igne aperto & mobili, igne potentiâ frigido seu acido in flavum

vum aut rubicundum pulverem exuritur. Supponamus ergo Borealem atmosphæram acrimoniâ salinâ & acidâ seu aluminosis & adstringentibus particulis perfundi, ut sic ipsa cutis textique reticularis superficies leviter vel arrodatur aut stringatur, sanguis deinde ipse, cujus raritas plurimum tribuit colori, in coagulum abeat, & hætenus lividam potius tincturam, quàm floridam roseamque per habitum reflectat. Nam, si interponere judicium meum possum, putem longè aliter septentrionalium fuscitatem temperari, quam Maurorum istam, ipso etiam sensuum testimonio rem evincente. Scriptores, fateor, parum in hoc sunt solliciti, & ipse Hippocrates *πυρρόν* ausus est vocare satis licenter, quem P. Jovii & aliorum fide accepimus esse lividum. Sed humorum exigenti naturam facilè apparet, etsi in obscuram fuscitatem uterque desinat color, tamen aliam esse ubique rationem; in Meridie enim à sanguinis raritate & tincturâ biliosâ in rubicundam

dulam fuscitatem , in Septentrione , à coāgulo ejus & frigore pituitoso in livorem cogitur ; ut vel februm documento constat , quarum frigus , cum à coāgulo procedat sanguinis , lividum cuti pallorem ; calor , qui à bilis tincturâ ni-
miūm quantū exaltatâ oritur , impen-
sum & igneum tribuit ruborem. Cre-
diderim tamen etiam in Septentrionali-
bus , propter effluviorum à calidis pel-
lium villis percussorum copiam , in
illo corporis malè curati pædore , ag-
glutinari cuticulæ particulas , quæ ha-
bitum obscurent fuscitatemque au-
geant.

Caput Tertiumdecimum.

*L*aboriosius inquiritur , an frigus simpli-
citer albedinem in Septentrione pariat.
*Dubia & observata de anniversario pilo-
rum animalium candore ; aërem ali-
quid , plurimum tamen alimenta , potum
& vitæ genus conferre conjecturâ & exem-
plis deducitur.*

Veteres

VEteres, cum mediæ & torridæ Zonæ vim attribuissent denigrandi & ustulandi corpora, ex contrariorum naturâ Septentrioni alba imputaverunt, dubio hoc experimento persuasi, quòd quæ remissior ibi tempestas proprio aut obscuro colore adflaret, ea ad hyemem, nivium & glaciei certamina, niveam recuperent albedinem. Sed non erat, cur tantum sibi sumerent animorum, qui non aliud habent argumenti sui pondus; nam in ultimo Septentrionis angulo non volucres tantum sed & belluas reperias meram noctem nigredine ostentantes. Quid? annon Cete, quæ sese inter glaciales moles velut in palæstrâ exercent, nigerrima sunt & Æthiopum illum colorem provocant; & est eorum ibi innumerabilis copia & immensa vastitas, &, quod mireris, in horrido illo damnatoque frigore pinguedinis tantum, quantum Europæ sufficit ad Lychnos; neque illa fixa est aut terrea, sed tam volatilis & spirituosâ, ut non secus ac vinum ebulliat, despu-

met, vasculorumque nimium rigorem rupturâ mulctet: Vacca deinde illa, etsi nigra non est, tamen nec alba, & ipsa mole pinguedineque gravis: ut quemadmodum torridam zonam pingua alere fœcundaque animalia jam antè notavimus, sic etiam ultimo Septentrioni eadem constet felicitas, & Nitrum, fœcundandi illud principium, calori perinde atque frigori associare se videatur promiscuus passim hospes. Vituli marini aut Phocæ non planè alben, sed suo & certo gaudent calore, &, ne quid frigoris injurias obsistere credas, copiosissimo perfunduntur sanguine obstinatissimæ vitæ. Jam verò Ursi & Vulpeculæ non albæ tantum sed & nigre; avium autem plurimæ, quas frigidus aëri vivendi adstrinxit conditio, nigre sunt, ne à frigore solo qualitatem arcessamus, quæ arcaniores poscit causas, & figuræ texturæque superficiei debitas. Quod autem vulgò animalia, quæ æstate obscura sunt gilva aut nigra, hyeme ibi canescant, illud ut non negem

gem in plurimis verissimum esse, nam in vicino Septentrione res compertissima, tamen non putem adeo hoc omnibus promiscuè evenire, neque, si evenit, causam illorum juvare, qui id simpliciter frigori adscribunt. Nempe non fuit historia ita temerè, ut narrabatur, accipienda, vel propterea, quod qui primi jactarunt hoc paradoxum, sola se Olai Magni auctoritate tueantur. De Vulpeculis quidem Leporibusque etiam hodie narrant, eos hyeme candidis conspici pilis, qui ad æstatem si non exuant at saltem remittant colorem illum. De Ermineo animali, quod Hermelinum Olai Magni, quæ Mustela Septentrionalium & Lapporum, idem cognitum est: at verò non obscure indicio præclarissimi Schefferi ex MSS. Suecicis notare visus sum, esse plura ejusmodi animalia perpetuò alba, multisque temporum mutationibus obnoxia, & inter ipsa hos Hermineos, quos proinde vereor, ne falsò accenseant eis, quæ hyemalem vicissitudinem

rudinem sequuntur. Deinde haud parum memoratur, quòd non sit annotatum, quâ potissimum parte illa pilorum mutatio contingat, summâ an infimâ, & num ad lanam quoque pilis subiectam, quâ imprimis densa Vulpeculæ & Lepores vestiuntur, idem iste color penetret, an verò etiam soli proprius. Accedit haud vana conjectura videri in istis poris, quibus hæc accidit mutatio, semina candoris æstate quoq; delitescere, & intendi duntaxat hyeme latiusque propagari, evidentissimo, nisi fallor, in vulpinis leporinisque pilis experimento. Esset etiam cognitu necessarium, num eidem pili sic canescentes in seram æstatem perdurent, an verò dispereant, subnascentibus aliis ab hyemali isto & decrepito candore diversis; illum enim pilorum casum plurimis esse animalibus familiarem & velut anniversariæ senectæ spolia vulgatum est. At verò hoc quoque præteriri non debet, quòd nulla adeo sint absolutè nigra, quæ albedinem induunt, sed

sed dubii plerumque coloris, quique
 haud multum à cinereo distet. Certè,
 quæ nigra sunt, etiam in Septentrione
 constanter & usque servant colorem
 illum; & licet vulgus, & qui oculatâ fi-
 de descripsisse rem visi sunt, coloris il-
 lam mutationem crebrò jactent, tamen
 nescio quid suspicionis ex illis Samuelis
 Rhenii apud Schefferum mihi subnasci-
 tur: ait ergò, *Aves nivales, Lagopodes,*
hyberno tempore penitus sunt candidæ in-
star nivis, neque ullam nigram habent
pennam, exceptis iis, quæ sunt sexus fe-
minini, quæ pennam habent unicam ni-
gram sub unâ alarum: hætenus certè
 nigram esse avem mihi persuaferam;
 sed quàm dissimile huic quod sequitur?
appropinquante autem vere griseum re-
cipiunt colorem, quem & servant ad tem-
pus hyemale, quo denuò fiunt candidæ.
 Igitur nunquam fuerunt nigræ, & quæ
 sunt griseæ, induunt tantum candidum
 colorem, quod & ipsum tam à naturâ
 quàm fideli narratione minùs est alie-
 num. Corvos nasci albos in Septentrio-
 ne

ne sine ullâ mixturâ nigredinis notum jam est, at verò ex nigris ipsos tales evadere, necdum fando auditum. Ut jam suspicari jure liceat, quæ animalia candorem hyemerecipiant, ea antè fuisse vel cinerei aut saltem gilvi coloris, nequaquam nigri. Quæ verò sit causa, quòd quæ sub eodem parallelo & in viciniâ degunt animalia, alia admittant hanc coloris mutationem, alia respuant, id quidem, CAROLE DRELINCURTI, crisi tuâ non indignum. In Scaniâ canescere Lepores, quòd neque in Zelandia nec procurrente Cimbriæ angulo evenit, vulgatissimum hîc est. Eruditissimus Olearius refert in itinere Moscovitico, in Livoniâ hyeme candescere Lepores, qui tamen in viciniâ Curlandiâ nihil tale patiantur, solo Duinâ virtutem hanc velut sequestrante: quâ occasione mihi in memoriam revoco, quod Scriptores novelli de Guineæ Angolæque oris testantur, nempe, qui cis Senegam habitant, Afros, licet eodem aut majore torreantur Solis æstu æquinoctiali

noctiali propriiores, quàm qui ultra & fluvii tantùm spatio discreti degunt, non tamen eo imbui colore, quo vulgò germani Æthiopes gaudent. Unde apparet, non tantùm Solis hic nullam vim esse, verùm etiam aliam subesse & peculiarem tam præcipitis mutationis causam. Quod aliqui de aquarum genio, aut certâ aëris vel fundi conditione suspicantur, id pariter incertum. Inesse aquis tingendi facultatem haud ita improbabile: scimus Veteres multum Clitumno suo tribuisse, & illi boves religioso candore sacros imputasse. Posse deinde aquas metallicas aut sulfureo sale delibutas tincturæ aliquid velleribus immittere aut coriis animalium facilè sum crediturus, modò experimentorum suppetat copia, quæ ego levi curâ in animalibus per potum, Vitriolatis Nitrosisque salibus infectum, fieri posse existimo. Quòd si in pilis jam antè formalis albedo refedit, ipsam cutis texturam attendendam esse arbitror, nam reflexiones illæ luminis per pororum

rum figurarumque in minimis situ ex
facili variari solent. Sunt pili corpora
tubulata plurimis & exilissimis confla-
ta cylindris, multo interveniente succo,
qui, prout tincturam imbibit, sic eam
passim in solidum diffundit: itaque pro
copiâ, tincturaque succi illius mutari
pilorum $\phi\alpha\pi\upsilon$ necesse est; sed verò illa
se internæ sanguinis dispositioni & po-
rorum, quibus efflorescunt pili, con-
textui debet. Ut probabile jam sit, se-
cretiorem aëris influxum, qui mutare
minimas & indivisibiles sanguinis par-
ticulas potest, etiam pilorum illum suc-
cum ad tincturam modificare posse; si-
ve sola sanguinis hyemalis, tanquam
siccioris & densioris, conditio, seu si-
mul inde pororum strictura hîc con-
currat. Aer tamen ipse etiam per se,
prout est rarior & grandioris capax e-
lateris, seu densior, ita variare luminis
illam reflexionem in pilis potest, sicut
id imprimis aëris, quo abundant, undu-
lantis copia ostendit. Sanè pili, etsi
solidi videantur, perfunduntur tamen
non

non succo tantum sed etiam aëre. Sint
 setæ suillæ solidæ & aëre cassæ, habeant
 minus subtilioris auræ vel Elephanti i-
 sti, aut Hippopotami, seu Vaccae fluvia-
 lis pili, Avium tamen plumis, quibus
 moles illa solidi in aëre sustinetur, & a-
 nimalium velocissimis, Cervo impri-
 mis, Lepori & similibus, hisce enim
 propter volatilem levitatem multo o-
 pus erat fluido, copiosam intra pilorum
 poros recondi aëris materiam, omnino
 spontè, & memorabili admodum ex-
 perimento cervinæ pellis, quod recitat
 in vitâ Peireskii Celeberrimus Gassen-
 dus, persuadeor. Quòd autem, ut ad
 priora redeam, non perinde omnibus
 in eadem atmosphærâ similis contin-
 gat mutatio, effluviorum aliquorum
 singulari transpirationi imputandum
 est, sive hoc ab ingenitâ causâ, seu ali-
 mentorum conditione aut aquarum
 temperamento nacta fuerint, quæ et-
 iam in exiguis sæpe terrarum tractibus
 variari solent. Equidem, pilorum ja-
 ctura in multis anniverfaria, transpira-

K

tionis

tionis modò ficcioris nunc humidioris
 copiae, tum laxitati & pororum strictu-
 ræ deberi manifestum est, ut jam non
 dubitem, quin ab iisdem causis colo-
 rum istæ mutationes deduci etiam pos-
 sint ipsâ jacturâ minores. De poro-
 rum texturâ solæ cicatrices documen-
 to sunt, quantum ad pilorum sive efflo-
 rescentiam seu colorem conferat: Re-
 licti post variolarum ferociam nævi
 non transmittunt pilos, quòd textura
 illa vitata sit, & proportionem pilorum
 arctius cōacta; in Equis & aliis, ubi ru-
 dior corii dispositio & pilorum vis ve-
 hementior, perrumpunt quidem per
 cicatrices pili, sed ex nigris candescunt,
 stricturâ & siccitate meatuum, quæ
 callo propria, sic modificante colorem.
 Alimenta & ipsa in succorum mutatio-
 ne valent plurimum, præsertim, si fer-
 mento consent salino, ejus enim in
 mutandis coloribus potissimas vires es-
 se non dubiis observationibus confe-
 ctum est. De Vitriolo diu jactatum est,
 illud sive in potu seu alimento exhibi-
 tum

tum nigredine tingere, & ego, postquam id in Atramenti Theriacæq; confecturâ demonstratum vidi, circumspectius arbitrari cœpi de illo Rhasis Lib. 25 Contin. Cap. 24. *Epotam Calchanti drachmam unâ nocte albisimos pilos nigris permutasse, & aliquem ex Cygno Corvum factum.* Non existimem te fugere experimentum, Vir Excell. quod ad scutellatam Equorum nigredinem cum tuendam tum reducendam adhibere nunc passim solent, nodos sc. & gemmas Quercuum, Vitriolato succo adhucdum foetas, quas cum primo vere avenæ permiscent, satis inde diu impressæ scutulæ notæ adhærescunt, & canities in nigredinem vertitur. Protritum est succo Quercino multa nigrescere, siue habitum immutet partium, seu particulis Vitrioli striatis & asperis superficiem obducatur. Est fortè alibi foecundior Vitrioli aut Salis vegetativi sub terris aura, quæ nec hyeme cesset, adeoque in plantas aut alimenta irrepens æstivam nigredinem pertinaciter defendat.

dat, alibi contrà & in vicinis aliquando locis rarior, aut ad hyemen deficiens, ita ut ad fermenti salini & tingentis indigentiam ipse quoque nitor pilorum & nigredo intereant, succedente canicie, quæ profectò haud contemnendum præbet laborantis pabuli & siccioris naturæ indicium; mox iterum ad succorum vernantium & salinorum generationem propulsanda. Nunc ergo, quia denigredine sermo, quæ alimento aut potu procreatur, posset aliquis suspicari, annon in Nigritis quoque color iste Vitriolatis se debeat alimentis, an verò etiam auræ illi nitrosæ, quâ diximus æstum plagæ Æthiopicæ emendari; verùm id curiosioribus decernendum relinquo.

Caput Quartumdecimū.

Quanam ergo sit primæva nigredinis causa, & num à parentibus in nepotest translata, originem debeat vetustæ Ludæorum gentis mutationi, queritur; de-
generasse

generasse habitum & colorem gentium iam initio rerum, postquam affectibus & a sociâ duci homines cœperunt, est verosimile; tum etiam in unum primò objectum factam impressionem ab imaginatione in nepotes manasse, & colorem simul illo habitu, continuato eodem vitæ ordine, infamiliâ non tantùm aut gente, sed natione habuisse, non videtur absurdum.

Cum nulla hætenus veri similitudine Nigredinis Æthiopicæ origo sit probata, dispiciendum obiter est, num ingenii viribus primam ejus causam assequi possimus. Hodie quidem tam habitum quàm colorem illum, parentum esse transktivam notam facilè liquet, &, quam quisque pro se, tum Æthiopes, nacti sunt proportionem, femini deberi sive paterno seu materno, illi, tanquam efficienti, huic velut materiæ. Nec tamen propterea fingere oportuit semen parentum nigrum esse, cum sub quovis colore potentia & fermentorum diversissimorum capax sit,

nec color ille superficiei interni spiritus affectiones designet. Habet in se genitura cum paterna tum materna, in minimis etiam atque indivisibilibus, certam & relativam ad objectum potentiam. Paternum quidem semen centrali fermentorum spirituumque ideâ præditum in Matris genituram determinatè agit, & pro partium & figurarum, etiam quæ insensiles sunt, patientiâ omnia disponit & moderatur, nec pellicularum, aut quæ sunt abjectissima corporis nostri, negligens. Maternum & ipsum occultis latentibusque instructum solidarum partium ideis excipit spirituum è paterno semine emergentium potentiam, seque proportionatâ ex æquo ratione passivè accommodât. Nigredinis itaque semina vel efficienter in semine paterno aut dispositivè in materno latent, vel ex æquo utrique se debent. Ego autem, etsi nonnulli aliter sentiant, perinde paterni seminis potentiam determinatam esse existimo, ac est materni, nec ullam

ullam utriusque, ut loquuntur, indifferentiam locum habere. Lateant in semine seu ovo materno nigredinis habitusque Æthiopici vestigia, tamen, ut in actum emergant, opus est modali & determinatâ spiritus plastici efficiaciâ, ille enim est, qui occultas & implicatas solidorum formas ab aliorum mixturâ secernat sensuique exponat, ipse insensibilis & terminis materiæ inclusus. Per illam spiritus actionem est, cur à Patre quoque nævi & maculæ in fœtum defluant, nec solis Matribus formandi relictus sit locus. Tantundem autem est, siue dixerim vultus illum characterem, simas nares & repanda labra, seu nigredinem istam, transfundi, utraque enim eâdem facilitate & ab eodem principio descendunt. Est autem color etiam figuræ affectio, adeoque & spiritus plastici motibus obnoxius. Non est, fateor, adeo dictu difficile, quomodo jam antè in parentibus existens nigredinis nota ad fœtum transferatur, cum quotidiana sint & obvia ejus rei experimen-

ta. Migrant nempe ipsæ illæ ideæ, & colliguntur ex sanguine in semen, tanquam centrum, inde rursus motu spiritus intestini evolvendæ. Habitus sane Æthiopici colorisque ideæ latent in sanguine, atque in semen aut ovum concentrantur, unde ad spiritus plastici fermentationem rursus explicentur. Plurimæ hodieque receptum est, condi in ovo corporis istius lineamenta, in quod deinde excrefcit, partium nimirum formas minutim descriptas, atque etiam colores; in Ovi namque albumine præter articulatam solidorum seriem colores quoque erumpunt, ille viscerum modò rubor nunc albedo, illa pennarum picta varietas, &, quod stupendum est, ex crystallino & uniformi ad sensum humore. Hæc tamen non antè se exserunt, quàm spiritus indeprehenfi fermento aut motu è potentiâ materiæ educantur & conspicua fiant, illud enim adeo est, quod actum & potentiam distinguat, magnitudo sc. & color; hisce enim

enim arbitris tantum termini partium
& quantitates commodè dignoscun-
tur. Illa autem sic potentiâ inclusa,
etsi oculum fugiant humanum ac pro-
pterea inesse sapè negentur, insunt ta-
men revera, & si naturam substanti-
amque spectes, etiam actu, divino au-
tem oculo planè *γυνὰ καὶ τετραχηλίσ-
μῳ*, ut eleganti & sanctâ metaphorâ
Apostolus alibi loquitur. Ut ergò for-
mæ latent in liquore & fermenta acti-
va, quæ figuras demum solidorum di-
sponant, ita inesse semini Parentum,
quod illa Æthiopum lineamenta, illum
colorem determinet, omninò est ne-
cessum: occulta quidem sunt principiò
in sanguine, deinde etiam semine, ni-
gredinis vestigia, sed, postquam in so-
lidum & quantitatem materiæ diffusa
est, jam colore signari, jam visu etiam
aliisque sensibus cognosci potest, olim
adeo remota & quasi nulla. Sed tan-
dem horribile suboritur & oedipo di-
gnum secretum, unde prima illa habi-
tus colorisque Æthiopici impressio ma-

naverit usque continuata, hætenus enim vulgata argumenta rejecimus. Jam inde à Noâchi temporibus incubuisse genti illum colorem non possum arbitrari, quia inter filios ejus nemo, quod credo, tam ater sit repertus, & à Ludo demum Mizraîmi filio, Æthiopum numerare gentem sagaciores cœperint; sed neque hoc quisquam dixerit, utrùm qui genti nomen, continuò etiam habitum & colorem intulerit, quamvis justa sit suspicio unum gentis auctorem animi simul corporisque notas tradidisse. Si enim in varias formas coloresque discerpta fuisset familia, totidem jam vestigia in eadem regione comparerent, quæ tamen unâ gente & per omnia sibi simili hodieque incorrupta, nihil foveat alieni. Verùm fuerit Ludus, aut quisquis ille est Æthiopum auctor, nigredine perfusus, certè nisi ejusdem fortis conjugem erat reperturus, deficere debuit ex parte color in altero obscurior; ut adeo ex mixturâ gentis etiam primi illi prognati videantur; nisi

nisi quis malit ejusdem habitus coloris-
 que feminam constanti & mansuræ po-
 steritati occasionem dedisse. Jam verò
 unde illa Ludi, unde sociæ conjugis ni-
 gredo? an imaginatione & vitio paren-
 tum à teneris, an diætæ culpâ, & in serâ
 ætate contracta? Quod si ab imagina-
 tione materna, Patris enim nullæ hic
 sunt partes, quâ formâ, quo objecto,
 cujus nunquam antè extiterat similitu-
 do, in tristem incidit damnatumque
 colorem prima illa Æthiopum geni-
 trix? Incidisse quis dicat in picturam
 casu aliquo formatam & monstro quàm
 vitæ similiorem, cujus deinde per o-
 culum influxus sanguinis seminisque
 ideam modificârit, ut esse illa vis ima-
 ginationis solet. Oves Jacobi, ut dubii
 coloris partum producerent, umbram
 tantùm viderant varii coloris in stipi-
 tibus, & per medias aquas refractam, &
 tamen sola erat tincturæ in fœtu, non
 figuræ mutatio; non enim erat perinde
 insolens baculorum forma, ut coloris;
 quippe quem in baculis fortè, & in lo-

co tam inusitato, unde major vis esset impressionis, nunquam viderant. Ex imagine Andromedæ candidioris apud Heliodorum enata est Regina candida, cujus vivum exemplar Mater nunquam antè conspexerat. An ergo eum in modum picturâ aut statuâ, nam ex hac quoque erroris occasionem natam esse scio, imaginatio formata in foetum transierit, non definitio. A diæta autem multò minus est quod promittere possim, minimum etiam ab affectibus; non enim tam superficialis est illa Æthiopum nigredo, sed organica ferè & non levi Naturæ studio procreata. Vidimus animalia nonnulla colorem ab alimentis trahere, & ex Vitrioli drachmâ pilorum tincturam immutari; notum quoque exemplum, nisi fides laboret annalium, juvenis unius noctis curâ canescentis: sed tam artificiosam tamque altè insidentem nigredinem haud temere ab animi corporisve sollicitudine expectes. Quare, si spontè & non statim ab initio incubuit nigredo,

do, credibile est ab imaginatione, cujus
 semper fermenta partiumque figuras &
 colores immutandi magna vis fuit, pro-
 fectam tincturam omnem quoque po-
 steritatem infamasse. Hanc itaque ob-
 jici mihi video magnam difficultatem,
 quemadmodum ex unius vitio in ne-
 potes adeò multos transferri habitus
 ille potuerit, ad paucos duntaxat ejus-
 dem familiæ aut gentis posteros vulgò
 pertinens: nam, licet imaginatio nunc
 quoque notam inurere genti soleat, ni-
 si sollicitè familiam mutuis & intestinis
 conjugis tueantur, vix sperare diutur-
 nitatem notæ impressæ licet. Sunt in I-
 taliâ & Galliâ, imo etiam Germaniâ fa-
 miliæ notis gentiliciis insignes, sed
 neq; in omnes perinde nec eodem mo-
 do transeuntibus, imò tandem morâ
 defecturis. In Æthiopibus autem jam
 inde à tot seculis intemerata mansit fi-
 guræ colorisque ratio, non in familiam
 tantum aut gentem, sed innumerabi-
 lem nationum numerum propagata.
 Quare, si semel ab imaginatione pro-
 cessit

cessit illa vis, necesse est vehemens illa fuerit & mirabili consilio DEI temperata; probabile enim est impressam uni notam, in infinitum venturis usque posteris suffecisse, potentiâ per tot sese deinde gentes actu explicante: Sanè, ut nunc res sunt, declarari commodè negotium hoc potest per feminarum ovarium, infinitis, nisi credere religio sit, cum ovulis tum ideis partium foecundum: in hoc totum necesse est primò vis illa imaginationis transierit, antequam eundem planè habitum coloremq; in familiam derivare possimus. Fiunt hodie etiam in uno alteroque individuo mutationes non leves, sed vix in totam familiam, ne dicam, gentem, redundant. Ut jam uniformem concipere ovarii partiumque ejus mutationem in primâ gentis origine debeamus, atque ita singulis ovis impressam sive formam seu ideam, in immensum sese multiplicantem, nullâ amplius arte, solâ imaginationis vi, deficere posse, raro & tamen minimè pertinaci exemplo

plo in Dondos; nam est aliàs habitus ille Æthiopicus contumacissimus: quò magis constet, imaginationem, si quæ fuit, singulari Dei opere primùm productam, nunc etiam intemerato vivendi ordine & gentium alienarum sollicità abstinentiâ, quæ est Æthiopum & omnium Barbarorum conditio, conservari; hanc enim & non aliam rationem esse, cur cæteris gentibus tanta varietas immissa sit, suo loco demonstrabo. Sed quem rei tam abstrusæ delectare censura potest, is rogo, Marcum Marci consulat, virum in idearum designanda efficaciâ, si quis est alius, absolutissimum.

Caput Quintumdecimum.

*AD majorem coloris Æthiopici lucem
Europæorum candor adducitur, & in
quo ille consistat, explicatur. Sanguinem ipsum, quatenus se proximè in reticulata*

culata cutis vascula infert, causam esse colorum in habitu; & qui est accidentalis color seu prater naturam, eum vel externo pigmento & squalori Solis, seu interno fermento & veneno deberi, contenditur.

DE colore cutaneo Europæorum nemo fortè dubitârit, quin is solidæ partis affectio sit, & à texturâ ejus dependeat: Verùm, si subitas illas colorum, saltem in vultu, mutationes in exemplum trahimus, apparet esse fluxam potius quàm stabilem cutis tincturam. In cuticulâ etiam severiores Philosophi coloris formam etiamnum quærunt; verùm, ut ipsa cuticulâ tenuis, atque pellucida, ita non suo, sed alieno & subjectæ cutis gaudet colore. Error est, cuticulam opacam esse & coloris hospitam, temperat tantùm relucentem cutis vasculorumque tincturam ipsa omnis coloris immunis, planè ut impositæ vitri lamellæ picturarum refringere chromatismos solent. Cutis verò ipsa in se complectitur colorem, eumque

eumque per membranam, ceu, nebulo-
 sum cuticulæ textum transmittit pau-
 lum refractum. Sed nec adeo ille co-
 lor cuti inhærescit, ut ejus censendus
 sit proprius, cum vascula tantum non
 infinita cutim pererrent purpurâque
 suâ niveum fibrillarum nervearum
 contextum inficiant. Est dein cuticu-
 lam inter & cutim mucus quidam seu
 textum reticulare, cujus partes non exi-
 guæ in colore temperando, licet huic
 etiam humor subinde impertiat tinctu-
 ram, quam habet, modò tenacem & non
 eluendam, ut in Æthiopibus, nunc vo-
 latilem & superficialem, tempore re-
 mediisque atterendam, ut in iis, qui à
 Sole sunt perusti, aut Bilis fermento
 luteo commaculati, apparet. Omnia
 ergo, quæ succos illos, modò subcuti-
 culares, nunc cutaneos & sanguinem
 mutare apta nata sunt, eadem corporis
 nostri superficiem alio atque alio colo-
 re imbuere semper poterunt: fermenta
 ea vocare liceat, quia humoribus hanc
 mutationem inferunt, sive aërea sint &

L

fluida,

fluida, seu interna & in humoribus
 quærenda. Quantum autem humores
 valeant & ipse imprimis sanguis in
 extemporali cutis tincturâ, Gallorum
 Indicorû experimento constat, quibus
 lobuli illi nervosi, carnei, colli orna-
 mentum, nunc coccinam induunt rube-
 dinem, etiam sanguine certantem, de-
 spumante scil. in cavos & tubulatos re-
 cessus cruore, spirituû effervescentium
 ministerio; nunc cœrulum livorē, con-
 gelante illo non nihil vel subducto; tan-
 dem etiam album, ad interiora planè
 repulso, lobis ipsis spirituum defectu
 collabentibus. Tincturæ autem illæ
 cutis pertinaces sive morbosæ sint seu
 naturales, perpetuo alicui & durabili
 pigmento imputandæ sunt, aliquando
 Bili cum copiosæ, tum subtili & vola-
 tili, uti flavus Hispanorum atque Italo-
 rum color; nunc etiam fixæ & exustæ
 nimium, uti Maurorum Arabumque
 fuscitas, modò acido fixoque sanguinis
 coâgulo, sicut qui est in Septentrione
 livor, modò pituitoso & sanguineo,
 uti

uti maris Balthici accolis, tandem etiam sanguineo, hoc est, temperationis succi dominio, cui se Germanorum & Anglorum inde candor totum debet; nimirum prout sanguinis est textura, ita etiam color cutis modificatur. Ebulliens sanguis & felleo imbutus fermento, etiam in candidis facilè fuscitatem efficit, sed fugacem illam & leviculis remediis subigendam: quòd si usque continuetur, tandem pertinax oritur color & vernaculus, etiam in nepotes transiens; si quidem in totam massam diffusum illud fermentum, semini quoque tincturæ suæ seu dispositionis tribuat partem. Quam vulgò candidiores peregrinationibus suis consequuntur fuscitatem biliosam, pulverulentâ viâ & urente Sole, eam non ab ipso tantùm, quatenus poros laxat & humorem subcuticularem evocat, sed maximè, quatenus biliosum fermentum in sanguine, illo imprimis vultus, ut quinudus atque inermis, exaltat, oriri probabile est. Notavi proprio experimento, quotidianam

tidianam illam fuscitatem facilè acido Arantiorum succo domari, quod nempe effervescentiam sanguinis biliosi feliciter reprimat, poros textumque reticularem opportunè constringat, saltem radiis istis Solis minùs reddat penetrabiles; nam radios esse & ipsam Solis lucem, quæ hunc colorem inducat, ostenderint conopæa, larvæ, quibus sic satis securi feminarum vultus, non à colore, quippe quem experiuntur sub illo tectorio gravem, sed directâ lucis actione, servantur immunes. Ut non dubitem affirmare, lucem, si nullo admodum rorulento aut nocturno frigore excipiat, fuscitatem & tenebras corpori nostro inferre. Sed tamen plurimùm quoque effluviorum cutim transnantium naturam hic posse mihi persuasissimum est, imprimis, si tenax accedat & insuperabilis calor, vel etiam, ut in Septentrionalibus evenit, indomitum frigus. Sol certè partim evocando in cutim fermenti biliosi particulas, partim humorem lymphaticum, quò aliàs cum

cum cæteri humores, tum ipse mucus subcuticularis dilui solent, exsiccando fuscitatem inducit; frigus autem condensando & repellendo; nam crassiores fixioresque sive Bilis seu Melancholiæ atomi transpiratione exitum quærentes, à frigore atmosphæræ, quæ superficiem stringere cutis solet, cuticulæque densitate reflectuntur, interque subtegmen reticulare aut mucosum errantes hærent tandem implicanturq; cum suo ipsius tum texti illius visco; quod constat; pro causarum diversitate aliam esse atque aliam fuscitatis ubique conditionem. Compertum est nævos maculasque solares, flavas illas & Bilis æmulas, non aliunde facilius contrahi, quàm si quis sudante jam vultu & validâ transpiratione habitum subito frigidâ adspergat; sic enim solutæ fusæque Bilis particulæ ad frigus in tenues sese colligunt orbiculos, densæ jam & sic implicatæ textui reticulari, ut vulgò ocelli concrefcere in superficie liquorum solent. Jam qui ab interno

L 3

principio

principio & sanguinis affectione oritur calor & præter naturam, fermento is se debet morboſo aut venenoso; nam, quæ superficialis est tinctura & herbarum Metallorumque succis pigmentisque conflata, ad propositum hoc non spectat. In morbis non insolens mutari habitum coloremque corporis, modò albescere, aut livescere, nunc rubrum & aliquando luteum Ictericumq; consequi colorem. Albedinem lenta & serosa sanguinis dispositio, Leucophlegmatia & Chlorosi Virginum familiaris; livorem, coagulatum cruoris Syncopiticum, acido & pituitoso visco prognatum; rubedinem, effervescentia volatilis coccineique sanguinis, in febribus plerumque; fuscitatem luteam, Bilis modò tenuis, nunc crassa & fixa, cuti nostræ adspargunt: neque per sanguinem tantum fusæ errant illæ nocentium humorum particulae, verum etiam in corporis superficiem inque textum reticulare expositæ, pellucidum membraneumq; cuticulæ velamen materialiter

liter obscurant. Color autem ille, tam sæpe varius à Bile, non alii quàm acido fermento imputari debet, texturam ejus mirificè immutanti; inde enim flavus, viridis, fuscus, niger atque alii complures habitum nimis defædantes. Venenum etiam assumptum vel inflictum, cum in Bilem ut plurimum sese inferat, eamque diversimodè disponat & separet, spargere coloris biliosi virus, non per sanguinem tantum, sed ipsum quoque solidorum contextum, idque intra paucas horas, Aspidum succorumque venenatorum experimentis satis edoctum est, ne laboriosius ea deducere opus habeamus.

Caput Sextumdecimum.

Quæ propriè sit cutis nostræ albedo, & quomodo à sese discrepet, ut in vultu rubore temperetur, & tam à tubulorum nerveorum, ex quibus cutis est contexta, quam vasculorum sanguineorum commo-

modâ expansione candor ille oriatur, expenditur.

Quid autem per candorem intelligamus, ut puto, ex prioribus notum esse potest; colorem, non absolute album, nec cadaveroso similem, sed gradibus nonnullis à supremo illo exactissimoque Cerussæ fucò, tum etiam fuliginosâ obscuritate recedentem, fuscum nonnihil, lividiorem etiam, carneum, & quem vulgò inter ipsos candidos appellant candidum. Duplex hodie est candoris significatus, nam vel in universum ad omnes Europæos cùm Septentrionales tum Australes extenditur, vel inter ipsos hocce ad unam potissimum gentem, cæterarum quasi matrem, refertur: apud Æthiopes verò omnes, qui à nigredine illâ recedunt, albi, etiam Mauri & Arabes, diversâ comparatione. Est albedo Germanis propria, nempe quæ à justo oritur sanguinis temperamento, & à roseo genarum vigore commendatur, in

in hoc uno vitiosa, quod facilius, quàm alii colores, deformetur, pro variatâ sanguinis tincturâ in alia omnia degenerans; ubi fuscitas illa vel Septentrionalium aut Meridiei nihil ferè mutari potest secura sui. Respice, Vir Excell, Afotorum vultus, quàm illi ex candidis & molliculis æruginosam induant & pustulatam vultus tincturam, quàm vetus illa & vernula albedo in sædum abeat coccineumque ruborem à nimis sulfureo & spirituofo vini miasmate profectum. Nulla tamen hætenus reperta rubedo, quæ cum Gallorum Indicorum istâ, quando despumant, Incomparationem venire possit, & in pictorum operis, ubi imaginem condunt humanam, non debeat albo temperari; uti nec albedo tam est absoluta, quæ non rubro semper infringi. Ut appareat sanguinis ubique in colorando habitu præcipuas esse partes. Nimirum Pictores, ut summum exprimant nitidumque floridi vultus candorem, Cerrussâ utuntur, Minio aut Cinnabari, vel,

quæ melius nitorem illum assequitur, Laccâ Florentinâ temperato. Et verò color ille genarum roseus, insigne aliquando pudoris honestatisque argumentum, arteriolarum capillarium per cuticulam proximè transparentium & levi sanguinis ebullitione inflatarum texturæ se debens, non admittit nisi levem Laccæ aut Minii misturam, aliàs facilè depravandus. Cur autem rubedo plus sese efferat in genis, & cur ad animi affectus magis efflorescat & obscuretur, gemina est causa; prima, quòd arteriolis longè copiosissimis cutis ibi superficies insternatur, & cuticulæ, hìc etiam teneriori, propiùs accumbat; altera, quod papillæ nerveæ à plurimis nervorum plexibus oriundæ ex vicino capite, spirituum officinâ, fluidum repetant cum subtilius tum copiosius, adeòque fortiùs vel expandantur aut contrahantur, remittente nitore, quo aliàs animari vultus superficies solet. Itaque, cum ad singulos animi motus ebullitio mutetur sanguinis & spirituum,

modò

modò major, nunc minor, mirum non est aliam aliamque nasci coloris in vultu temperiem, lætam quidem & rubram, si sanguis magis expandatur, ut in irâ & lætitia, tristem & lividam, si constringatur, ut in sollicitudine mordacique animi curâ.

Caput Septimumdecimum.

*D*ifferentia candoris Europæi ratione ætatis explicantur, & cur infantes, etiam candidissimorum Parentum, mox à Matre rubeant, Senes plerunque obscurius tingantur, queritur. Rara de Æthiopum nascentium albedine Historia.

*E*Quidem in nostris, quibus nascendi conditio peculiarem impressit albedinem, mutari color ille per varios numeros solet, non perindè constans & sibi similis; nam ad primam statim lucis usuram rubicundior toto corpore
color

color, progressu annorum incandidiorem vertitur, in Viris, nisi cura accedat, rursus defecturus in ruborem intensiorem, in senibus tandem transiens in ochratum penè pallorem aut obscuram fuscitatem, aridâ jam striatâq; villi subcuticularis superficie lucem suffocante. Notum est omnes, qui nascuntur, infantes, sive in Septentrione habeant, seu alibi in Europâ, protinus à Matre rubere, ut hoc Poëta expressit, nec in genis modò, sed toto paslim corpore colorem alere, qui deinde candidior sit futurus, si ita fert gentis conditio; nam nonnullos quoque candidiores nasci, quàm postea evadunt, Lapponum evicerit fuscitas cum ipsâ ætate & squaloris frigorisque augmento ingravescent. Nostræ autem Matres nutriculæque ex rubedinis congenitæ intensione candorem sibi spondent futuram majorem, quàm si recenter albescunt, haud vano certè augurio; quò enim magis rubent expositi infantes, hoc plus sanguinis fovere in superficie videntur

dentur, qui demum durato habitu & solidatâ cutis texturâ in remissiorem transeat rubedinem, albo nempe temperatam; sed non sanguinem tantum, verum & halitus quosdam crassiores densioresque in illis tenebris & uterino carcere contractos, nec ob aëreæ vibrationis defectum satis ventilatos, in ruboris illius intensiorem accedere facile persuadeor, aëre deinde luminoso, dum poros corporis ultrò citroq; perpluit, effluvia lentè depascente, ut adeò nitidior multò candidiorque exurgat habitus post solium aliquot lucisque usuras, quàm in utero & illâ solis absentia. An verò contraria sit Æthiopum in nascendo fortuna, ut ex Purchasii itinerario descripsit Boylæus; quòd, ut ipsius verbis rem narrem, *albi nascantur, coloremque intra biduum cum nigro commutent, & Lusitani regni Congo incolæ liberos interdum ex Æthiopsis suscipiant, ac sæpius patres decipiuntur, rati, quando infans editur, prolem esse suam, & intra biduum filius filiae*

liave nigritæ deprehendantur, agrè hoc ferentibus Lusitanis. Cum autem illa hodie sit experimentorum copia & commerciorum vicissitudo, ipsæ quoque Æthiopissæ in hoc nostro orbe non infrequenter pariant, mirari cœpi, & tantum non fidem narrantis suspectam habere; quòd hodiè nihil tale sit cognitum: Piso certè & Marcgravius, accurati uterque rerum istarum censores, non poterant historiam tam notabilem, siquidem vera esset, negligere. Nasci aliquando albos inter Æthiopes non est negandum, quando Scriptores exoticorum velut rariores Regum in istis plagis delicias albos referant Æthiopes, *Dondos*, sic enim appellantur; ut diverso quasi delectu illi candidam, nostri nigram pellem, nec minori quisque invidiâ in voluptatis usum adsciscere videantur. Sed ut nunquam, qui nigrinafcuntur, in albos mutantur, sic neque, qui albi sunt, nigros fieri existimem, quoniam cutis illa tinctura genitiva est, & jam tum à primis lineamentis impressa.

pressa. Quid? si sperare hoc potuisset apud Heliodorum Persina Charicleæ Mater, habuisset materiam solatii, non temere in hæc verba erumpens, πεπεισμένη τὴν σὴν χροιάν μοι χεῖραν ἐμοὶ προσάψουσιν: nempe suspectam jure reddebat filia candor, cum ipsa nigra esset; sed non est cur Heliodorum magnopere in hoc sequamur pœticamagis fidei quam historiæ custodem, ut esse mos hodieque illorum solet, quos *Romans* Galli appellant; pulcrè tamen & Naturæ legibus convenienter, quòd ex Andromedæ intuitu candorem illum enatum esse ostendat, Persinam sic quoque criminis suspicione liberans. Ut autem ad Purchasii redeam narrationem, illam non penitus explodendam esse reor. sed, ut nonnulli amant loqui, cum grano falis accipiendam; non aliter ac si nascentium Æthiopum color dilutior sit paulò rubicundiorque, ut est recens à liquore uterino, mox, ubi aëri est admissus & exsiccati plexus subcuticularis incipit, fuliginosæ illæ fibræ, quæ

quæ nigredinem repræsentant, arctius inter se uniantur habitumque magis opacant. Jam antè monui esse in cute nascentium plurimum sanguinis, experientiâ rem conficiente; nam derasâ in Embryonibus cuticulâ, deraditur autem facillimè cremore uterino emollita, infiniti illi vasculorum cutim pererrantium plexus & rorulentus subtilis humor manifestè deprehenduntur. Hoc ergò sanguine tam frequenti & lymphâ subcuticulari temperari putem striatas illas & nigras reticuli subcuticularis fibras, & in rubedinem seu fuscitatem desinere; quemadmodum, si quis Minio vel Ochra extulerit fuliginosi pigmenti tenebras: jam verò sanguine post aëris liberrima perpluvia, & externum corporis musculorumque motum (nam hujus potissimum defectu in utero morari in capillaribus sanguis videtur) excusso & ad truncos magis recedente, roreque illo unguinoso, qui distinebat reticulatæ nigredinis fibras, paulatim exsiccato, necesse est coire eas, junctisque

que flaminibus profundius nigrescere. Itaque diversâ paulò ratione, modò ex illustriore in obscurum, modò ex obscuro in illustriorem vertitur: hinc hōstræ cutis albedo à sanguine sæpè ruborem nanciscitur, Æthiopum contrà nigredo pallorem quendam, si cum profundâ nigredine comparetur. Quòd autem fuscis nationibus & sub calido climate degentibus constanter talis maneat color, partim ab effluviis biliosis in subcuticulare textum evocatis nec facile cedentibus, tum fortè etiam defectui roris Lymphatici, qui expolire cuticulam & utcunque lævem reddere solet, deducendum esse puto.

Caput Octavumdecimum.

DEscribuntur candoris differentia, quæ à sexu proveniunt, & quot sæpe & quàm sollicitis artibus feminarum candor defendi debeat, aliàs facile periturus,

M

copiosè

*copiosè disputatur. Accedit de fucorum
naturâ judicium.*

Est in candoris nostri examine ad Sexum imprimis attendendum, feminas enim candoris habere prærogativam indubium est, sive illum Natura ingeneret, seu ars vitæque mollities producat. Ego autem multis persuadeor ut credam præter figuram corporis externamque seriem nihil admodum singulare illis à Naturâ accidisse, colorem verò aliunde constare. In Æthiopibus certè omnibusque fuscis nullum color sexus discrimen fecit. Quis non videt feminas formam suam, quam velut in pignus acceperunt, non otio tantum & abstinentiâ publici, verum etiam diætæ temperamento defendere, aut, si mavis, parare. Notus est ille ciborum delectus, & ad candorem tuendum recepta bellaria: & ut aliàs in αἰσθητικὰς atq; libidines naturâ magis propendeant quàm Viri, tamen formæ quâdam reverentiâ, & eò quòd feminæ sint (ne-
scio

scio enim, quo fato probrosiora sint in illo sexu vitia, quàm in nostro) ab omni intempestivâ diætâ, nisi quæ ad candorem est comparata, & comestationibus sese abstinere; jam verò ex occasione aut errore natam fuscitatem lactiniorum usu, quippe quæ coloris similitudine vultum illustrare feminea est persuasio, & clysterum quotidianis diluviis depellere & occupare magno conatu laborant; in potu deinde aquam puram, sed nitidam vivoque è fonte bibunt, vinum exosæ, ne sulfureus ejus nidor inflare sanguinem pustulatâque rubedine violare candorem possit, ut popularibus maximè tuis, Vir Excell. ut quibus formæ præcipua est cura, familiare est. Esse potus vim maximam in tincturis corporum immutandis jam olim crediderunt veteres, & hodie nostris est persuasum: illæ enim bibulorum pictæ facies quid aliud quam vini spirituosæque cerevisiæ usum ultrò loquuntur; quid deinde aer possit quidque lumen, in propatulo est. Sanè vel re-

flexum nimis, aut calore importunum, vel etiam planè deficiens in candore illo mutando plurimùm valet. Opus est omnino luce ad serenandū corporis colorem, & ad reticuli subcuticularis debitam explicationem, quo temperetur albedo. Lux contraproportione major & calida plus extrahit humoris & corrugat cuticulam, ut jam minus habeat virium & tensionis ad lucem albedinemve reflectendam; minor autem & obscura ne quidem satis habet, quò evocet rorem subcuticularem & sanguinem attenuet, cujus imprimis, ut ante ostendi, fermentatione vividus constat color; hinc vel in pallorem definit cadaverosum, aut fuliginosam fuscitatem, prout nempe sanguinis est temperamentum, sicut luculentis exemplis carcerarii demonstrant, qui pridem in subterranea & caliginosa loca rejecti, mox, ubi luci ostenduntur, obscurum referunt tristemque omnino colorem; & in Metallorum fossoribus non tantùm est ros ille metallicus, quamvis plurimùm præstet,

stet, sed quotidiana etiam cum tenebris consuetudo, quæ pallorem plusquam cadaverosum illis impingat. Nimirum, quando suppono esse succum quandam subcuticularem, qui cutis temperet siccitatem, eum necesse est ab æquali cum luce tum calore conservari, quæ cum in nostrum hunc aërem commodè cadant, non videtur amplius mirum, cur is maximè sit idoneus ad firmandam popularium nostrorum albedinem. Equidem, nisi temperamentum illud cutis sollicitè servetur, statim mutari color ille solet; ita si quis vel unum diem Soli se obvertat æstivo, illicò candor obscuratur, cum exsiccatione roris, tum mutatione texturæ cutaneæ. Est verò fusca potissimum rubedo, quæ à Sole infertur, quia non cutis tantum solidum, sed ipse etiam sanguis afficitur, atque ita sub æstu illo laborat, ut Bilis effervescentis particulæ, si diutiùs radii incidant, reticulari & mucosæ membranæ seu cuti sese intexant, atq; colorem cutis naturâ album

propriâ fuscitate corrumpant. Sanè,
 qui se pro fuscis aut nigris venditare vo-
 lunt erronei Cingari, non vultum dun-
 taxat, sed totum quoque habitum ad-
 verso sole torrere in more habent, ut
 in tanto solis æstu receptæ intra cutis
 contextum Bilis particulæ jam exustæ,
 obscuriorem & propemodum nigrum
 contrahant fuscitatem, sæpe etiam pi-
 gmentis lardoque & magnâ succorum
 mole intendendam. Sed verò ille sic
 multâ lucis calorisque percussione ex-
 citatus color, facilè in sobolem transit,
 nullis adeo artibus, nisi quas mutuo
 commercio sunt edocti, fovendus. Fa-
 ciet ergo fuscus Solaris ardor, nigros
 aut Æthiopes nunquam. Apparet et-
 iam non inutile esse illud muliercula-
 rum studium in hoc unicè adnitentium,
 ne, quâ Virorum aucupari amores so-
 lent, gratia & nivea albedo, aut si quid
 est candidius, ab influxu radiorum Solis
 deformetur. Hinc in publicum non
 procedunt, nisi conopæis, larvis, aut
 culullis à Solis injuriâ tutæ; hinc quæ-
 sitis

sitis sese remediis adversus caloris exsiccantis vim, si declinari aliter res nequit, studiose defendunt. Circumferuntur in eam rem aquæ cosmeticæ complures & ingens offuciarum apparatus tincturæque Virginales, quarum longè major hodie copia & fructuosior quæstus quàm medicamentorum. Putem autem omnia illa cosmetica ex nostris principiis referri ad tres facultates posse; vel enim blandè refrigerant, compescuntque effervescentiam ebullientis in capillaribus sanguinis, aut biliosa semina jam antè impressa leniter discutiunt, vel etiam emolliunt rigorem asperitatemque cutis lucem facile suffocantis: quæ refrigerant, vel simpliciter frigidam humidamque qualitatem aut simul nitrosam salinam nacta sunt, ut aquæ Plantaginis, Nymphææ, Melonum, Sempervivi majoris etc. vel etiam aluminosam adstringentem, aut vitriolatam, ut Limonum succus & Tartari acidum; nunc etiam discutientem & tenuis substantiæ, quæ fixas sub

cuticulâ particulas resolvere apta nata sunt, ut Aquæ Aromaticæ, sive nitroso refrigerio seu volatili spiritu commixtæ, ut Rosarum illa, fl. Fabarum, fl. Citri, Jasmini etc; Tincturæ aromatum per acidum Citri succum aut Rosarum aquam in Lac virginale (sic autem vocantur vulgo lactea cosmetica) præcipitatæ, quæque majore hoc efficacîâ agunt, Salia volatilia oleosa & saponata, ut est Caphura; vel humida & acria, ut quæ ex Raphano seu antiscorbuticis petuntur; tandem verò quæ superficialem & emollientem nacta sunt qualitatem, ut Amygdalarum succus, albumen Ovi, solutio Tragacanthi: quæ omnia materiam præbent, quâ fuscitas vel profligari, aut albedo conservari in mulierculis solet, ne sic quidem satis tuta, nisi fuci accessissent, pigmenta & corruptelæ genarum, quibus non tam custodiunt naturalem cutis candorem, quàm obducunt, haud suâ sed alienâ formâ superbæ: de quibus hoc tantùm dico, si mercurialia sunt

sunt, ut sunt pleraque, pessimè honestati oris consuli, pessimè valetudini; nam, ut temperies est quædam coloris humani nec exurgentis nimis nec nimis depressi, ita Cerussâ vel Plumbi mole, quâ genarum morbo vel vetustate laborantium supplere lacunas consueverunt, hoc duntaxat consequuntur, ut tandem sine fucis placere nec Viris nec sibi ipsæ possint, ad extremum quoque edentulæ. Ab hac sanè labe est, quòd Hispaniæ meretriculæ in emendicato vel Cerussæ, Cinnabaris aut Lithargyrii pigmento, nigros circumferant & semiruptos dentes aut cassâ planè alvearia; quia mercuriale miasma, quo Cinnabaris abundat, carniū nervorumque laxitatem & salivalis humoris nimiam excitat copiam: unde tanto tamque operoso apparatu alia excogitata, quæ eandem illam oris purpuram candoremque tuerentur, nec tamen sanitati aut justæ in cæteris proportioni officerent. Hinc Bezettæ ex granis Kermes, baccis Spinachiae bacciferæ, Solani A-

mericani, hinc chartæ illæ Hispanienses, delictum & arcanum gentis, sub virore delicatam purpuram occultentes, nonnisi maximo pretio redimendæ, sive ex Laccâ seu Heliotropii succo tincturam acceperint. Quibus apparet, quanto studio & arte conservari aut corrigi color ille debuerit in Feminis tantopere adamatus; à quâ molestiâ cum liberæ sint fuscæ gentes, tum maximè Æthiopes, non dubitaverim hoc nomine adscribere illis quantulamcunque coloris prærogativam.

Caput Nonumdecimum.

Quid denique Vitæ genus in unius plagæ incolis admutandum cutis candorem possit, & quantum aquæ, æris locorumque natura hodie à veteri illâ & à se invicem discrepet, examinatur.

IPsis quinetiam viris magna impendet à vitæ genere coloris mutatio, nam in eodem climate, qui se in tenebras & clau-

claustra immergunt malè feriat, alium præferunt colorem, quàm qui aprica Solis lucisque usum frequentant. Monachi, illi imprimis, qui severiorum legum custodes omnem ejurarunt consuetudinem liberiores, pallore illo cadaveroso satis ostendunt, quid aëris in talibus præstet commercium. Aliter etiam sunt colorati inter Viros, qui comeffationibus & ebriis conviviiis se fatigant, quam quibus frugalis sedet & exigua cœna. Utque ad aërem redeam, Nobiles venationibus bellisque dediti, etiam cum possunt, declinare aëris istas injurias molle putant atque femineum; rustici contrà cōacti subire auræ illam intemperiem in eâdem plagâ, longè civibus, & qui urbes habitant, sunt fusciores; ita ut, nisi capillorum rutilans color & cœrula lumina Germanici candoris proderent vestigia, etiam in hisce plagis pro Galliæ Hispaniæque incolis faciliè acciperentur, quod tamen omne accidentale hic, ibi gentilitium & perpetuum. Cur verò Germanorum

norum non sit amplius ille candor adeo
 celebratis, haud difficulter causam red-
 dere possumus, &, ut Eruditorum ille
 ocellus H. Conringius peculiari libro
 hoc attigerit, tamen esse etiam, quæ
 addi possint, mihi quidem prrsuadeo.
 Scio Virum maximum aëris non adeo
 magnam habere in hoc negotio ratio-
 nem, quòd is cœli motibus obnoxius
 nihil admodum mutasse videatur: sed
 expendenti jam inde à longo tempore
 plagarum naturam atque inter se pro-
 portionem, facilè apparet aliquam in
 Germaniæ tractu inductam esse varia-
 tionem; non tam quòd cœlorum istæ
 sint partes,quàm athmosphæræ pluri-
 mum aëri nostro, ex quo vivimus, tri-
 buentis. Sit usque & maneat in eodem
 centro terra (quamvis obliquatum esse
 nonnihil ejus situm tot annorum lapsu
 experimento Dominici Mariæ Bono-
 niensis, quod in vita Copernici memo-
 ratur, suspicari quis posset) nihil etiam
 Stellæ vel Planetæ nutent, attamen hæc
 nostra Athmosphæra, quæ terræ sese de-
 bet

bet halitibus, vix una & eadem semper esse poterit, cum tot mutationibus eisque levibus temperies ejus subjiatur. Si quæ est annalium fides, puto autem esse, fulgere quondam candidi ibi Soles, ubi nunc caliginosa omnia, pendula & volitantia nubium agmina. Lucis colorisque refractiones, quibus jam antè dixi colorem nostrum vel serenari aut offundi, ab athmosphærâ nostrâ præcipuam accipiunt vim, & pro consuetudine ejus aliter atque aliter temperantur. Hæc verò athmosphæra pro ignis centralis subterraneique naturâ modò paucis nunc frequentioribus & aliis atque aliis vaporibus perfunditur, atque ita anni tempestates inter se in infinitum variant. Sit circulus quidam in rerum naturâ sive anniverfarius, seu lustralis, seu denique secularis; tamen nec modorum, nec accidentium eadem semper ratio esse poterit. Cælum circa idem accuratè centrum æquali libramine verti facilè concesserim, sed terræ adeo variegatæ &

ex

ex pugnantibus elementis coactæ eandem esse semper constantiam non temerè quis probaverit. Sensimus jam ipsi eâ ætate athmosphæræ, quæ pars terræ nostræ censenda est, vicissitudines; hyemes contra morem molles, retentis in Septentrione ramentis glacialibus; ipsas rursus æstates duras & penè autumnales, infringentibus Solis temperiem aqueis nitrosisque effluviis, atque hæc tam diverso & inficeto ordine, ut cum antea actorum temporum memoriâ hæ ipsæ tempestates comparari nequeant: jam verò ex contrariâ plagâ, unde nemo speraverit, hyemalem crepere & glaciale auram insolito experimento vidimus. In Septentrione etiam alibi terræ deseruntur, sufflaminâtis navigationibus, propter crescentis quotidie frigoris injurias, quas tamen aliis iterum regionibus decedere necesse est. Ita ut propter illam athmosphæræ inæqualitatem plurimis gentibus migrandi fuisse impositam necessitatem seriò credam. Taceo in plerisque

risque terræ planis post tot diluvia & vastitates alium videri horizontem, alia strata; nunc Solis ipsam lucem & calorem montium intervallis temperari, nunc perpendiculari reflexione augeri. Sylvas olim, præsertim in hac Germaniâ, lucis colorisque intemperiem moderantes, excisis arboribus complanatas, vel arenarum terrarumque molibus, ut in Bataviæ planis & alibi in Anglia factum esse constat, obrutas, liberiores nunc Soli impetum concedere manifestum est. Scilicet, quod Pœta de artificiali vicissitudine perversisque Romanorum moribus, id jure ego alibi de Naturâ,

Expelluntur aqua saxis, mare nascitur arvis,

Et permutatâ rerum statione rebellant.

Et verò esse alium insularum aut urbium maris plano innatantium genium vel Venetiæ testes sunt, ubi sudo tranquilloque cœlo, complanatâ aquæ superficie potentissimam radiorum reflexionem

flexionem & tantum non intolerabilem reperi; ut adeo hoc ipsum multum ad exsiccationem habitus colorisque mutationem conferre possit. Sed ut athmosphæra sit eadem, quæ olim fuit in Germaniâ, tamen studio & operâ hominum alium ea accepit modum; nam, postquam cultiores esse cœperunt indigenæ nostri, non dispersi amplius fuere in vicos, pagos aut rura, sed in frequentiores conventus, in urbes; ubi tot fumantia altaria & peregrino Sulfuris nidore perfusa, tot rerum ad vitam necessariarum commercia, ipsæ tegulæ domorum altius eductæ atque in angiportus ambagiosos distinctæ, lucis aërisque impulsus mirificè variant, adeoque pro mensurâ & proportionem refractionis aversionisque radiorum solarium colores corporum quoque immutant; ut adeo, prout athmosphæra montium, vallium, planorum, terræ faxeæ, fabulosæ, pinguis, fluentorum, lacuum, paludum, nivium & marium vicinorum est diversa, ita etiam
refractio-

refractiones lucis & caloris diversas esse
 necessarium sit. Quotidiano sensu
 etiam ruricolis constat, aliam esse
 reflexionem à saxo quàm terrâ, aliam
 à perpendiculari plano, quam hori-
 zontali, & pro subjecti ad reflecten-
 dum dispositi naturâ radiorumque
 incidentiâ, caloris lucisq; mutari vices.
 Ex quibus facilè innotescit, locorum,
 quæ sub eodem parallelo & plagâ si-
 ta sunt, aliam esse colorandi vim,
 modò intensiorem nunc exiliorem;
 quando omnis vis, quæ à Sole est, per
 athmosphæram hanc nostram perque
 terræ strata, ibi refractione, hîc refle-
 xione modificetur; imò etiam fieri pos-
 sit, ut gentes, quæ aliàs Solem habent
 non adeò propitium, aëris terræq; be-
 neficio injurias ejus declinent; quam o-
 stendi passim prærogativam esse Nigri-
 tarum & eorum qui sub torridâ habi-
 tant zonâ, non Solis ibi beneficio sed
 terræ & aquæ athmosphærâ viventium.
 Nec aliam ob causam Britannorum est
 singularis & ferè præcipuus inter omnes
 gentes candor, quàm quod clementio-

rem experiantur athmosphæram. Equidem Thamesis, fluvii nitrosissimi, fœcundi atque pinguis, vapore, tum potu nitido & delectis ad hoccibis, conspirante deindè corporis curâ, nitescere istos vultus & ad invidiam serenari crediderim, imo temperie istâ fumosæ aliàs & carbonariæ urbis & falsuginosos maris vapores emendari; ut perpetua illa sit & in multam posteritatem transitura venustas, nisi hanc quoque gentium eò prorepentium colluvies sensim vitiabit; Hybernici contrâ, etsi vicini, expositi maris terræque injuriis, nullis beneficiis securi, obscuri maximam partem & fusci, imò etiam valdè feroces. Est proinde justa ratio, cur credamus vernaculum quemque & indigenam aërem plurimùm in habitu coloreque corporis mutando posse, imprimis, qui nos proximè afficit, premit, & suis illis impulsibus superficiem temperat; ne jam mirum videatur, aliter esse coloratas, quæ in Americâ degunt gentes, etsi eidem sint parallelo obnoxia, jamque in viciniâ Senêgæ alium

lium esse vultus characterem, alium colorem, quàm qui est Nigritarum ultra eum. Nolim tamen inficiari, alimenterum quoque hic esse aliquem usum, nam & antè ipsi hoc ostendimus, & totus in eo ostendendo fuit laudato opere Conringius. Accedunt deindè aliæ etiam causæ, cur à sese mutuò ita differant & diversimodè collocentur gentes populares, urbanæ & ejusdem loci incolæ; illæ nempe nationum inter se mixturæ & migrationes; quid enim hodie sincerum atque impermixtum? alia nunc sunt hominum commercia, quàm olim, ubi suis quisque se finibus tuebantur certò vitæ genere contenti; jam ex omnium gentium moribus rapitur aliquid & in diversissima coitur. Sunt hìc passim in Germaniâ Gothorum, sunt Celtiberorum, sunt Scytharum & Barbarorum ferè omnium reliquiæ, quæ post inundatas terras velut sedimentum adhæserunt, nunc quoque antiquæ Barbarorum potentiæ testes. In Italiâ Gothi, in Hispaniâ Mauri etiam, verum illum & antiquum habitum colorem.

loremque non leviter immutarunt, ne quid de moribus dicam; imo vero ipsi Celtiberi non aliter constare veram nobilitatem existimant, nisi Gothorum se esse reliquias ostenderint, alii etiam Maurorum, quibus certè majoribus plurimi Hispanorum gloriari solent. Tui autem Galli, Vir Excell. quàm non & ipsi variis gentium excursibus misturisque vitiiati, Normannis, Britannis & aliis? sic ut nondum omnes avitæ & peregrinæ indolis semina amiserint. Saraceni, ultimi Barbarorum, longè latèque per Africam dominantes, partim jure belli partim commerciis jactantur, & Mauritaniæ, Ægypti, Indiæque tractus, misturâ primum gentis corruptos, tributarios fecerunt. Græcia hodie qualis? impura certè; tota etiam Asia mutuis attrita & permixta commerciis, alios atq; alios populos in se transtulit, moresque & habitum à veteri illo multum mutavit, ut jam olim Poëta de Syris Græcisque Romam confluentibus;

Jam pridem Syrus in Tybrim defluxit Orontes.

per.

Per Tartaros fœdati jam sunt Chinen-
 ses, & Americani inter se invicem bel-
 lis permisti atque vitiati; Æthiopes mi-
 nùs alias corrupti, cæteris tamen gen-
 tibus maculam hodieque adspargunt,
 in colonias Indiæ utriusque ex Africâ
 deducti, magno profectò numero; ex
 horum ergo cum aliis gentibus concu-
 bitu *Cabocles*, *Mulatti*, *Mestices*, hy-
 bridarum nomina, quia dubiæ genti
 misturam debent, colore utrinq; acce-
 pto & ex parte fœdato. Longum
 foret & præter rem omnia repetere; id
 unum dico, aëris illam temperiem pro
 conditione singularum regionum
 transiisse in genituram; & sic, quam-
 diu non fuerunt mutata, per quæ huc-
 usque steterat ille habitus, continua-
 tum fuisse gentium characterem, do-
 nec per novas gentium cœlorumque
 mutationes rursus degeneraret. Est,
 non inficior, magna feminum potestas
 in determinandis illis proportionibus,
 & facilè genitales notæ à solâ vel aëris
 aut alimentorum temperie obducun-
 tur, sed tamen valdè urgente aëris fluo-

re necesse est distorqueantur nonnihil
 feminum aut, si ita placet, ovorum i-
 deæ. Quis dubitet Hispanos infantes
 jam maturè & inde ab ineunte ætate
 in aliam regionem expositos, si non in
 se ipsis, at taltem in nepotibus aliquam
 reperturos esse mutationem vel colore
 tenus, qui plurimùm aëri debet; nam
 oculorum aut vultus lineamenta non
 nisi serò elanguescere domesticâ obser-
 vatione notum. Sanè, ut constat quo-
 modo ab una post diluvium familiâ,
 eâque haud magnopere à se diversâ, tot
 diffusæ sint gentium species, si Dei ex-
 cipias arcanam potentiam, ad aëris ali-
 mentorumque & ipsius vitæ rationes
 confugias necesse est. Credibile est
 Noâchi posteros, prout in hanc vel il-
 lam plagam certumque vivendi ordi-
 nem consenserunt, peculiarem inde ac-
 cepisse corporis habitum, figuram & co-
 lorem, quæ quidem intemerata man-
 serunt, donec ipsi, ut est instabile ge-
 nus humanum, vel mutare vitæ ordi-
 nem aut habitationem, vel propriâ u-
 bertate aut mutuis incurtribus in alia
 con-

concedere erant coacti. Atque ita tam-
 diu populis æquabilis ille & antiquus
 constitit habitus, quamdiu suis sese fi-
 nibus continuerunt, aliis intacti vel in-
 visi; sed simul ac commercia, bella atq;
 excursus agitata sunt, & *amor succes-*
sit habendi, novæ vultuum notæ, alia
 habitus & oris lineamenta in singulis fe-
 rè gentibus emerferunt, ut jam nihil
 amplius primitivo colori, nihil veteri
 staturæ simile sit aut affine.

Caput Vigésimum.

*RE*petitur proximè & breviter, cui se
 color cutis nostræ materialiter debeat,
 utrùm cuticula, cuti, an tertio corpori;
 quisve ille sit Succus, quæ tincturâ, pro
 varietate gentium, tandem definitur.

ID tantùm obiter de colore adjiciam
 nostro, quamvis gustum jam antè plu-
 ribus dederim, non omnem adeo fluido
 deberi corpori; sed fixum esse ex parte
 in reticulari illâ & mucosâ membranâ,
 partim etiam in solidâ & fibrosâ cutis
 texturâ, ut scilicet excipere quodam-
 modo aëris perspirati injurias seq; im-

munem servare possit: inconstantiam tamen etiam & mobilitatem coloris cutanei, sed à fluido humorum perfectam, satis arguunt vicissitudines, quæ tempestate frigidâ & calidâ superficiem corporis immutant. Modi autem coloris, qui & ipsi varii sunt, à particularum volatiliū aut fixarum mixturâ dependent. Sanguis leviter ebulliens perque textum reticulare & ipsam cuticulam relucens, aut in capillaribus levi coâgulo detentus, quæ vis persæpè esse frigoris solet, rubicundum refert, candidum roseumque in Europæis colorem; tandem etiam, si usque instet, lividum, ut in Septentrionis ultimis. Quod si aëris calor, dum poros perpluit, particulis oleolis sanguinem plusculum accendit & Bilis evehit fermentum atque à massâ sequestrat, emanantia in cutim effluvia luteum relinquunt & Biliosum colorem, pro temperamenti & alimentorum naturâ diversimodè mutandum. Sed ille etiam humor cæterorum colorum est fundamentum; nam, prout acidæ, salinæ, vitrio-

vitriolatæ aut aluminosæ particulæ animique sociantur affectus, ita ad fuscior-
rem, lividiorem aut viridem declinat.
Atque eum in modum, licet cutis tex-
tura naturâ candida sit, tamen eum in-
duit colorem, qui in humore est, post-
quam solidi substantiam attigit vel mu-
tavit, antè enim haud facilè id exspe-
ctes. Color in Aurigine luteus, fuscus,
viridis, à Biliosarum particularum in
cutim reticuli que texturam infixarum
pertinaci morâ oritur, qui tamen, quòd
solidi texturam necdum penitus mu-
tavit, cum tempore profligatur; at qui
Naturâ aut gente fuscus est color, ut
in Mauris, Americanis, Judæis, quique
niger, ut in Æthiopibus, cum solidi mi-
nimis sit immissus, saltem viscoso se de-
beat reticuli pigmento, non remediis
nec facilè aëris mutatione cedit. Judæi
autem, quem habent origine colorem
fædum, intempestivâ diætâ & squalore
sibi reddunt familiarem & obstinatè
continuant: nam, quòd ista gens, vâga
nunc passim, tristi & lustrali colore post
tot annorum cursum etiam in Septen-

trione superbiat, non aliundè, quàm à religioso vivendi ordine & ineptorum ciborum delectu deduxerim; qui enim ex Lusitanis Judæis in pingui & delicato vivunt ocio, non adeo obstinati superstitionis cultores, eos læto & non invenuto candore perfundi notavimus, tandem etiam colorem illum in sobolem transferre. Æthiopes, licet ipsi indelebili cutis tincturâ videantur præditi, tamen ad auræ septentrionalis humiditatem remittere non nihil colorem solent, candidarum vestium comparatione provocandum. Erant quidem plura, Vir Excell. de coloribus hisce pertractanda, sed exemplo antecedentium putem facilè dubitationes solvi posse, quæ aliunde emergunt. Non patiebatur institutum hoc nostrum, colorum omnium causas & differentias latius deducere, quia ex occasione tantum nigredinis Æthiopice operam occeperam, & quæ dici poterant, tuaque curiositas requirebat, non unius & particularis argumenti examini impendi debebant, severioribus curis

ten-

rentanda. Dignare modò laborem hunc
 meum fronte illâ, quàm jam tum ani-
 mo præcepi, meque, qui honestissimum
 quemque observare quàm maximè so-
 leo, meritorum tuorum esse perpe-
 tuum cultorem etiam atq;
 etiam crede.

F I N I S.

SYLLABUS CAPITUM:

Caput Primum.

De Habitu Corporis Æthiopici observata.
 Proportio examinatur ostenditurque in pluri-
 mis bonam esse, in nonnullis tamen etiam vi-
 tiosam. In Capitis figurâ quid laudari, quid
 damnari debeat; pectoris trunciq; proportio-
 nem optimam visam, certè meliorem, quàm
 esse nostrarum solet, quæ stricturâ pectus ven-
 tremque corrumpunt; tumorem gulæ & colli
 brevitate cateram quoque proportionem fæ-
 dere. Difficulus admodum de verâ proportio-
 ne membrorum judicari posse.

Caput Secundum.

*Tentatur habitus externi seu figuræ corpo-
 reæ proportio. In quo consistat pulcritudo; eam-
 que vel veram esse & in naturali harmoniâ
 fundatam, aut imaginariam, id est, virtutis
 aliquâ*

aliquâ aut utilitatis specie commendatam, experimentis variis, etiam Macrocephalorum isto, decernitur. De Nigritarum habitu exemplo priorum fertur iudicium.

Caput Tertium.

Attingitur nigredo: eam variam esse, nec solis Nigritis reservatam, exemplo Afrorum, Egyptiorum & in septentrione Tartarorum, definitur. Cbuseus non pro Æthiope, sed Saraceno, plurimarum linguarum consentiente nomenclaturâ. Æthiopum nigredo singularis, non habitu tantum Corporis, sed & formæ raritate commendata.

Caput Quartum.

Qualis propriè sit externa nigredinis Æthiopice facies, disquiritur; videri nec latum, nec tristem nimis colorem; profundam nigredinem, si splendore illustretur, minùs esse lugubrem; quæ deinde sit nigrorum differentia, quæ superficiei & villorum contextus, exemplis declaratur;

Caput Quintum.

Mollicies cutis Æthiopice inusitata & holerica notatur; ejus causæ illustrantur, exemplo florum & canum ex insulâ D. Thomæ. Singularis observatio de calore & transpiratione istorum animalium.

Caput Sextum.

Nitor argentei splendoris æmulus unde oritur in cute Nigritarum. Exigitur corporum nostro

nostrorum superficies & peculiaris splendor; deberi eum partim sanguinis effervescentiæ cutim expandentis, partim tensioni spirituum in nerveas tubulosasq; cutis vesicellas influentium, tandem etiam rori alicui aut succo superficiem oblinenti, variis experimentis asseritur.

Caput Septimum.

Nigredo Æthiopita, ejusq; causa materialis & proxima deducitur: hætenus conjecturâ tantum definitâ experimento Æthiopissæ in lucem prodit. Consistere eam in membranulâ quadam, reticulatâ, pingui, unguinosâ, & fuligine delibutâ, cutim inter cuticulamq; repositâ, per cuticulam, quippe quæ lucida est, transparence, cutisq; colorem album & nostro etiam candore non inferiorem, obducente, demonstratur. In hujus rei argumentum plura accedunt & uveæ oculi tunica & aliorum exempla.

Caput Octavum.

Materia nigredinis, utrum ex tubulis aut glandulis sudatoriis, an verò ex insensilibus poris seu transpirationis cribro emergat, disputatur. Videri illam potentiâ tantum in sanguine latere, ex succo deinde aut halitu limpidio ad texti reticularis organicam dispositionem, aut certi succi fermentum, actu sub cuticulâ emergere, adductis in eam rem experimentis.

Caput Nonum.

Ad remotiores nigredinis causas propenatur aliorumq; exemplo de diris & voto Noachi decerni;

cernitur; nullâ ratione potuisse ad Ludeos, ne dicam, ad colorem eorum, referri indictam servitutem; nigredinem non magis esse servitutis indicium, quam alium quemq; colorem: deformitatem in figurâ potius corporum, quàm colore consistere.

Caput Decimum.

Causæ propiores delibantur. Negatur Solis in formandâ Nigredine Æthiopicâ ullas esse vires; infusari quidem corpora nimis solibus, at longè ab illo coloris gradu abesse exustionem aëream; Nigritarum clima, etiam in tanto aestu, humidâ fluviorum, quos ibi habent vastissimos, & nitrosâ cæli aurâ temperari non vanis argumentis probatur.

Caput Undecimum.

Colorem, qui à Sole videtur proficisci, non simpliciter esse nigrum, sed pro superficie & objecti naturâ multiplicem, sæpe etiam album, & quæ nonnullorum summâ tingit nigredo, eam ex ipso potius corporum centro emergere, quàm in superficiem positivè à Sole inferri plurimis observatis innotescit.

Caput Duodecimum.

Frigori perindè ut Soli denigrandi relictam esse facultatem, & in ultimo Septentrione etiam obscurum & fuscum haberi corporum colorem ex Hippocratis notabili loco variisq; exemplis constare videtur; aliam tamen esse Septentrionalium, aliam eorum, qui in Meridie degunt, fuscita-

fuscatem; illam lividam & à coägulo oriundam sanguinis, hanc rubicundulam, & nimia siccitati tum raritati & effervescentiæ tincturæq; Bilis deberi.

Caput Tertiumdecimum.

Laboriosius inquiritur, an frigus simpliciter albedinem in Septentrione pariat. Dubia & observata de anniversario pilosorum animalium candore; aërem aliquid, plurimum tamen alimenta, potum & vitæ genus conferre conjecturâ & exemplis deducitur.

Caput Quartumdecimum.

Quanam ergo sit primævanigredinis causa, & num à parentibus in nepotes translata, originem debeat vetustæ Ludæorura gentis mutationi, quæritur; degenerasse habitum & colorem gentium iam initio rerum, postquam affectibus & a sociâ duci homines cœperunt, est verosimile; tum etiam in unum primò objectum factam impressionem ab imaginatione in nepotes mansisse, & colorem simul illo habitu, continuato eodem vitæ ordine, in familiâ non tantum aut gente, sed natione hæsisse, non videtur absurdum.

Caput Quintumdecimum.

Ad majorem coloris Æthiopici lucem Europæorum candor adducitur, & in quo ille consistat, explicatur. Sanguinem ipsum, quatenus se proximè in reticulata cutis vascula infert, causam esse colorum in habitu; & qui est accidentalis color seu præternaturam, cum vel ex-
terne

verno pigmento & squalori Solis, seu interno fermento & veneno deberi, contenditur.

Caput Sextumdecimum.

Quæ propriè sit cutis nostræ albedo, & quomodo à sese discrepet, ut in vultu rubore temperetur, & tam à tubulorum nerveorum, ex quibus cutis est contexta, quam vasculorum sanguineorum commodâ expansione candor illeroriatur, expenditur.

Caput Septimumdecimum.

Differentiæ candoris Europæi ratione etatis explicantur, & cur infantes, etiâ candidissimorum Parentum, mox à Matre rubeant, Senes plerunque obscurius tingantur, queritur. Rara de Æthiopum nascentium albedine Historiâ.

Caput Octavumdecimum.

Describuntur candoris differentie, quæ à sexu proveniunt, & quot sepe & quàm sollicitis artibus feminarum candor defendi debeat, aliàs facile periturus, copiosè disputatur. Accedit de fucorum naturâ judicium.

Caput Nonumdecimum.

Quid denique Vitæ genus in unius plagæ incolis ad mutandum cutis candorem possit, & quantum aquæ, aëris locorumq; natura hodie à veteri illâ & à se invicem discrepet, examinatur.

Caput Vigésimum.

Repetitur proximè & breviter, cui se color cutis nostræ materialiter debeat, utrû cuticulæ, cuti, an tertio corpori, quisve ille sit succus, quæ tincturâ, pro varietate gentium, tandè definitur.



UNIVERSITY OF MICHIGAN



3 9015 06799 7539

LIBRARY

NOV 18 1936

UNIV. OF MICH.
LIBRARY.

A

704,606

DUPL

